

BWÀKABUULWIBWÀ NSHAPÌTÀ

MWÌTAANU CITÙPÀ II



...baalukile mu tabernacle ne dindà edi, bwà kufila milubù mîmpè eku ne eku, yà mùdi Mukalenge Nzambi mwîmpè kutùdi.

² Dyàlumingu dishààle pàakambiibwa cikèènà-kumòna, ne pàmwè ne bwònsò bwènù nuvwa kaaba aka (cyà nyòka uvwa mushipa munkacinkaci awu): cikèènà-kumòna aci kwenzekaci ànu mu kantu ne kantu menemene munda mwà mèbà makumi àbìdi ne ànaayi paanyimà pàa cyòci cimanè kwambiibwa mwaba ewu pa cibumba cyà ku cyambilu apa. Bìvwà byà butùmbi menemene mùshindù ùvwa Mukalenge mwenze. Kacya ncituku mwanji kumona nànsha cimwè cyà ku byòbì cipangile mu... mu matùkù àanyi wònsò à mwoyi, wa bwalu nkàadi ne bidimu makumi àtaanu ne bibìdi. Ànu menemene, mu kantu ne kantu mùshindù ùdici cyenzèke. Nènku ndi ntàmba kudyùmvwà bîmpè bikolè be, bîmpè bikolè be.

³ Nènku kùdi byònsò bîmvwà mwakule abi, ngàmba bwà difundiibwa adi. Anyì, kî ndifundiibwa to, civwa cifùmina kùdi bantu bàà meeji matòòke, bàà baciina Nzambi, bàvwà bwàbù bwòbò mudimu wànyì wa bwambi mutàmbe kwikala ndambù mutàmbe-...mutàmbe-mfukilu bikolè, ne kutwadijabo kudyàmbidila ne mèmè mvwa Mukalenge Yesù, ne kutwàlac-...kutwàdijabù dilongesha dikesè bwà bwalu abu. Kàdi cyàkiimanyikiibwa cyònsò dyàkàmwè. Ndi nsàkidila Mukalenge bwà bwalu abu!

⁴ Nènku ndi mwenze ànu ndipatula mu bwalu abu ne kulekèèla Mukalenge bwà kukùngamanganaYe naabù ne kubùlambula kùdi Mukalenge, bumba bujika dyàkàmwè, munda mwà mèbà makumi àbìdi ne ànaayi bwalu bujike bwònsò. Mbunshìye ne mijilu mitàndàbàle ndambù ne nciyi mu mèmè to ndambù, kàdi nèm Patterson mu cyòci aci paanyimà pàa cikondo kampànda. Mu bushùwà bwà bwalu civwa cyenze bu cinyukushe, kàdi ndi ànu mudyumvwe bîmpè ne byakàne.

⁵ Nènku tuvwa bapete bucimunyi bunène elu lumingu, ndi muswè kufila mulubu wà cintu kampànda.

⁶ Mpindyewu, bu ngìkala mutèèleje civwà Mukalenge mungambile, nùnkù bwalu ebu kî mbwenzèke to. Kùkaadi bidimu bìnaayi Ùkaavwa mungambile. Nènku mukàjàanyi udi mwab'ewu, lwà mu ndekeelu mu batèèleji emu mwaba kampànda patùdi twakulangana apa, ne mwanàanyi wa balùme udi musòmbe...ùvwa kaaba aka pa cibumbà cyà ku cyambilu

eku ànu katanci aka, ne bakwàbò bààbúngì bàvwa bangúmvwè ngàmbe ku musangu ne ku musangu ne: “Eci ki cikondo cyà ndekeelu cingìkàlà mwà kukwàtakù mudimu ne dijingulula adi.” Nwamònu anyi? Mbilwe kushààla mene. . . Mvwa muteete bwà kwikala ne nsòmbelu mutàmbe kuseemena pabwìpì ne Nzambì ne, mu kwenza kwà nànkù awu aku, díbà adi ki kutwalabì cintu kampànda bu cyà kufikisha bantu bu mu kayumbayùmbà mu mùshindù wà bibakolela bwà kumanya kwà kwela dínù ne kwà kwela dikàla.

⁷ Ne pashìishe, mu cilumbu cyà citàdì citùvwà naacì aci, kakùvwa kwikala nànsha mwaku ùmwè pa bwalu abu to bu ngìkala ànu mutèèleje Mukalenge. Bidi misangu yònsò kùndì ngenza. . . Mwaba ùndì mMushìkukila awu ke ùndì misangu yònsò mpetela lutàtu. Ngìkalapù nànsha mutèèleje ne ntèmà ne mwende Nendè!

⁸ Nènku pashìishe cìdi cipeta. . . Mudimu wa bwambi mmutàmbe kwikala mutàmbe-mfukilu bikolè be misangu mikwàbò mu mùshindù wà ne ndi. . . Mvwa ne bwòwà bwà ne nkwèpì kùmvwà mufwànyine kudisangana ku luseke lukwàbò lwàlwa. Kàdi, mpindyewu, ncyèna nswa kwamba ne. . . Ndi muswè bwà. . . muntu yònsò bwà, kumvwa eci mu mùshindù mujaalàme, wà ne ncyèna muswè kwamba ne ndi munkaci mwà kulaluka, kupàmbuka kuya kule ne Mukalenge to, kàdi ncyèna ànu muswè kàbìdi kuleeja patòòke cintu cyà citàmbe-mfukilu nànsha cìmwè to, nwamònu’s, nànkù mu mùshindù bu wà dijingulula ne—ne bintu byà mùshindù awu.

⁹ Mpindyewu, Mukalenge ùdi ne luse lwàbúngì kutùdì mu cikondo eci; N’Yèyè ewu mujuule Mwanèètù Neville, udi ne dīyì dyà cipròfetà; Ùdi ne Mwanèètù Higginbotham ne bakwàbò bavulè bàà ku bânà bèètù kaaba aka bàdi kakùyì mpatà to. . . mu njila wa mapà à nyumà mu èkèleeziyà, bàdi benza bishimà.

¹⁰ Nènku anyishaayi nnupèèsheku ànu bujaadiki. Kùvwa Mwanèètù wa bakàjì Opal Weaver, ncyèna mumanye to ní udi neetù mwab’ewu mu èkèleeziyà mu dindà emu anyi to. Mwanèètù wa bakàjì Opal, udi mwab’ewu anyi? Mùdibi ne ncyèna mukumbane bwà—bwà kumumòna to. Kaa, èè, kukaadi bidimu byàbúngì ùvwa ùpùnga ne lufù ne kànsèrè, ne kànsèrè aku kàvwa ku bidimba byà bukàjì ne kabwele too ne mu twonyi twèndè amu. Kàdi bàvwa bamupèèshe ànu butùku bùmwepele bwà kwikalaye kàbìdi ne mwoyì, ùkaavwa mucyoke bikolè be. Ki mèmè kuya kamusambidila, ne cìkèènà-kumòna kulwacì, ne kakùyì mpatà to yèyè kwondopiibwa. Nènku ncyà kukaadi bidimu bitwè ku dikumi ne bitaanu. Ùtu ubwela munkaci mwètù emu ne upatuka munda mwà bidimu ne bidimu.

¹¹ Dìdìpù edi kubwelakanayè mu bwalu bùvwàye. . . ùvwa ne mpùtà mubi pa muminu ne mashi kutwàdijawò kuzòlòlòka lwà pa muminu wèndè. Kumubelabo bwà àkamònàngàne dyàkàmwè

ne ngàngàbukà. (Nènku aci's mpâmvyà nsanganyibwa ku Canada.) Ki kubiikilayè Mwanèètù Neville, ne Mwanèètù Neville kuyaye kangata Mwanèètù Higginbotham. Ncyèna ngèèla meeji ne Mwanèètù Higginbotham ùdi kaaba aka to, ùdi mwà kwikalapù, mu dindà emu. Mwanèètù Rupert Higginbotham ùvwa umwe wa ku balubuludi bèètù bàà ntwadijilu, mwanèètù mulenga. Ùdi kaaba aka anyi? Ki kuyabò kasambidila mukàji ewu, nènku pàakamusambidilabo... Mashi àvwa àmutuuka dîbà adi, ncyèna mumanye ne kùkaavwa ntàntà bule kaayi to, matùkù àbìdì anyi àsàtù, ne ùvwa ànu ùtwila mashi. Ki Mwanèètù Neville kumusambidilayè ne kacya kààkatwilaku kàbìdì dimata dyà mashi nànsha dìmwè to. Ncyà bushùwà.

¹² Nènku pashìshe kupetayè byújà bibìdì, bijúji anyi ní ncinyi aci mu cilàkàlàkà cyèndè amu, bintu bu mabuba anyi ní ncinyi aci bilembèlèlè mu cilàkàlàkà mukana mwèndè amu; mapondo manène, mùshindù awu. Nènku kàvwa mupete diikisha nànsha dìmwè ku byòbì to, ne bìvwa. . . Kwambayè ne: “Bìdì bìipacila bunène bwà cyà bibìdì cyà mùsà wà hickory.” Nènku byàkadi mukana mwèndè ànu bwà—bwà katanci kakesè, munda mwà matùkù. Ke Mwanèètù Higginbotham. . . Bu mündi ncìyi nkòòkesha kushindumuna dîná dyà cyena Alèmanyè adi bìmpè menemene to, Mwanèètù Rupert, wàmbwikidilaku bwà bwalu abu. Kàdi nànsha nànku, ndi. . . Nènku ndi mwà kwikala mutùpàkàne mu eci. Anyi, to, ngèèla meeji ne yèyè—yèyè ùdi ne dipà dyà dyakula dyà mu myakulu ne dyumvwija dyà myakulu. Nènku wàkamutentekela cyanza, mu cikondo aci, pa mpàlà pèndè apu. Ki mwanèètù wa bakàji awu ne: “Mwanèètù Branham, kí mmakèèlèlè awu to, kí makèèlèlè dilòdòlò to, kàdi dyàkàmwè mapondo awu kushiyawù mwaba” mu cilàkàlàkà cyèndè amu. Dyàkàmwè!

¹³ Ki bangàngàbukà kulwabo, kumutàngila pa muminu, ne bikwàbò byònsò, ki kwambabò ne: “Bikèngela àye ku lùpitaadi bwalu ùdi ne kànsèrè kàà pa muminu.”

¹⁴ Ki twètù... Kuyabò nendè ku lùpitaadi aku. Kàdi ncìvwa nànsha mumanyè ne ùvwa muntwamu to too ne pàngàatwidyanganyi ne mpaasàtà wetù mwîmpè, Mwanèètù Neville, lwà apa, ne mvwa mu njila mutàngile ku lùpitaadi ke kungambilayè ne—ne yèyè ùvwa kuntwaku. Ki mèmè kuya kamumòna, ne bàyèndè ùvwa musòmbe mwaba awu. Ne bangàngàbukà bàtaanu, bànaayi anyi bàtaanu, babwele muntwamu bwà kwangata mateeta, bàkupa mitù, bàmba ne: “Cyòcì anyi, bushùwà, cintu's nkànsèrè, cyenzeja kùdì kishi kàà kànsèrè, cintu's nkànsèrè.”

¹⁵ Ke ngàngàbukà wa maalu à munda kubwelayè ne kwangata cìmwè—cìmwè cintu cyà ku kwòkù. Yèyè ne: “Bwà eci, kakùyì mpatà to, nkànsèrè ànu kèètù aka.”

¹⁶ Ki mèmè ne: “Kàdi, mwanèètù wa bakàji, pìikala Nzambi

wàkakwondopa musangu kampànda ku kànsèrè... anyì ní ncinyì cyònsò civwàci aci. Pàmwàpa bantu abu mbambilamù. Bwôbò—bwôbò mbantu balonge mu cipaapu aci bwà kwamba ne nkànsèrè anyì ncifwànàngàne ne kànsèrè anyì ní ncinyì cyònsò cidiku aci. Aci's... Bôbò's mbantu balongesha bwà bwalu abu. Nènku cyôci cimweka bu kànsèrè pààbò kwambabò ne nkànsèrè." Ki mêmè ne: "Pàmwàpa ki mùdibi."

¹⁷ Kàdi mwanèètù wa bakàji kàvwa muswè kwitabuujà ne civwa kànsèrè nànsha. Pa nànkù, mêmè kwamba ne: "Kàdi pùikalabi ne Nzambì ùvwa mwà—ùvwa mwà kwandamuna ku disambila bwà kwimanyika dipùmuka dyà mashi adi; Nzambì ùvwa mwà kwandamuna ku disambila, kuumusha bintu binène abi mukana mwèbè. Nànsha ciikale ní ncinyì cidiku aci, Nzambì neàpangile mwà kuciimanyika anyì?"

¹⁸ Yèyè ne: "Amen!" Ne bàyendè musòmbe mwaba awu. Ke yààya awu ne: "Apu's ke pàndì ngendela mubandepù mpindyewu mene, bwà ne Nzambì neàciimanyike."

¹⁹ Ki mêmè kumusambidila. Nènku ke kwangatabo bintu byà ku kwòkù bwà kubyenza mateeta, kàdi dyà bàalukila ne bipeta "kamùyì kantu" pààbò bwònsò bàvwa bàmbe ne civwà kànsèrè. Nwamònu anyì?

²⁰ Pa nànkù bwalu bùdi ne, balunda bàànyì, Yèyè ùdi Nzambì ne Ùdi wàndamuna ku disambila. Nènku tudi ne disànkà dipite mùdìYe ùtùkumbula mwaba ewu ku kaa tabernacle kakesè kapwekèle aka. Kakèna ne cyà nsongo cyà kutàngilaku to, bibayabaya byà kale bikesè bitùdi beelekù pàmwè ebi, kukaadi bidimu byàbùngì, bu cisokomenu pa mitù yètù, musàka kumutù kwètù's, èyowà, bwà kutùkùba ku mvùla ne nèjè ne bikwàbò. Kàdi bantu bààbùngì bàdi ne mwoyi leelù ewu bwà diditàcisha edi, ne ku cyôci aci tudi ne kusàkidila kwàbùngì.

²¹ Tudi ne kusàkidila bwà balubuludi bèètù. Tudi ne kusàkidila bwà balami bèètù. Tudi ne kusàkidila bwà disangisha dyètù. Ne tudi ne kusàkidila bwà mpaasàtà wetù. Tudi ne kusàkidila bwà dipà dyònsò didìYe mufile mu èkèleeziyà adi. Nènku tudi tulòmba bwà Wàpèèshaku bantu aba dyumvwa, bwà kabàluku kupàmbuka kuya ku luseke lubi kàdi bàshaale naadi ànu buludi muncacinkaci mwà njila. Kabàyiku baditambishi anyì cikampànda nànsha; dībà dyònsò dinwàdìdingà kuditambisha, kwènù kwàjikidi ànu apu, nudi numòna's. Shààlaayi ànu naadi ne didipwekesha.

²² Nènku nwamònu's, mpindyewu, dībà adi bantu bàdi bàbwela, babèèdi ne beena ntàtu, bwà kubàsambidila pàndiku ngiikisha mpindyewu bwà pàmwàpa cidimu cimwè taa bibidi, pashìshe Nzambì mmulongòlòle njila wa dicitabaleela pàncidi ngiikishaku katanci apa. Nwamònu anyì? Kaa, aci kī ncyà kusàkidila anyì? Bivwa bikèngela bwà... Kabìvwakù bikèngela twètù kwikala ne kusàkidila bwà cyôci aci anyì? Nzambì kàtu

ùDishààdila kàyì ntèmù nànsha, nàнку awu tudi ne disànkà divulè bwà bwalu abu.

²³ Mpindyewu, lumingu lùlwalwà elu, bu Mukalenge mwà kwanyisha, ndi ne kiipàcila kàà kwangata bânà bàànyì bàà bakàjì batekète bàdì bàfùmìna ku dipàtuka mu kàlaasà bwà kaadiikisha kààbò kakesè, nàнку ndi ndòmba bwà nwàtùsambidilaku. Mwanàànyì wa bakàjì mukùlumpè, wa mu tùlaasà tubàndìle awu, mmuswè kumòna mwaba wàkendeshila Paul Revere kabalù mundaankùlù awu, mwaba wàkashìilaye èkèleeziyà awu. Nènku twètù. . . Ndwà kwàka mu Nouvelle-Angleterre nènku tudi baswè kuyakù bwà kucimòna.

²⁴ Pashìishe, ntu misangu yònsò njingajinga kumòna Old Ironsides. Mbanganyì bàtùku búmvwe kasàlà kàà *Old Ironsides*? Aku's ke kàànyì kàntù mutàmbe kunanga bwà ku twònsò tùndìku mumanyè; pa kuumusha twà beena Kilistò, aku's ke kàànyì kàà katàmbe bwìmpè. Ntu ànu. . . Ndi ntwàdìja kukàbala mwadi unsùma nsòmba panshi, ntwà eku ne eku, ngàalukila. Mmunyi mùdì mwà kucitùkija paanyimà. . . Mbyenze ànu mùdì kwangata kabalù kàdì kukàshipa paanyimà pàà kwòkò kamanè kakwambulwisha wèwè ne dìkù dyèbè. Ncyèna ànu—ncyèna ànu mwà kwitaba nàнку to. “Nàнку's nènkaùtùlè!” To, kwenji nàнку to. Pàdìbi ne ntende yà bingoma byà cyena Britanique mmidituute kùdìku ne milamune bipàtu byà mu luseke lwà mucì wa lusanga, Ncyèna—ncyèna mwà kwitaba bwà wèwè kukàngata ne kukinyija to.

Kàfìlaayi kùdì tunzambì twà cipeepèlè cicolè,
Mikenyi ne cipeepèlè cicolè!

Ntu bulelèlè muswè aci.

²⁵ Ne pashìishe tudi baswè kupweka, ne Mukalenge Kennedy kí mmutùbìikìdishe to, kàdì tudi baswè bulelèlè kumòna Maison Blanche patwikala kuntwaku. Bòbò. . . Ntu mubwelebwèlemù misangu yàbùngì kàdì bânà mbaswè kumumòna. Pashìishe netwàlukile kumbèlù, bu Mukalenge mwà kwanyisha. Nàнку nwàtùsambidilaayi.

²⁶ Nènku tudi tusambidila bananga bèètù bwònsò mwaba ewu bàdì bayè mu diikisha, bààbùngì mbenze ngendu bayè mu myaba mishìilèshìilàngàne. Ne bàmwè bàà ku bwòbò mbyayè mu dindà emu, mu Kentucky ne mu Tennessee ne mu myaba mishìilèshìilàngàne. Pa nàнку tudi tubàsambidila.

²⁷ Mpindyewu, kùvwa cìngà cintu cìmvwà ne cyà kumanyisha. Kaa, èyowà's, mudimu wà dibàtiiza wùdì dyàkàmwè paanyimà pàà disangisha edi. Nènku dìbà adi—dìbà adi ngèèla meeji ne kùdì dilàmbula dyà bânà, mwanèètù wa balùme ùvwa ùbùngambila, dilàmbula dyà bânà. Ne bintu byàbùngì bitùvwà ne cyà kusee-. . . Wamba cinyi? [Mwanèètù wa balùme ùdì ukonka Mwanèètù Branham bwà masangisha à dilòòlò—Muf.] Èè, ncyèna ngùmvwa bwà kwangata masangisha wònsò àbìdì

to. Nudi numòna's, ndi ngàngata òmòwè ne Mwanèètù Neville wàngata dikwàbò adi. Nènku ncyèna mwà...Kabyèna... Patùdì twètù bwònsò bàbidì mwab'ewu, bwà cinyì kucyòkesha umwe wa kutùdì ne mudimu? Kí mmwòmò anyì, Mwanèètù Neville? Ncyà bushùwà menemene.

²⁸ Nènku, pashìishe, Doc mmungambile bwà kuv-... kunwambila bwònsò bwà kuyìvùluka, milayì yènù yà mfranga bwà tabernacle, bwà—bwà ne èkèleeziyà...bwà ne bàdì munkaci mwà kupàngadika bwà diibaka pàdìbo ànu mwà kupeta mfranga búngì bukùmbàne mitèèka ku luseka bwà citanda.

²⁹ Nànku awu mwà—mwà...Bwànyì mèmè bìdì ànu bu ne kùvwa cintu kampànda, bivwa ne cyà kwikala panùvwa bangambile bwalu abu, dilambula dyà bânà. Kì cìvwàku aci. Nènku netùcyenze dyàkàmwè paanyimà pàà bamanè kujikija disangisha edi mpindyewu.

³⁰ Mpindyewu, eci ncyà kusambidilapu, bilàmbà ebi, ngèèla meeji? Èyo, mukalenge. Netwènzè cyòci aci pàmwè, ne pashìishe... .

³¹ Mpindyewu, kumpàlà kwà twètù kuseemena ku Dìyì... Mbanganyi bàdì basànka bwà Dìyì? Kaa, ekèlekèle, mbyenze bu kwikala ne mwoyi ku mukùnà! Nudi numòna, nudi—nudi mwà kumòna kubangila ku dyàlumingu dishààle cìdì dyanza dyà maalu mu mùshindù wà Nzambi cyumvwija. Nwamònu anyì? Pàngàmònu ne ùvwa n'nyumà uvwa mudifinde munkaci mwà bânà bèètù bàà mushinga mukolè abu, kakùvwa mùshindù bwà muntu wetù wa mu bufùki ewu mwà kwipata nyumà awu to. Pa nànku cintu cìmwèpelè cìvwa cìkèngela bwà twètù kwenza cìvwa nkucilambula anyì kucilekeleela Mukalenge, nènku mu mèbà makesè bwalu bujikè.

³² Mpindyewu, mpaasàtà (ki mèmè ùyaaya ewu), bu mùndì mukwàcishanganyi neebè mwab'ewu mu mudimu wà Mukalenge, ne ànu bu mwàkamba Pòlò ne: "Ndi nkucipisha kumpàlà kwà Nzambi ne banjèlò basungula," nwamònu's. Ne kùdì èkèleeziyà ewu, ke cileejilu cipwàngàne cyà mwà dyanza muntu yèyè mupàtuke mu bulongame mu èkèleeziyà. Nwamònu anyì?

³³ Mpindyewu, kwòkò kujúuke cintu kampànda mu èkèleeziyà cìdì kaciyì cìmpè to, dìbà adi muntu, udi mumanyè ne kí ncìmpè awu, àkamòngane ne mwena bwalu. Nènku muntu awu yèyè kàyì mwà kupungishiibwa to; dìbà adi cintu cìdì cìlonda cyà dyanza nkwangata ntèmù ne kuya, anyì pàmwàpa ntèmù umwe taa bàbidì, nènku bàye kùdì muntu ewu bwà kumupungishabo anyì kulongolola bwalu abu. Mpindyewu, tèèlejàayi ne ntèmà! Mpindyewu, eci cìdì munkaci mwà kukwàciibwa pa mukàbà wà mèyi, kàbidì. Nènku dìbà adi aci cyòci kaciyì cyèndè to... .

34 Kashidi kanùlekediku kasùmbù kakesè, anyi cintu kampànda cikesè cikwàbò, njiya mikesè mibi yijuuka munkaci mwènù to. Yipàtulaayi buludi mpindyewu! Bwalu ki kakesè. . . Ke kanyama kakesè kàà mukenge kàtù kanyangakaja tumuma twà mvinyò, nudi bamanyè's. Nàнку awu kuumushaayi mu njila! Njiya kampànda mikesè mibi, nda ùkayambile muntu awu. Ambà ne: “Ndi—ndi mupiiile. Ncyèna—ncyèna ndyumvwa bîmpè kumpàla kwèbè to, anyi cikampànda. Nkwàcisheku bwà kucisambidila, bwà ngààmòna mwà kudyumvwa bîmpè.” Bwalu, katwèna baswè cintu nànsha cîmwè to ànu Nyumà Mwîmpè wa Nzambi mukezùke, kàyì musopakaja, munkaci mwètù. Ki cyònsò citùdì baswè ncyòci aci. Dìbà adi mapà ne bikwàbò nebwatè mudimu bîmpè ne bintu byònsò nebyenzeke mu mùshindù mujaalàme.

35 Bwà cinyi kwikala ne citùpà cyà èkèleeziyà pàdibi ne nudi mwà kwikala ne mujimà? Bwà cinyi kwitaba mupinganyi pàdì mau lu wònsò mùle tètè ne bishùwashùwàlè? Nwamònu anyi? Katwèna baswè aci to. Nàнку njiya kampànda mikesè mibi yòyi mijuuke munkaci mwènù nwènù bidimba, ewu bwà mukwàbò, nda kùdì muntu awu.

Udi wamba ne: “Èè, yèyè's nguvwa mungênzè. . .”

36 Aci. . . cidi. . . Mpindyewu, vùlukàayi ne, kî nne “wèwè ne cilèma anyi dipanga byà kupiisha naabi mwanèènù,” kàdì “Piikala mwanèènù ukubadila wèwè bwalu.” Nwamònu anyi? Nda kùdiye bwà nukapunge, mwambile ne wèwè—ne wèwè udi mumumvwile njiya mibi ne udi muswè bwà kwaluja bulunda, ne sambilaayi ne nuye ku cyoshelu bwà kupàtula cintu aci munkaci mwènù.

37 Mpindyewu, Sàtaanà neànùtuutè ku musangu ne ku musangu too ne panùdì nujikija pa buloba apa. Vùlukàayi ànu aci. Kanwàkwikala ne cikondo nànsha cîmwè cidi bisuusu kabiyi bituucika dìbà dyònsò to, bwalu nudi mu mvità. Nuvwa bakebe bwà kulwa kùdì Kilstò, byenze bu nuyàaya ku pikiniki anyi? Èè, nenùshituke bushùwà, bwalu cintu's mvità yà dìbà dyònsò. Ndi mu budimi bwà bwambi munda mwà bidimu makumi àsàtù ne cîmwè, ne ntu mulwangane mvità mu katùpà ne katùpà kwònsò kàà njila. Ncyà bushùwà. Byàkakèngela bwà Izalèlèla kulwanganaye bwà katùpà ne katùpà kwònsò kàà njila. Bwòbò—bwòbò. . . Palestina ùvwa mubàpa, kàdì byàkakèngela bwà kulwanganabò bwà katùpà ne katùpà kàà njila bwà kumupetabò.

38 Mpindyewu, nwavùlukaayi eci mpindyewu, ne bu. . . Dìbà adi kwòkò kujooke cintu kampànda mu èkèleeziyà, dìbà adi mpaasàtà. . . nènku pawikala—pawikala ne cyà kulwa kwangata mpaasàtà, bwà kuya nendè kùdì muntu awu. Pashiishe yèyè kàyì mutèeleje to, dìbà adi lwàku kumpàla kwà èkèleeziyà bwà kucyamba kumpàla kwà èkèleeziyà.

Mupèèshaayi cikondo bule kampànda bwà kudìpungishaye, pàmwàpa kuumukila ku dyàlumingu ne ku dyàlonda. Nènku yéyè kàyì mutèèleje èkèleeziyà to, dībà adi Bible mmwàmbe ne: “Ikale bu mumpàngaanuù ne mumpùblikaanù.”

³⁹ Aci, nwamònu’s, pàdìyè ànu mukùbìibwe kùdì èkèleeziyà, Sàtaanà kèna mwà kumulenga to. Kàdi pàdì èkèleeziyà umusùlula umuumusha mwinshì mwà bukubì bwà èkèleeziyà ne Mashì à Kilistò, dībà adi Sàtaanà neàkwatè mudimu pambidi pèndè. Aci necimwaluje cyàkàbìdì mu dipungishiibwa. Nwamònu anyi? Nudi—nudi nuumvwa aci, kì mmwòmò anyi, mpaasàtà? Èyowà’s, mukalenge.

⁴⁰ Pa nàнку ke cintu cyà kuvùluka misangu yònsò bwà kwenza, nkwikala bapungìshìibwe, kulwa kùdì Nzambì ne kulonda njila wa Nzambì. Tudi ne cyà . . .

⁴¹ Aci cìdì citùleeja cinyi? Bàbìdì anyi bàsàtù bàà ku bânà bèètù bàdì bamanyè ne ngàakakwàta mudimu mukolè mu bwalu ebu munda mwà bidimu bibìdì anyi bisàtù. Ncyà bushùwà. Kàdi pangàakafika mu cipidì cyà kwela meeji ne bu mùdì bantu abu, nènku ndekeelu wa byònsò mvwa mwà kunanga bantu abu bikolè mu mùshindù wà kabàyiku mwà kucivila to. Ki mèmè kwangata bantèmù kàdi kabyàkenza bwalu nànsha bùmwè to. Byàkakèngela bwà mèmè kubùtwàla kùdì èkèleeziyà. Ne pashìshe kuumukila ku cyambilu eku mu dyàlumingu dishààle, mèmè kwamba ne: “Ncyèna muswè kucyùm vwa misangu nànsha ùmwe kàbìdì to. Ngàcìlekèdì. Ngàcìshìdì Nzambì, nwamònu’s, ne ndi muMulàmbùlecì.”

⁴² Nènku dyàkàmwè kuleejabi ne bantu àbu bàvwa babìikidìibwe. Cyòcì . . . Mpindyewu, bu ne kabìvwa nàнку to, pàakafikabo ku dilongolodiibwa dyà ku Mifùndu . . . Nènku muntu yéyè kàyì mwà kutwàla dilongolodiibwa dyà ku Mifùndu to, ùkwàta ciiji misangu yònsò ne utaayika, bìdì bileeja ne kèna mu bulongame ne Nzambì nànsha. Ncyà bushùwà! Kàdi munsantu mushùwashùwàlè wa Nzambì neàpungishiibwè ne Nzambì ku Dìyì. Ncyà bushùwà. Ne Dìyì ke mùshindù mujaalàme wa dilongolola. Bìvwa bikèngela bwà bânà bèètù abu kwikalabò ne kusàkidila kwàbùngì kùdì Nzambì bwà ne . . .

⁴³ Nwamònu’s, Bible mmwàmbe ne “ba-Kilistò bàà mashimi nebàjuukè mu matùkù à ndekeelu ne bafwànyine kuseeswisha basungula mene bu ne bìvwa mwà kwenzeka.” Kàdi kabyèna mwà kwenzeka to. To, mukalenge. Basungula bàvwa badyànjlila kulongolola, nàнку kabàakuseeswishiibwa to, nudi numòna’s.

⁴⁴ Pa nàнку bânà bèètù mbènzè ànu . . . Kulwabo kumbèlù ditùkù dyàkalonda, nwamònu’s, nànsha mene too ne mwàkafikabo ne kutwadija kumpèèsha Mifùndù yàbò. Ne pashìshe Nyumà Mwìmpè ku Mifùndù wàkapiisha ànu byònsò bìvwàbo bàmba abi. Nudi numòna anyi? Nàнку’s ki bwalu abu, kumònabò, musùmbà musungula wà bantu awu kwalukilabo

mu Bwikadi bwà Nzambì. Bìdi bîmpa kusàkidila kuvulè bwà bantu bu nàнку. Èyowà's, mukalenge. Ki bantu bàà bushùwà mbàbù.

45 Paùdì mwà kumòna muntu udi mupùile, ne bijaadikùibwe ne mmupùile, dîbà adi aci's cidi cìleeja ne yèyè mmuswè kwikala mwena Kilistò, ùdi ùjuuka wàmba ne: "Ndi mupùile." Awu—awu's mmwena Kilistò mulelèlà.

46 Kàdi mulumyàna udi ubìnduluka yònsò, ne upatuka uya lubilu ku luseke lukwàbò wàmba ne: "Kya, kaMùvwa nànsha bwà nsongo to," ne byà mùshindù awu; tângilà, mwanèètù, udi mwà kumòna ànu dîbà ne mmupatuke mu dipiishibwa bwalu kàvwa wa ku twètù nànsha. Kàdi misangu yònsò, mpaasàtà, ùlwe ku Dîyì adi ne Dyôdì nedicyènzè musangu wònsò. Kàdi bikèngela ùshaalè ne Dîyì.

47 Ki bwà cinyi pàngàakalwà, mpindyewu, ndi ne . . . ncyèna kàbìdì ngèza dijingulula mu—mu Ètats-Unis to, ncyènakù nànsha ne meeji à kudyenza to, too ne mungààfwà, ànu dyàmwàmwà dyà mbù ne mu madimi à bwambi àà kubaabèndè ne bikwàbò. Mu bushùwà bwà bwalu, bu dipà, bu dipà dyà cipròfetà, nediikaleku misangu yònsò, kàdi nendilamine bwà mèmè nkààyani ne kupàtula bipeta byàdi bwalu bìdi . . . dîbà—dîbà dikaadi diye bikolè bwà ditùkù edi mpindyewu bwà dyôdì . . . ndyenda ànu ditùngunuka. Twàtàmbi kuseemena ne cikondo cyà nshiikidilu be. Kàdi mu madimi à bwambi à kubaàbèndè bìdi ànu bwalu bùmwe anyi àbìdì ku cibùmà cyà ku cyambilu anyi, mwanèètù, ndi ngàmba ne byàngatangana.

48 Dîbà adi tudì ne ditentula dyàCi dyà mu musunya. Kaa, ekèlekè! Bìdi ànu byèza luse. Tàngilàayi, ndi muswè bwà . . . Mbeena Mpenta búngi kaayi bàdi kaaba aka? Elà cyaanza muulu. Èyo. Tàngilàayi, nwènù beena Mpenta, kùkaadi ndambù wa bidimu Nzambì wàkanùpònena ne nwènù kubanga kwakula mu myakulu. Ncyà bushùwà. Kàdi cyàkenza dyabùlù ncinyi? Wàkaseemena ne kufila ditentula dyà musunya dyà bwalu abu. Wàkenza cintu civwà kaciyi cijaalàme to, kupweka ne bantu ne kwakula mu myakulu, ne kubafikisha ku dyakula yimwè myaku ne bikwàbò bwà kubafikisha ku dyakula mu myakulu, ne bikwàbò; kàdi mulùme mwikàle ùpàtuka ne mukàjabèndè, ne bintu byà mìshindù yònsò, ne mìshindù yònsò, bàmwè bàà kùdìbo bànwa maalà, bànwa mfwankà, ne bikwàbò byònsò, bàtùngunuka ànu ne kwakula mu myakulu. Wàkenza nàнку bwà cinyi? Bwà kufikisha mpungi mulelèlà ku difila mwadi mulubidìle kùdì bantu. Dîbà adi nganyi udi mwà kudìlongolola bwà mvità? Nwamònu anyi?

49 Pashìishe pààkajuukà eci . . . Mpindyewu, tudì ne bantu mu batèèleji amu . . . Kùdì umwe wàkaya buludì . . . wàkandyànjidila ànu mu Canada mwàmwa mene ku . . . Mòna's, bampùlùshì kumubakula bu mubàkyanganyi ne mulùme nèndè. Nwamònu

anyi? Kwambayè ne: “Mòna’s, Nzambi mmumpèeshe dipà dyà dijingulula.” Yèyè ne: “Àlèluuyàh, ndi ne. . .” Yèyè ne: “Mpindyewu, Mukalenge mmungambile ne muntu kampànda mwaba ewu dîna dyèndè ‘John. . .’”

⁵⁰ Twàkadi ne mukàjì kampànda mukesè mwab’ewu dînda kampànda, mufùmîne kuntwaku, nudi bavùlùke, mufùmîne kuntwaku ne kwambayè ne: “Mukalenge mmumpèeshe dipà dimwèdimwè adi.”

Ki mèmè ne: “Èè?”

Yèyè ne: “Mvwa kujinga ngìkalakù ne mpùngà wa kucijaadika.”

Mèmè ne: “Cibùmbà cyà ku cyambilu ncyôci aci.”

⁵¹ Kàdi’s nwàkamòna cyàkenzeka; dintamfù dyà dilonga dyà maalu à mu nsòmbelu yà bantu pa dyôdi, nwamònu’s. Kàdi panùdi numòna, Mwanèètù wa bakàjì Snyder ùlwa, ke kumwambila ne ùvwa ne “binyòka,” cyôci–cyôci–cyôci kubijikija. Pàvwa Mwanèètù wa Bakàjì Snyder. . .

⁵² Ki mèmè kwamba ne: “Aci kî ndutàtù lùdì naalu mukàjì awu nànsha.” Mèmè ne: “Ùvwa mudishinde ne mucibùke cifùka.” Ki mèmè ne: “Kèna nànsha mwimàne mwaba awu to. . .” Mu bushùwà bwà bwalu Mwanèètù wa Bakàjì Snyder kàvwa mutàmbe kuumvwa bìmpè to, ke kwambayè ne. . . Nènku cìvwaye naaci, ngèèla meeji, cìvwa ncyùjà mu cifù cyèndè anyi cintu kampànda cyà cibì cyà mùshindù awu. Mèmè ne: “Ke bwalu bùdìku abu; musòmbè mwaba ewu ùyiikilangana ne bânà bèètù pa bwalu abu dîbà dyònsò.” Nwamònu anyi?

⁵³ Kàdi bìdi ànu—ànu bwà kuleeja ne èkèleeziyà awu, nwamònu’s, aci’s ndifwànyikija dyà musunya, nudi numòna’s. Ne ciine aci cìdi cyenza cinyi? Cìdi cyenzeja mpungi mulelèlè. . .

⁵⁴ Mpindyewu, pàmvwà nsanganyibwa mu Canada bàakabàkula mulumyànà uvwa muyemù awu. Ne kwamba (ànu munkaci mwà musùmbà wà beena ku Norvège), ke kwambaye ne: “Mukalenge mmungambile ne muntu kampànda mwab’ewu. . .” musùmbà wà bantu bu ewu nùnkù misangu dikumi, “muntu dîna dyèndè ‘John,’ pàmwàpa ‘Joannes,’ ‘Johann.’” Yèyè ne: “Ànu lwà mwab’ewu, ngèèla meeji.” Yètè ne: “To,” mwàkambaye, “ùdi lwà muntwemu mwaba kampànda”; mu bushùwà bwà bwalu kumwelabo pambèlù. Mu ditùngà dyà beena Norvège bushùwà? Nènku muntu yònsò ùvwa ne. . . Byà lukàmà makumi citèèmà byàbò bàtu ba Petersons, Carlsons, John, Johannes, ne, mòna’s, ncyà bushùwà. Nwamònu’s, ncyà bushùwà ne yèyè udi. . . Ùvwa ne cyà kwikalamu mwaba kampànda. Pashiishe ne: “Mukalenge mmungambile ne muntu kampànda ùdi usaama nyimà, ndi mumvwe nyima wanyi ùnsaama.” Muntu kanà yònsò udi mulongèshìibwe mu Mifùndu ewu mmumanyè ne aci ndilonga dyà maalu à mu nsòmbelu yà bantu dyètù edi. Aci’s. . . Ncyà bushùwà, ncyôci.

⁵⁵ Kàdi, nwamònu's, cyàkenza cinyi? (Pashiishe mwabilaayi kumwambwilabo ànu mwaba awu kùdi beena—beena FBI kuumukila kunu, kubàtumabo kuntwaku bwà kumubàkwilabo kwòkù, kùdi Mpulushi Minène yà Bukalenge.) Ke cisumbù cyà bambi kulwa kùndi, ne: “Mmubàkyanganyi ne balùme nendè,” mwàkambabo, “mòna's, Mwanèètù Branham pàmwàpa ùdi cintu cìmwècimwè aci. Ki mùshindù wùtubi ànu byènzeka ngwòwò awu, nwamònu's.” Cidi cyenza cinyi? Bwà kupèesha mpungi mwadi mulubidile. Nwamònu anyi? Ànu menemene. Ke mùshindù ùtùbi misangu yònsò, uteeta kwenza bintu mùshindù awu bwà kufila mwadi mulubidile, aci's mmudimu wà Sàtaanà bwà kwenza nàнку's.

⁵⁶ Kàdi, mpindyewu, kanùseesukikù ku Dìyì adi nànsha. Nwavùlukaayi ne, ndi nnùcipisha kumpàla kwà Nzambi ne: *Shààlaayi ne Dìyì adi!* Kanùseesukiku ku Dyòdi nànsha. Nènku bintu abi byòbi bijuuke munkaci mwà bantu ne bintu byà mùshindù awu, musangu wònsò udiku cyà mafi, cishùwashùwàlè cidikù. Kwòkù—kwòkù ndola wa mafi, bìdi bileeja ne kùvwa ndola mwìmpè kùdìbo benzele wà mafi awu. Paùdi umvwa mwena lubombo kampànda wàkula mu myakulu, kwèna mwà kwamba ne ùdi ne Nyumà Mwìmpè to. Kàdi, vùlukàayi ne, yèyè ùdi ùtentula mwena kwitabuuja kampànda mushùwashùwàlè udi ne dipà dyà dyakula dyà mu myakulu. Panùdi numòna bintu byà mafi abi, nwavùluka ne, byòbi bivwa byenzela pa cyà cilelèlà aci. Nzambi ki màyì mfùki'a mukele wa bintu byònsò bìmpè, kàdi Sàtaanà ùtu ùtentula mapà awu. Èè, mèmè mushààle pa aci, katwàkubwela mu dileesònà dyètù nànsha, kì mmwòmò anyi?

⁵⁷ [Mwanèètù Ben Bryant ùdi wàmba ne: “Mwanèètù Branham, mfwilèku luse ànu bwà katanci kakesè cyanàànà?”—Muf.]

Èyowà's, mwanèètù.

[“Wamba ne? Ncìvwa mwab'ewu dyàlumingu dishààle to, kàdi mvwa mupete dipembu dyà cyùvwà wakula kùkaadi bu ndambù wa ngondo nàнку, nènku bivwa bimpèeshe lutàtu menemene, ànu byà menemene, kàdi mèmè kudyumvwa mwà kulwa bwà kukulondela bwalu abu ne kulondela Mwanèètù Neville. Kàdi mèmè kudyumvwa kàbidi ne uvwa mufwànyine kumanya ne mukàjàànyì ne mèmè tuvwa bacyènze cyena bwalu cyà disambila dyètù. Nènku mu dindà emu pàngààbwèdi mu tabernacle, ncìvwa mumanyè cìvwà cyenzèke to, nènku umwe wa ku bàna bèètù bàà mushinga mukolè kulwaye kùndi mu dindà emu ne kundòmba bwà kumufwila luse. Ne ndi ngèèla meeji ne aci cìvwa n'Nyumà wa bwena wa Kilistò.”]

Amen.

[“Nènku ndi ngèèla meeji ne mbwalu bwà luumù be bùdi mwanèètù awu mwenzè.”]

Èyowà's, mukalenge.

[“Yèyè kundomba bwà kumufwila luse, bwalu ùvwa ùteeta bwà. . . ùvwa—ùvwa ùteeta bwà kuntwadila dilongesha adi.”]

Èyowà.

[“Nènku ncivwa mufwànyine kucitaba to. Kàdi kundombaye bwà kumufwila luse mu dindà emu, ki mèmè kumufwila luse mu Dîna dya Yesù.”]

⁵⁸ Amen. Twasàkidila, Mwanèètù Ben Bryant. Mpindyewu, aci—aci’s ki mmenemene. . . Ndi ne disànkà bwà paùdì mwambe nàнку, Mwanèètù Ben. Nudi numòna’s, bwalu bantu abu mbanyungùlùke myaba yònsò bènda bàlongolola. Mpindyewu, aci’s ki bwena Kilistò bulelèlà. Aci’s ki bwena Kilistò mu cyenzedi. Paùdì mupìile, nda wìtabe ne udi mupìile. Nwamònu anyi? Juukila kuulu wāmbè ne: “Ndi mupìile, wamònu’s, mfwilèku luse.”

⁵⁹ Mpindyewu, muntu udi uteeta bwà kucisokoka awu, dîbà adi ùdi ne cintu kampànda cidìye munkaci mwà kubwikidija. To, mukalenge, ndi muswè. . . Bu ngàngabukà mukesè kaaba aka uvwa. . . Nwamònu’s, kèna mwà. . . Yèyè. . . Ncyàkwambakù aci bwèndè to, kàdi, twamb’eku twamb’eku, ùvwa ne kantu kampànda kàvwàye muswè kwenza, nudi bamanyè’s. Ki mèmè kwamba ne: “Kaa, to, Doc, kwèna mwà kupèesha Nzambi mbwejelu to.” Mèmè ne: “Kabyèna bikèngela kudyà mulembwe ne bundù to.” Ncyà bushùwà, amba bwalu ànu mùdibù amu. Mu bushùwà bwà bwalu, mukwènù kàvwà menemene mumanyè bwalu mu kuteeta kwà dyenza cintu cyà cibì to. Ùvwa ànu—ùvwa ànu ùdyàmbidila ne ncifwànyine kwikala mùshindù mwìmpè ùvwaye mwà kupeta cipese cyà buloba kampànda. Nènku kàvwà uteeta bwà kucyènza mu mùshindù mùbì to, ùvwa uteeta kucyènza mu mùshindù mujaalàme. Kàdi ùvwa ànu muswè bwà. . . Kwambaye ne: “Ndi. . .” Ùvwa mumanyè mùshindù kampànda ùvwaye mwà kucyunguluka, kufikisha muntu kampànda ku dyenza cintu kampànda cyà cifwànyine kutwàla bwenzeji pa muntu ewu lwà mwaba awu. Kùcyènji mùshindù awu to. Pàtukila wèwè ànu buludi patòòke. Nwamònu anyi? Shààla wèwè ànu ne Dìyi, nènku ushiishe kucipeta. Shààla wèwè ànu ne Dìyi! Nzambi wàkamubènesha ne kumwenzela cintu cinène. Èyowà’s, mukalenge.

⁶⁰ Èyo, twìnyikàayi mitù yètù mpindyewu bwà disambila. Mbanganyi bàdi baswè bwà kubavùluka mu disambila? Ndi mumanye inàbànzà kampànda udi musòmbe mwab’ewu mu kàkalù kàà balemà udi bushùwà mufwànyine kuswà bwà kumuvùluka mu disambila, ngèèla meeji. Ne mwanèètù wa bakàji udi apa ewu, bwònsò, pwekèshaayi bwònsò mèsù mu mwaba ewu. Mpindyewu, tulekelàayi byònsò mpindyewu bwà tudibwínke mu dikuukwila. Ki bwà cinyi tudi kaaba aka, bwà tusunsa makùmi àsàtù ne tutaanu, makumi ànaayi tùdi tùlondà etu, bwà dikuukwila.

⁶¹ Mpindyewu, Mukalenge, patùdì twanji kupùwa kumpàla Kwèbè apa, tudyùmvwa ne Yoshùwà wetù munène, Nyumà Mwîmpè, Mulombodi wetù wa kwà Nzambì wa ditùkù edi . . . bu mwàkapuwisha Yoshùwà cisàmbà kumpàla kwà Mòsà ne kwamba ne: “Tudi batàmbe ne bukolè bwà twètù kwangata buloba.” Bwalu kí mbeena Amàlèkà anyi beena Amòlà, bàvwaye ùtàngila nànsha, kàdi ùuvwa munkaci mwà kutàngila ku mulayi wà Nzambì ùvwa mufidiibwe kùdì Nzambì.

⁶² Nènku mu ditùkù edi dyà cimvundu ne mu ngiikàdilù udi buloba busanganyiibwamù ewu, ne pa dindà dyà nsabatu mulenga edi, tudi tushàala batùuje kumpàla Kwèbè, bwà kwamba munkaci mwà ditentula dyònsò, dipàlakaja dyà mubidi, mu bwikadi bwà bubì bwònsò ne nyumà mipàmbwishi, mùshindù mene utùdì batàngile ku Díyi dyà Nzambì ne twamba ne tudi batàmbe ne bacìmunyi’s! Nzambì wàkamba ne Yèyè neikale ne Èkèleeziyà wíkala kàyì katoba anyi kàyì mufudì mu Yèyè to, ne tudi bamanyè ne dîngà ditùkù netùmonè Èkèleeziyà awu. Nènku tudi tudyenzeja bu bidimba, biikale twitabuuja ne tudi bidimba byà disangisha dinène dilediibwe cyàkàbidi dyà Nzambì edi ne Èkèleeziyà udi pa buloba leelù ewu, tudi tuseemena ne dîsù dikolè kùdì Nzambì mu Dîna dyà Mukalenge Yesù.

⁶³ Nènku patùdì tulwa ne didipwekesha dyònsò apa, tudi tulòmba bwà Wèwè kufula mu meeji ètù ne myoyi yetù bintu byònsò byà pa buloba, ntàtu yònsò yà mwoyi ne tunyinganyinga, bwà ne Wèwè, Éyi Nzambì, wàtutèekaku mu ngiikàdilù wa dikuukwila, bwà twàmòna mwà kuKukuukwila mu dyumvwa dyà Díyi Dyèbè.

⁶⁴ Mpindyewu, bu Yone, mu dileesònà dyètù dyà mu dindà emu, mwàkadilàye bikolè bwalu kakùvwa muntu mukùmbànyine bwà kwangata Mukàndà to, ne mu myoyi yetù tudi bafwànyine kudila mwadi mu dindà emu, Mukalenge, bwalu kakwèna muntu nànsha umwe udi mukùmbànyine bwà kukàngula Mukàndà ewu to. Kàdi bu mùvwa kudila kwà Yone kwikala ànu kwà cipòòlù cikesè, dyàkàmwè wàkasàmbiibwa ne Mwànà wa mùkòòkò kulwa e kwangata Mukàndà awu; Éyi Mwànà wa mùkòòkò wa Nzambì, mu dindà emu, lwàkù wàngatè Mukàndà ne ùtùbuulwileWu, Mukalenge. Tudi baKwindile. Mu dipanga kukùmbana dyètù tudi bindile bwà kwikala . . . Tùkùmbànyineku ku Bwikadi Bwèbè ne Díyi Dyèbè.

⁶⁵ Byanza byàbúngì bìvwa byela kuulu Kùdì, Éyi Mwànà wa mùkòòkò wà Nzambì. Tudi bamanyè ne Wèwè udi mumanyè mwoyi wònsò, bwalu Wèwè uvwa mumanyè meeji àbò. Ne Wèwè udi Nzambì leelù ewu ànu Mùvwà kwònsò aku amu. Ne Utu misangu yònsò umwèumwè awu, bwalu Udi mupwàngàne ne kùyì mikàlu ne Kwena mwà kushintuluka nànsha. Nènku tudi tulòmba mu dindà emu bwà Wèwè kutùkumbajila, dilòmba dyà muntu ne muntu. Enzaku nànkù, Mukalenge, bwà biikalè mwà

kusànkishiibwa bwònsò pààpàtukàbo mu nzùbu emu, bwà ne bàakadi mu Bwikadi bwà Nzambi ne bìikala mwà kuya ne civwa myoyi yàbò yìjinga. Mukalenge, kupuku mwoyi bwà kungeela mu musùmbà awu, mèmè pàànyì. Bwalu ndi ndòmbà nùnkù mu Dìna dyà Yesù. Amen.

⁶⁶ Mpindyewu, tubuululààyaaku mu Mukàndà wètù mulenga, batèkemene bwà Mwànà wà mùkòòkò kutùkàngwilayè bitampì, anyì kutùkàngwilayè Mukàndà awu. Tùbuululààyaaku mpindyewu, tudi mu nshapità mwi5 wa Mukàndà wa *Bwàkabuulwibwà bwà Yesù Kìlistò*.

⁶⁷ Mpindyewu, ne kùdi balundà bàànyì bàdì mu bitùpà byònsò bishìilàngàne byà buloba bìikala bumvwila eci ku mukàbà wà mèyi mukwàta, emu nùnkù ndi mufwànyine kwamba ne ndi ne cyà kwakula patòòke malongesha ne bikwàbò bwà kwenza mukàbà ewu. Ne muntu kanà yònsò udi kàyì ne dilongesha kèna ne mudimu wa bwambi to. Pa nànkù wèwè wela meeji ne disangisha dyèbè kadyèna ne cyà kutèèleja mukàbà wà mèyi ewu to, nànkù kubeelèdiwu to. Kàdi ndi ànu munkacì mwà kwakula patòòke wanyì mmwènenenu wa nkààyanyì ne njiyà yànyì mèmè mwinè, dibuulula dyànyì sungasunga dyà Dìyì dyà Nzambi.

⁶⁸ Mpindyewu, kwènjiku ndambù wa ngondo tuvwa baalukile ne bafile nshindameenu wa . . . kukaadi ndambù wa matùkù's wè, èyo, tuvwa bayè ne baashìle nshindameenu pa nshapità mwi4, nshapità mwi3 too ne ku mwi4. Nènku mpindyewu, mu dyàlumingu dishààle, tuvwa bashìndàmijile pa nshapità mwi4 too ne ku mwi5. Nènku mpindyewu, leelù ewu, tudi baswè kushìndàmijila pa mwi5 bwà kwasa cishìmikidi bwà mwi6 ulwàlwa awu.

⁶⁹ Nènku leelù ewu kiipacila kàànyì nkàà kutèèka Mifùndu mu bulongame, bwà ne pàmwàpa mu cikondo cìlwalwà, ncyèna mumanyè ne neciikale dìbà kaayì to, kàdi bu Mukalenge mwà kulongolola, dìngà ditùkù bwà kwangata masangisha à matùkù mwandamutekète mu tabernacle pa *Bitampì Mwandamutekète*. Tuvwa bayiile Bikondo Mwandamutekète byà Èkèleeziyà, mpindyewu netwàngate malòòlò mwandamutekète bwà maalu masokoka mwandamutekète à bitampì mwandamutekète byà Nzambi, kukangula cìtampì dilòòlò dyònsò too ne mutwàfika ku Bitampì Mwandamutekète. Mpindyewu, ncyèna mumanyè ne ndìbà kaayì diikalà Mukalenge mwà kulongolola aci to, kàdi, Yèyè mulongolole, nentèèke ànu cishìmikidi cyàci mu dindà emu.

⁷⁰ Ne kupweka too ne ku mvensà yà ndekeelu yà eyi mifùn- . . . citùpà cidì apa eci, anyì citùpà cyà Mufùndu, netùtwalè *Mbingu Makumi Mwandamutekète Yà Danyèlè*. Nènku mbingu yisàtù yà ndekeelu, kuyiswikakaja ne Cyanga cyà Mpenta cidì citwàla cisàmbà ku yà ndeke- . . . bitampì byà ndekeelu, ne pashìishe kwikala basòmbè badìlongolole bwà Mwànà wa mùkòòkò kukangulayè bitampì.

71 Nènku, vùlukaayi ne, bitampì ncintu cìdì kaciyi cyumvwika to. Mukàndà ùvwa mutwà bitampì ne bivwa paanyimà, ùvwa ne bitampì mwandamutekète bivwà kabiyi mene bibuulula mu Mukàndà to. Bintu ebi kî mbifùnda mu Bible to. Kàdi, muntu yèyè muswè kufila dyumvwija dyàbì, dìdì ne cyà kupetangana ne bikwàbò byà mu Bible. Nènku, kaa, ndi mutwishiibwe ne nenùpetelèku dibènesha, anyi ndi ngèèla meeji ne nenùbèneshiibwe. Ndi ne dyeyemena dyà ne nenùbèneshiibwe.

72 Ndi muvwale ànu nkooci lùkàsà bwà kufika pa dîbà mwab'ewu mu dindà emu mupepèle, bwalu kùvwa... Mvwa musòmbe muntwamu, mbala, nènku Nyumà Mwimpè ùvwa ànu untunkumwina divwala kacya dyàmòngana ne bwimpè Bwèndè. Nènku mèmè... Pàngàmònu nànkù, mèmè kudyàmbidila ne: “Kaa, mèmè ànu mwà kucyàmba kuntu kwàka mùshindù Ùdì ucimpèèsha mwab'ewu emu, netùpicile bwònsò mu cikondo cyà bushùwà.” Kàdi, mu mùshindù kampànda, paùdì wimana kumpàlà kwà bantu, dîbà adi kwèna udyùmvwà mùtù udyùmvwà paùdì pàà nkààyebè mu disambila apu to, anyi cingà cintu.

73 Kàdi, mpindyewu, bwà kwalukila ku mvensà yà ntwadijilu, tudi tusangana ne... Mpindyewu, bwà kushindamijila patùvwà bashiile mu dyàlumingu dishààle, tudi tusangana kaaba aka ne Pòlò, lwà mu Efèsò 1:13 ne 14, mmutwàmbile ne tudi... tudi ne cyeyà cyà lupàndù lwètù, cyeyà cyà bupikudi bwètù. Bwalu Nyumà Mwimpè ngudi cyeyà cyà bupikudi bwètù. Nènku eci... Mbingu mikesè yàlonda yà dilongesha neyiikale yònsò mishindamijila pa bupikudi, nwamònu's, pa bupikudi, kî mpa dibingishiibwa nànsa. To... Ncishiindamijila pa bupikudi; kî mpa mu—mudimu wà butwàngaji wà dyakwilangana to, kàdi pa *bapikùdiiibwe*. Kaa, bumpyànyi bùvwà bujìmine anyi bujìmija kàdi bupikùdiiibwe butwàlujila cyàkàbidì, ne mùshindù wàkalwabì byònsò ne mwàkacilongolola Nzambì kumpàla mene kwà buloba kwikalaku, ne mùshindù ùdì Èkèleeziyà mwele lwongo mu bukùbi.

74 Ndi ngèèla meeji ne tudi bafike mu cikondo citùdì ne cyà kumanya pàà kwimanyina. Mmunyi mùdì mwà kwenza cintu kampànda paùdì kùyì ne diitabuuja mu cyùdì wenza aci? Bikèngela wikale ne diitabuuja. Nènku aci's ki kiipàcilà kàànyì mu dyenza dyà eci ne èkèleeziyà ewu, mbwà kupèèsha beena kwitabuuja diitabuuja ne dyeyemena mu cìdìbo bàtwa nyama ku mikolo, bwalu n'Diyi dyà Mukalenge. Nànkù awu bu mùdìbi bijaadikiibwe mu budishikaminyi bwònsò mu Mifundu kuumukila ku Genèsè too ne ku Bwàkabuulwibwà, mpàla ne nyimà, ne kuulu ne panshi, kakùyì mùshindù wà dyabulù kunyunga duntwamu mwaba nànsa ùmwè to, dîbà adi udi ne dyeyemena dipwàngàne, wamònu's, udi mumanyè mwaba wùdì mwimànyine.

75 Cintu cìmwècìmwè neciikale ne mwanèètù wa bakàjì udi mu

kàkalù kàà balèma ewu, anyi pàmwápa bakwàbò bàdi basaama ne ntátu. Bu nwènù mwà kupeta luumvu lupwàngàne lwà ne “ndijinga dímpè dyà Nzambi bwà kunùsàngeeja,” kakwènakù démons búngi bukùmbàne mu ditùnga yìdì mwà kukulama mubèèdì to. Nwamònu anyi? Ncyà bushùwà, paùdì umywa ne ndijinga dímpè dyà Nzambi bwà kukusàngeeja, ne Ûkaadi mumane kukwenzelaci, nènku udi umvwa dîbà adi mùshindù ùdì ne cyà kuya kenza cintu kampànda.

⁷⁶ Bìdì mùshindù ewu. Bu mèmè mukwambile ne mwoyi wànyì mujimà. . . Bu wèwè ne nzala ne ootoka naayi wamba kufwa, kàdì mwikale ne dyeyemena dinène kùndì bu muntu mwambi wa bulelèlè, ne mèmè mukwambile mwaba ùvwa cinunu cyà ndola cisanganyiibwa, mùshindù ùvwà mwà kufikakù, njila ùdì uyiila, mwaba menemene wà kuya, ne wèwè kumvwa menemene mwaba ùdì mfranga ayi yisanganyiibwa. Nwamònu anyi? Dîbà adi udi mufwànyine kutwàdija kusànka ànu dîbà adi mene, byenze ànu bu ne uvwa ne mfranga ayi, pìikalabi ne udi ungiitabuuja.

⁷⁷ Pa nàнку, nudi numòna’s, bangabanga mene ne wèwè kupeta. . . kudyumvwa mùshindù mushiilàngàne anyi ní ncinyi cikwàbò, udi mwà kwikala ànu ne disànka bwà dyondopiibwa dyèbè mu kwamba ne “udi mudìpetè,” bwalu udi mutwishiiibwe menemene ne udi mudìpetè, bwalu udi ne dyeyemena mu Ewu udi mukulayèdì awu. Nwamònu anyi? Nwamònu anyi? Dyeyemena dyèbè—dyèbè ndyà ne Yèyè kàtu mwà kushima to, ne Mmukwambile menemene mwaba ùvwadi disanganyiibwa, nènku dîbà adi udi—udi ne dyeyemena dyà ne newòndopiibwe, ukaadi humanè kudìpeta, bwalu aci ndiitabuuja dyèbè didi diikale cyeyà cyà bupikudi bwèbè.

⁷⁸ Mu ngaakwilù mukwàbò, udi uteeta bwà kupikudiibwa ku bubèèdì, ne diitabuuja dyèbè ke cintu cyà dilenga cyà cibènèshiiibwe aci. . . anyi, èyowa, ncyeyà cyà dyondopiibwa dyèbè. Pàdiku ànu cintu kampànda cyàmba mu mwoyi wèbè ne: “Ndi Mukalenge udi *ukwondopa*,” aci’s cidi ànu cimpè, s’ki cyònsò cidi cikukèngela aci. Aci’s. . . Kaa, udi mwà kutwadija ànu ne kusànka, nànsha ní ncinyi cyenzèke. Wèwè kùyi mudìpetè to, wèwè mulwe kutàmba kusaama, ucidi ànu ne disànka mùvwà kwònsò eku amu, mùvwà mwà kwikala naadi bu wèwè musàngale bipwàngàne, bwalu udi ne ditwishiibwa adi ne nkujikè. Mbanganyi bàdì buumvwa aci mpindyewu, leejàayibi cyanza cyènù. Ki bwalu abu’s. “Ndishindika dyà bintu bìdì kabiyi bimwèka to.”

⁷⁹ Mpindyewu, tudi tujandula dîbà adi ne ku ntwàdijilu wa nshapità ewu, ne tudi tusangana ne wakump-. . . nshapità mwi5 ncintu ciswikakaji, cidi—cidi—nswikidi wa mbongo udi ulamakaja citùpà cyà ndekeelu cyà cikondo cyà Èkèleeziyà, cyà nshapità mwi3. Nshapità mwi4 ùdì wàmba mwàkangaciibwa Yone mu Dyulu. Ne nshapità mwi5 ùdì ùlongolola bwà ebi. . . Mutùdì bayiile mu Bikondo Mwandamutekètè byà Èkèleeziyà,

pashiishe Yone kubàndishiibwa mu nshapità mwi4. Ne nshapità mwi5, ùdi ànu munkaci mwà kulongolola cyalu kaaba aka bwà dikàngula dyà Bitampì Mwandamutekète. Ànu bu mwàkenzàye mu nshapità wa 1 wa Bwàkabuulwibwà amu, ukàngula njila bwà Bikondo Mwandamutekète byà Èkèleeziyà (ki Yèyè awu mwimàne mu bitèèkedi byà myèndù byà ngòlo mwandamutekète abi, ne Yèyè ùdi ne mmwènekeli bu wa dibwe dyà Yaspà ne Sardwanà), ne Yèyè ùdi ùlongolola bwà Bikondo Mwandamutekète byà Èkèleeziyà abi.

⁸⁰ Mpindyewu Yèyè ùdi ùdìlongolola bwà dikàngula dyà Bitampì Mwandamutekète byà bupikudi abi. Nwamònu's, ki cidì nshapità mwi5 ncyòci aci. Ki bwà cinyi ndi ànu ncìbala cyanààna ne pashiishe kucyàngacila ànu mwaba awu, ne kwakulapu bwà kufila bitùpà bikwàbò byà Mifundu abi; mbwalu kì ncintu kampànda cidì munkaci mwà kwenzeka, ku mvensà ku mvensà to, cidì cilongolwela cintu kampànda bwà kwenzekaci. Nènku wèwè mufikè ku didìlongolola, dìbà adi udi ànu ne . . . udi mudìlongòlòle bwà cyòci aci dìbà adi. Nènku mùshindù awu ngùdibi ku diitabuuja anyi cintu cikwàbò kanà cyònsò. Mpindyewu, eci, bitampì . . .

⁸¹ Ndi ne ndambù wa Mifundu ne dyela dyà nseke ne bikwàbò bifunda mwaba ewu. Mpindyewu, mu Efèsò 1:13-14, tudi . . . bu nwènù baswè kucifunda, ne: “Tudi mpindyewu ne cyeyà. Nyumà Mwimpè ki cyeyà cyà bumpyànyì bwètù.” Mu ngaakwilù mukwàbò, Cidì ditwishiiibwa, *cyeyà* aci “nditwishiiibwa,” “citùpà cyà kumpàla cyà mushinga,” bwà ne tukaadi baakidila mu Kilistò. Nditèkemenà dibènèshiiibwe ne ditwishiiibwa dyà ne tudi bulelèlè ne Mwoyi wà Cyendèlèlè ne tudi bapyànyì bàà byònsò byàkatùsùmbilàYe abi. Kaa, ekèlekèlè! Nudi mwà kucimòna anyi?

⁸² Kaa, patwàkatwibwà citampì kùdì Nyumà Mwimpè (ndi ntungunuka ànu ne kucitèèla bwalu ncyèna muswè bwà kunùpitaci to), cintu's ncitampì cyà Nzambi cyà dyanyishiibwa dyà ne bintu byònsò byàkafwila Kilistò abi mbyètù. Nzambi ke udi wamba ne: “Ngàkwakididì mpindyewu, ne nènkupeèshe Citampì eci cyà ne udi ànu munkaci mwà kwindila cikondo aci,” ne ku bupikudi bwètù mu kaabujimà, nènku mbwena kwamba ne tukàadi bamanè kupikudiibwa mu citùpà.

⁸³ Bu mùmvwà mwàmbe dyàlumingu adi, ngèèla meeji ne mmwòmò, lwà kwinshì *eku* pa mulongo wa kwinshì ewu ke kùdì ngènzàmpèkààtù wèndela: mu bitoci, lupwishi, bukooya, manyaanu. Mpindyewu, yèyè . . . mbafwànyine kwikala bakezùke . . . bwòwa màyi paanyimà pàà mèbà ànaayi wònsò, mbafwànyine kulwàta bilàmbà byà bitàmbe bwimpè byà menemene, mbafwànyine kwikala bamanyi bàà mabàla bàà kapelu; kàdi mu musùukà wàbò amu, biikale ne bukooya ne manyaanù ànu mùdì bimanu bitote byà mu ifernò amu. Nwamònu anyi?

⁸⁴ Mpindyewu, mwena Kilistò ùdi wendela kumutù kwà cyôci aci, bwalu ùdi ne cyeyà cyà bumpyànyì bwètù lwà kuulu *eku*. Yêyè ukaavwa mwangùdiibwe, mupàtula mu manyaanu awu ne bukooya; lwà kuulu *eku*, nènku ùdi wendela kumutù kwàbi. Kaa, ntu munange aci's! Ànu mwàkamba Paul Rader musangu awu pa citùpà cyà mucì, nudi bamanyè's, wàkamba ne: "Ndi ngèndelapù! Ndi ànu munkaci mwà kwendelapù!" Ki mwaba ùdici awu mpindyewu:

Ditwìshiibwa dibènèshìibwe, Yesù ngwanyì mèmè!

Kaa, nkàadyosha kaayi kakesè (Mbanganyishile bwà kunwàku ndambu wa ku Mpokolo.) kàà butùmbi bwà Nzambi! Ndi mpindyewu mupyànyì wà lupàndù, ndi mumana kusùmbà kùdi Nzambi, Mulela kùdi Nyumà Wendè ne musukula mu Mashi Èndè.

Kabyèna bikemesha mùdici bwalu-bulonda bwànyì, mùdici musambu wànyì, Ngimba-ngimba butùmbi Bwèndè ditùkù dijimà.

⁸⁵ Nwamònu's, babàndishìibwe kumutù kwà mindìdimbi, bapàtula mu bucyafù, kàadyosha's! Tudi ne cyeyà mpindyewu cyà bumpyànyì bwètù bwònsò nkòong, bwalu Nzambi ukaadi mumanè kujoomona miji yà ku bintu byà pa buloba ne mutùkùne mu myaba yà muulu; muntùntùmùne, muntentèmùne, munshintùlùle ku bintu byà pa buloba; muumushe miji, matàmba, bintu byònsò, kàdi kuntùntumuna, kumpàtula mu bitoci byà diima, mumpàtùle mu bitoci byà kale byà mpèkaatù; kàdi kunkuna ku lusongo lwà Mukùnà wà Siyònà, musòmbè mu lupangu lwà micì yà bimuma lwà bananga bàànyì, Bansantu bàà Nzambi. Nènku mpindyewu tudi beena-mwàbò bàà Bukalenge abu, bânà bèètù bàà balùme ne bàà bakàjì mu Kilistò Yesù, bukooya bwònsò ne dikeji ne manyaanu byumùke mu meeji ètù. Mâyì ètù. . . mibidi yètù mmisukula ne màyì makezùke ne myoyi yètù mmimyamina Mashi à Mukalenge Yesù, ne Nyumà Mwîmpè mmusòmbè ne kaalupeepèlè Kèndè katalàle katuucila mu matàmba ètù ditùkù dyònsò dijimà, lùtùsàka ne lùtùsùkuma ne lùtùfikisha ku dyela miji mîmpè ne yìpweka yìyà mwinshì mule. Aci kî ncilenga anyì? "Cyeyà cyà lupàndù lwètù."

⁸⁶ Bumpyànyì bwètù bujimine, nshapità ewu ùdi ubùbuulula. Bumpyànyì bwètù bujimine abu bukaadi butùnanyina kùdi Cilongo cyètù Cipikudi cyà ngàsà, ne cyà mushinga mukolè. Mùshindù wàkapweka Nzambi ne kulwa. . . kushintulula bwàdi Bwèndè kuumuka ku Nzambi ne kuvwijiibwa muntu, bwà kwikala muntu, bwà kulwa Cilongo Cipikudi cyà muntu, bwà kupikwila bantu bàà mu bufùki aba bukwapanu. Amen! Mùshindù mwine wùvwà Nzambi (Mutàmbe-mfùkilu awu)

mulwà mu bufùki bwà kulwa Cilongo, bwalu Yèyè kàvwa mwà kukàndameena mikenji Yèndè Yèyè mwine to. Byàkakèngela bwà Yèyè kulwila ku dip-...bu cilongo cipikudi bwalu ki mùshindù ùvwaYe...ki ndongamu Wendè awu. Ke mùshindù wàkacyènzàYe awu.

⁸⁷ Nzambi mumanyè ne muntu neàdishinde, kàdi Yèyè kàvwa mwà kufikisha muntu ku didishinda to. Nzambi ùvwa mumanyè ne muntu ùvwa mwà kujimina, nànsha mùvwàYe kàyi muswè bwà ní nganyì ní nganyì àjiminè to. Kàdi bwà kwenza ne dileeejiibwa dinène dyà byambiibwà byà Nzambi kumònabi mwà kumweneshiibwa kùdi bantu bwònsò, bwà ne Yèyè ùvwa mwà kwikala Mupikudi, Yèyè ùvwa mwà kwikala Musùngidi, byàkakèngela bwà muntu kudishindayè. Cìvwa munda mwèndè bwà kudishinda, díbà adi cìvwa mu Nzambi bwà kumupikula cyàkàbidì. Ke cìdì cyèn-...bikèngela twikala ne cikondo cyà butùku, bwà twètù kusànka ne mundaamuunya. Bikèngela twikale ne disaama, bwà twètù kusànka ne bukolè bwà mubidi. Bintu byònsò, cìmpè ne cibì. Mpindyewu, ke cyètù Cilongo Cipikudi...

⁸⁸ Mpindyewu, ndi muswè bwà nùmonè kaaba aka. Ndi mutàngile buludi ku nshapità mwi5 ewu, pààkacitàngilàye ne: “Kùcìinyi to!” Mu mvensà mwi5 ne: “Kùcìinyi to!” Nwamònu’s, kùtu misangu yònsò...Kabyèna bikèngela wèwè kucingishiibwa ní mbwà bwalu kaayi to.

...umwe wa ku bakùlù wàkangambila ne: Kùdidi mwadi to: mòna, Ntambwe wa cisàmbà cyà Yudà, Muji wà Davidi, yèyè wàcìmunyi bwà kukangula mukàndà, ne kukùtulula bitampì byàwù mwandamutekète.

...nènku, mònaayi, tàngilàayi, mu...mònaayi, munkaci mwà nkwasa wa butùmbi ne...bifùkùibwa bìnaayi abi, ...munkaci mwà bakùlù, mùvwa mwimàne Mwànà wa mùkòòkò...

⁸⁹ “Mwànà wa mùkòòkò.” Bwà cinyi kàakamòna Mwànà wa mùkòòkò kumpàla? Mwànà wa mùkòòkò ùvwa musòmbe pa Nkwasa wa butùmbi wa Taatù, munkaci mwà—balami. Yone kàvwa mwà kumònamù, wàkamòna ànu bìnaayi abi biikale ne mitù...anyi bifùkùibwa bìnaayi abi biimàne mwaba awu, anyi Bakèlùbà bànaayi abu biimàne mwaba awu biikàle bàlama Mwaba wa Cijila. Ke twètù kucyàngata mu dyàlumingu dishààle, ne mu maleesònà makwàbò mwàmwa, bwà ne wàkamòna aci kàdi kàvwa mwà kumòna cìvwa dyàmwàmwa dyàci to. Nènku mwómò amu, dyàkàmwè, kumwekamù...ànu byà kabiyi byumvwika to, mu cità ne cità, muvwa Umwèpelè, Mwànà wa mùkòòkò.

⁹⁰ Mpindyewu, bwà kuleeja ne Kàvwa nyama anyi mwànà wa mùkòòkò wa mu bufùki ewu to, bwalu Wàkangata Mukàndà mu cyanza cyà dyàbalumè cyà Ewu uvwa musòmbe pa Nkwasa wa

butùmbi; mwânà wa mùkòòkò awu kàvwa mwà kwenza nàнку to, nwamònu's. Ùvwa—Ùvwa—Ùvwa Mwânà wa mùkòòkò, ùvwa n'Kilistò. Mu ngaakwilù mukwàbò, mu byambiibwà Byèndè Ùvwa mupolè ne wa kalolo bu mwânà wa mùkòòkò.

⁹¹ Mpindyewu, mònaayi, ùvwa m'Mwânà wa mùkòòkò Mupikudi, Mwânà wa mùkòòkò Mupikudi ànu bu wà kumpàla awu. Nzambi kàtu mwà kushintulukaku to! Amen! Mupikudi wa kumpàla ùvwa mwânà wa mùkòòkò, mu budimi bwà Èdenà, ùvwa m'mwânà wa mùkòòkò wakafila Nzambi. Nènku's ki cyòci eci cyàkàbìdì, too ne mu Bwàkabuulwibwà, m'Mwânà wa mùkòòkò cyàkàbìdì. Bwà kupikula cinyi? Ngiikàdìlù mudishinde ne bumpyanyi budishinde bwà cisàmà cidishinde. Mwânà wa mùkòòkò ùdi wàlukila bwà kupikula, mwà bwena mùvwà wètù ku cibangidilu, bwà kutùpikula.

⁹² Bwà kupikula cinyi? CidiYe ùtùpikwila ncinyi? Bwà kukòsa . . . kucitwàla ku . . . Cintu cyònsò cìdìbo bàpikula ncintu kampànda cìvwà cijimìne. Ncintu kampànda cìvwà cijimìne ne pashiishe cyalujilula cyàkàbìdì. CidiYe mutwalujile ncinyi, Mwânà wa mùkòòkò ewu? Cyònsò citùvwà naaci ku cibangidilu aci.

⁹³ Citùvwà naaci ku cibangidilu ncinyi? Mwoyi wà Cyendèlèlè. Twètù tuvwa bapyanyi bàà buloba. Tuvwa ne Mwoyi, katùvwakù ne cyà kufwà nànsha. Katùvwakù ne cyà kwikala tusaama to. Katùvwakù ne cyà kukùlakaja to. Katùvwakù ne tunyinganyinga nànsha. Kùdì kakùyì byà dyenza dyà madilu, kakùyì nkità, kakùyì bubì, kakùyì lufù, kakùyì mvyà, kakùyì makaaya makòbàme, kakùyì byà madilu, kakùyì myadi to. Twakadi ne Mwoyi, wà Cyendèlèlè! Twakadi ne bukòòkeshi pa buloba bujimà. Tuvwa ànu kaanzambi kakesè (kwajiki) pa buloba; tutwà eku ne eku, nènku bu mucì ewu kawùyì mwenze bu mwimàne mwaba mwimpè to, tuvwa bafwànyine kwamba ne: “Joomòka apa ukasòmbelè lwà mwab'ewu,” ne ùvwa ùcyenza. Mpeepèlè yòyi yituuta, katùyì baswè bwà mpeepèlè kutuuta to: “Ditalala, pùwa,” ne cyùmba cyènzeka. Kàdì cyàkalwàYe kwenza ncinyi? Bwà kupikula byònsò abi ne kutwàlujilabi cyàkàbìdì (Kaa, kaa, kaa, kaa, kaa, ekèlekèle!), kupetulula byònsò abi cyàkàbìdì.

⁹⁴ Kàdì mpindyewu bufùki mu bòbù bwinè bùdì munkaci mwà kupumà, bwindile cinyi? Dimwèneshiibwa dyà bàna bàà Nzambi, bwà bàna bàà Nzambi kumwèneshiibwabò.

⁹⁵ Nènku tudi ne cyeyà cyà lupàndù lwètù mpindyewu, ne tudi mwà kwangata mwanèètù udi upùnga ne lufù ne kànsèrè, ne kwimana ne kaamupuuyakeenu kakesè kàà bupikudi aku, kàdì kumusambila disambila dyà diitabuuja diikala mwà kwaluja muntu udi mushàale lwànyana kalùfù awu ku muntu wa mubidi tumatuma cyàkàbìdì; citwènza ncinyi pààlwà bumpyanyi bwètù bwònsò mu kaabuujimà? Amen!

96 Bufùki mbumanyè aci. Bufùki ke kupumabù eku ne twètù tupuma naabù pàmwè. Bufùki bùdi munkaci mwà kwindila dimwèneshiibwa dyà bânà bàà Nzambi, bwalu bufùki bwàkeedibwa mulawu pàmwè ne mfùmwbàbù. Pàakeediibwa mfùmwbàbù mulawu (wa milongo yà kuulu), ke bufùki kudishindabù pàmwè ne mfùmwbàbù. Kàdi pàakalwa Cilongo Cipikudi eci (Àlèluuyàh!) ke kupikulayè kàbìdi muntu udi mfùmù mutàngidi wa bufùki awu's. Mpindyewu bufùki bwònsò bùdi munkaci mwà kwindila muntu, mfùmù awu.

97 Ncinyi citùdi twenza? Tutwa cisuuyi byanza kàdi kumòngana ne dikosolola dyà mucì patùdi baswè; kàdi ditùkù adi katwàdyàkwenza nànkù to. Amen!

98 Bufùki bwònsò mbwindile mfùmwbàbù. Ne mfùmwbàbù ke bânà bàà Nzambi bàakapèeshabo buloba ebu abo. Mpindyewu, Nzambi neyikalè ne maulu Èndè, mu bushùwà bwà bwalu, kàdi eci cyàkafidiibwa kùdi muntu. Nènku Cilongo Cipikudi wàkalwa bwà kutùpikula kutwàluja ku citwàkadi bajìmiije. Mùshindù mene ùdibi bilenga's wè! Ekelekèlè! Ndi ànu ngèla meeji ne aci cidi. . . "Mwânà wa mùkòkò Mupikudi."

99 Pààjikà mudimu, netwikale kàbìdi ne bintu byònsò. Bintu byònsò byà mùshindù kaayi? Tudi ne bukolè bwònsò. Netwikale ne Mwoyi wà Cyendèlèlè. Netwikale ne bukolè bwà mubidi bwà Cyendèlèlè. Netwikale ne bunsongà bwà Cyendèlèlè. Netwikale ne bukolè bwà Cyendèlèlè. Kaa, twètù's tudi ànu bàà Cyendèlèlè ne wa Cyendèlèlè! Nènku, dîbà adi, tudi bwònsò bindile cikondo aci bwà kulwaci, bindile ne tutwà mikèmu, bindile.

100 Nènku Mukàndà muvùnga misangu mwandamutekète wà ndongamu yà bupikudi mwandamutekète ewu mbatùtwàdilewù, ne ke cìvwà Mukàndà ewu mulame. Mpindyewu, netùbwelè mu nshapìtà wa 10 mùdi Mwanjèlò wa dikàndà ewu wàmba patòoke cintu kampànda ne. . . ne Yèyè ùvwà ne Mukàndà mukèsè wùvwà Yone ne cyà kudyà awu. Ne pàakawùdyaye, kuwùbweja munda mwèndè ùvwà ne bululu, kàdi ùvwà mushèeme mukana mwèndè.

101 Pàdibi bìkèngela bwà cifù cyèbè kuWùpela, dîbà adi ùdi ùlwa ne bululu, bantu bwònsò bàdi bàkubènga, bantu bwònsò bàmba ne "Wèwè udi munsantu mubùnguluki wa mu malaba, udi *cikampànda*, *cikansanga*, anyi *cikankènga*." Nwamònu anyi? "Udi—udi—udi ne lungenyi lukupàtùke." Nànkù awu mbikolè bwà wèwè kuCìmina; kàdi paùdi ufila bujaadiki bwà Butùmbi Bwèndè, Mbishèeme mukana mwèbè amu. Kwajiki. Nwamònu anyi? Nènku paùdi wimana mu disangisha kampànda, wamba ne: "Butùmbi kùdi Nzambi's wè! Àlè- . . ." Kaa, paùdi upìcila mu ngiikàdilù wa dicìncimikiibwa dinène adi, mbikolè; kàdi pashùshe paùdi upatuka mu ngiikàdilù wa dicìncimikiibwa dinène adi udi mwà kucifidila bujaadiki, dîbà adi Mbishèeme

mukana. Nwamònu anyi? Ncyà bushùwà. Aci's ki Mukàndà wa bupikudi ewu.

¹⁰² Mpindyewu, mpindyewu, tudi baswè kufila kaacifwànyikijilu kakesè mu mvensà mwi5 emu, ne pashiishe netùtwàdijile lwà mu...twàngate mvensà wetù mwi6 ne kubangilapù. Mpindyewu, ndi muswè bwà nwènù kumòna mu ndongamu wa bupikudi amu mùshindù wàkadyànjlà Nzambì kucileeja mu mundidimbì, Wàkacileeja mu cyôci menemene mu Luuta ne Boàzà. Mémè...Ki mwaba awu wutùvwà bajikijile dyàlumingu dishààle. Mpindyewu, ndi muswè kubangila ànu mwaba awu mpindyewu, leelù ewu, pa Luutà ne Boàzà.

¹⁰³ Mpindyewu, kùdi biikishilu binaayi, anyi, ntwàngéenu yinaayi mu Luutà ne Boàzà. Wa kumpàla n'Luutà *ùpàngadika*. Mbanganyi bàkaadiku bumvwe...mémè nyiisha diyiisha adi? Tumònaayi byanza byènù. Ndi mumanyè...Èè, nwènù bwònsò, ngèèla meeji. Ndi naaci mwab'ewu, ne mvwa naaci pa mikàbà yà mèyi ne bikwàbò. Luutà, dyàmbedi, byàkakèngela bwà *kupàngadikayè* anyi ùvwa ne cyà kuya mu buloba ebu, anyi to, pàmwè ne Naòmì. Byàkakèngela bwà kwangatayè dipàngadika. Pashiishe paanyimà yèyè mumanè kufika kuntwaku, cintu cyàkalonda cìvwà cikèngelàye kwenza cìvwà *kukwàta mudimu* mu budimi bwà Boàzà; kuntwaku, ku makàsà kutupù, ùpùmbulula paanyimà pàà banowi, munkaci mwà kukwàta mudimu. Nènku pashiishe paanyimà pàà yèyè mumanè kupeta luse ku mèsù kwà Boàzà, dìbà adi byàkakèngela bwà *kwindilayè* too ne pàvwa Boàzà wènza mushingà wà bu cilongo cipikudi, bwà kwangatulula byònsò byàkajimija Naòmì bwà wàmòna mwà kwangacilaku Luutà mwena Moàbà. Nènku pashiishe citùpà cìdì cilònda, ncyà—ncyà Luutà *mufucìibwè*.

Mpindyewu, tàngilàayi. Luutà, *ùpàngadika*, menemene... .

¹⁰⁴ Kaa, muntu kanà yònsò udi wamba ne “Bible awu kí mmusonsodiibwe to,” kùdi cintu kàmpànda cipampàlamùke kùdiyè. Dìyi Dyèndè dyònsò ndisonsodiibwe, Dìyi Dyèndè dyònsò didi dinwàngana pàmwè ànu bu mùdi mibàngubangu mipunga yibwela mu—mu—mu mpungà yà dibaya. Didi dipetangana menemene pàmwè bu mùdi masosò à nshenè anyùngulukila pa scie wa dikàndà, ànu mu lubilu lwà kapwishipwishi kàà mùlìyò kàà kasunsukila kàà kasunsa, ànu menemene nànkù.

¹⁰⁵ Mpindyewu, mònaayi mu eci mpindyewu, Luutà, *ùpàngadika*, byàkakèngela bwà kwangatayè dipàngadika dyà ne anyi neàngate dipàngadika dyà kuya kuntwaku anyi to. Bìvwa bikèngela bwà kwangatayè dipàngadika. Mpindyewu, mùshindù awu ngudi mwena kwitabuuja yònsò ne cyà kwenza. Bìkèngela bwà wèwè kulekela biibidilu byèbè byà kale, bikèngela bwà wèwè kulekela nsòmbelu webè wa kale, bikèngela ùlekelè bintu byà kale—byà kale byà maalu à pa buloba.

106 Mwanèètù Roy, Mwanèètù wa bakàji Roberson ùvwa usaama anyi? Kaa, mvwa ànu ndyambidila ne pàmwápa ùvwa usaama anyi cintu kampànda. Nkaavwa nswa kwamba ne bandaayi nendè kuneeku bu ne ùvwa ùsaama anyi cintu kampànda.

107 Bàvwa ne cyà kulekela biibidilu byà kale byà nsòmbelu, anyi cikampànda cyà bwena aci, ne—ne kusabuka kubwela mu buloba bupyabùpyà, ne cisàmbà cipyacìpyà cyúvwaku kacya kùyi mumanyè kwónsò eku to. Ki cyúdi mwenze aci, bwà wèwè kulwa mwena Kilistò anyi? Wèwè kulekela diya dyà ku ciinà cyà mâyi, wèwè kulekela diya dyà mu bar. Byàkakukèngela bwà wèwè kubwela mu musùmbà wà bantu bàvwa bàmwèka bu bàdi ne katombotombò, bàvwa bakanka ne banyukuka ne bèèla mbila, ne banyukusha mutù wàbò ne batumpika muulu ne panshi, ne, mòna's—mòna's, cìvwa—cìvwa mu—mu—“musùmbà wà bapàlè” bwèbè wèwè. Ki kukèngelabi bwà wèwè kwangata dipàngadika ne anyi uvwa mufwànyine kuya anyi to. Ncyà bushùwà. Ne uvwa mumanyè pawàkenza nàнку, cisàmbà cyènú sungasunga cìvwa ne cyà kukuseka, baùvwà mulekele abu. Mmwómò anyi? Abi's bidi bidyènzekela ànu nkààyabi. Udi ànu. . . bàvwa ne cyà kutekemeni abi ànu kuntwàdijilu, bwalu ke mùshindù ùtùbi.

108 Mpindyewu, Luutà ùvwa ne cintu cimwècimwè aci. Ncinyi cìvwa beena Moàbà bafwànyine kumwambila pàakasabukàye bwà kuya ku Izalèlèlè, kùdi musùmbà wà bakoleshi bàà maalu? Nwamònu's, byàkakèngela bwà kwangatayè dipàngadika. Ùvwa ne cyà kwangata dipàngadika. Nèнку nudi ne cyà kwangata dipàngadika. Nèнку, ndekeelu wa byónsò, pàakamanàye kwangata dipàngadika dyèndè, wàkabwela mu—mu buloba bupyabùpyà mwamwa.

109 Mpindyewu, ki dibingishiibwa ndyòdi adi. Ncyà bushùwà anyi? Mpindyewu, tàngilàayi Èkèleeziyà ewu. Kaa, s'mbipwàngàne.

110 Nudi bamanyè mutùdi. . . Mbanganyi bèènú bàvwa bumvwe *Diminu dyà Abraham* pangàakayiisha pa bwalu abu? Mùshindù wà *dibingishiibwa, dijidiibwa, dibàtiiza* dyà Nyumà Mwîmpè. Mpindyewu, mònaayi eci ní ncilelèlè anyi cyà mafi.

111 Luutà, wàngata *dipàngadika* dyèndè, cìfwànyikijilu cyà Èkèleeziyà, Èkèleeziyà wa bàà Bisàmbà byà bendè. Wàkwangata dipàngadika, ne kusabukayè kubwela mu buloba abu. Mpindyewu, misangu yàbùngi, twètù ba-Méthodistes ne ba-Baptistes, tudì twela meeji ne ki cyónsò cìdi cìkèngelà bwà nwènú kwenza. Ùcìvwa ànu ùbangilakù! Kàvwa mwanji kufika mwaba nànsha ùmwè to, ùcìvwa ànu ùbwelelakù mu buloba amu.

112 Mpindyewu, cintu cyàkalonda cìvwàye ne cyà kwenza, ùvwa ne cyà *kukwàta mudimu*. Kushààlayè mwena ne ànu mikenji. Ùvwa ne cyà “kukwàta mudimu bwà lupàndù lwèndè

sungasunga ne bwôwà ne luzakalu” bu munwàkenza amu. Wàkabwela mu budimi ne kuvwala bilàmbà byèndè, ne kupatuka kubwela mu budimi ne kupùmbulula paanyimà pàà basadidi bakàji bwà wàmòna mwà kupetakù cyàkudyà cyà cibàkwacisha bwà ditùkù adi. Ncyà bushùwà anyi? Cìvwaye munkaci mwà kwenza aci ncinyi? Úvwà uteeta bwà kupeta luse kùdi Boàzà. Ki kudìsebelaye njila mu citùpà cyà bwena ne ànu mikenji.

¹¹³ Nènku aci’s ke cyàkenza Èkèleeziyà menemene. Beena Luther bàakaCìitabuujiila ku diitabuuja ne kubwelabo mu buloba. Kàdi ba-Méthodistes bààkalongesha dijidiibwa, cìvwa ciikale mmwènenu wa cyena ne ànu mikenji wa Cyôci aci, nwamònu’s: “Bikèngela wènzè cintu kampànda.” “Bikèngela ndekelè! Bikèngela ndekelè nsuki yànyi yileepè,” mùdi bakàji bàmba. Mu bushùwà bwà bwalu, kabèena bàcyenza kàbidi to; kàdi bwôbò—bwôbò bàakacyèenza bulelèlè, kulekela nsuki yàbò kuleepayi. Byakakèngela bwà bwôbò kulekela dilaaba dyà tupenta kwìsù kwàbò. Kabàvwa bavwala yàb—yàbò jipè bibi ne—ne, anyi, mipi mùvwà bakwàbò benza amu to. Byakakèngela bwà kwenzabò cintu kampànda. Nwamònu anyi? Ki cyàkenzàye ncyôci aci, ku citùpà cyà dibingishiibwa, citùpà cyà dijidiibwa.

¹¹⁴ Mpindyewu, ndekeelu wa byònsò pàakapètaye luse kùdi Boàzà, cyàkenzeka ncinyi? Ki Naòmì kumwambilaye ne: “Wèwè *indila* kaaba aka pàdi Boàzà wenza mudimu wà cilongo cipikudi cyà mu disù apu, bwalu ànu yèyè ke udi mwà kucyèenza. Yèyè ke cyètù cilongo cipikudi cyà mu dísù, nènku indilà wèwè ànu kaaba aka. Kùyì kàbidi mu budimi to. Kwenji *cikampànda*, *cikansanga*, anyi *bukèngela* to. Wèwè indilà ànu too ne piikala mushingà wà bu cilongo cipikudi mwà kukùmbajiiibwa.” Ki *kwikishayè*. Amen!

¹¹⁵ Aku’s ke kwafikìdi Èkèleeziyà menemene mu citùpà cyà ndekeelu cyà Mpenta eci. Nwamònu anyi? Ku ntwàdijilu wa Mpenta bàakakwàta bwònsò mudimu ne “bàvwa ne cyà kwenza *cikampànda*,” ne kubànyukushabò ne bikwàbò byònsò. Mpindyewu Èkèleeziyà ùdi munkaci mwà kwenza cinyi? Èkèleeziyà mulèlèlè ùdi munkaci mwà *kwikisha*. Diikisha ncinyi? Ki cyôci eci, Diikisha didi “Nyumà Mwîmpè,” ditùkù dyà *nsabatu*. (Ba-Adventistes du Septième jour mbaswè kutwàmbila, nudi bamanyè’s, bwà cidi nsabatu wa ditùkù dyà mwandamutekète anyi cintu bu nàнку awu.) Mu Ebèlù nshapità mwi4, mbambe ne: “Twètù bàdi babwelè mu *Diikisha* Dyèndè twakalekela midimu yètù bu mwàkalekela Nzambi Yèndè.” Pa nàнку *nsabatu* n’Nyumà Mwîmpè.

¹¹⁶ Nènku pàvwa Lutà munkaci mwà *kwikisha*, cìvwa cimfwànyi cyà Èkèleeziyà munkaci mwà kwikisha mu milayi yà Nzambi’s! Tudi mpindyewu ne cyeyà cyà lupàndù lwètù. Katwèna tutàcisha lungènyi bwà ne tuyààya kuntwaku anyi katwèna tuya to, tuyààya! Ncyà bushùwà. Nzambi ngudi

mwâmbè nânku's! Nzambì ngwakacilaya ne tudi ne cyeyà (Amen.), bàakidiibwe bulelèlè, Kilstò mmutwitàbè. Kakwèna mùshindù wà kuumukaKù mpindyewu nànsha, tukààdimù! Amen! Cyònsò citùdì ne cyà kwenza cìdì ànu kwindila too ne . . . KwangataYè . . . Ûdi kuntwaku munkaci mwà kwenza mushingà wà bu Cilongo Cipikudi. Tudi ne cyeyà cyàcì mpindyewu mene, bindìle cikondo cìdìYè wàlukila.

Ne pashiishe ncintu kaayi cyàkalonda civwa Luità, Luità ùvwa *mufucibwe*.

117 Ki cyàkenzà Èkèleeziyà ncyôcì aci. Wàkabwela mu dibingishiibwa, mu cikondo cyà Luther. Wàkabwela mu dijidiibwa, mu cikondo cyà Wesley. Kubwela mu dibàtiiza dyà Nyumà Mwimpè, mu matùkù à ndekeelu aa. Nèku mpindyewu munkaci mwà *kwikisha* ne cyeyà cyà bumpyànyì bwètù bu mutùdì bamanyè ne cintu kampànda ncyenzèke mu twètù, tudi buumuke ku lufù bayè ku Mwoyi, ne munkaci mwà kwindila, tutwà mikèmu pàmwè ne bufùki, bwà ne mu cikondo citwàpeta Mwoyi wà kawùyì ùfwa awu, cyuwidi cyà kaciyì cìfwa; mibidi yètù neyìikale mipikùdiibwe. Byònsò mbipikùdiibwe, ne tudi ànu munkaci mwà kwindila bwà Yèyè kwalukidila ku ciibi. Amen!

118 Dìbà adi ncinyì? Luità ùvwa *mufucùibwe*. Ke dìbà ditwikala bafucùibwe adi. Ke cìdì Mukàndà mukanga ne bitampì mwandamutekète ewu ùtùbuulwila aci. Bintu ebi mbinganyì? Mmaalù masokoka. Kì mmáfùnda mu Dìyì to, bikèngela àbuuludìbwè kùdì Nyumà Mwimpè; kàdì bu nwènù mwà kumòna, mu bushùwà bwà bwalu, mmabuuludìbwe mund mwà Mifùndu mwònsò kàdì mmasokoka bantu. Patwàfika ku mukàndà muvùnga paanyimà pàà katancì, nenùmòne muvwàbi bilongolola, dìbà adi nenùmanye ànu mùshindù ùdì maalù awu àkàngudiibwa.

119 Mpindyewu, èyowà, *wikisha*. Cìvwà Luità mu dibingishiibwa. . . Nudi nucimòna anyì, ambààyi ne: "Amen." [Disangisha dìdì dyàmbe ne: "Amen."—Muf.] Luità mu dijidiibwa, *ùkwata mudimu*, mwena ne ànu mikenji. Luità, *wikisha*, munkaci mwà kwindila Boàzà bwà kuumuka ku mudimu mujikija.

120 Mpindyewu, wetù Boàzà wàkajikija mudimu ku Kàlvariyo. Kàdì bangabanga ne kulwaYè kuya neetù Kwèndè Kumbèlu, Ûdi ùya dyàmbedi Kumbèlu (mu Yone 14) bwà kutùlongolwela mwaba. Butùmbi's wè!

Myoyi yènù *kayilubakanyi to*: pìikalabi ne nudi *bitàbùùje Nzambì, ngiitàbùùjaayi ne mèmè kàbidì*.

Mu nzùbu wa Taatù wanyì mùdi bisòmbedi byàbùngì: bu byòbì kabiyì nânku, mwà mwà kwikala munwambile. Kàdì Mèmè nènnyè bwà kunulongolwela mwaba.

Ne . . . ngàalukila kàbidi, bwà *kunwàngata* . . .

¹²¹ Nwamònu's, Boàzà ùtuuluka, cyàkenzaye ncinyi? Wàkatùuluka, kwimana . . . kwangata bakùlù kàdi kuya kumpàla kwa ciibi, kukopola cisàbaatà cyèndè, ne kwamba ne: "Leelù ewu bimanyike ne ndi mpikula Naòmi ne bumpyànyi bwèndè bwònsò." Kwangacilaku mwena Moàbà awu.

¹²² Nènkù pààkalwa Yesù, nganyì wàkalwaYe bwà kupikula? Izàlèèlà. CyàkenzàYe ncinyi mu dyangata dyà Izàlèèlà? Wàkapetelaku Mukàjì-musèla wa Bisàmbà byà bendè. Bushùwà, ncyàkenzàYe, pààkangataYe Izàlèèlà. KuyaYe . . . Ne Wàkaya kùdi Bèndè Mene, Úvwa ne cyà kuyaku. Cintu cyà kumpàla cìvwàYe ne cyà kwenza ncinyi? Kupikula Bèndè Yèyè. Ne Èkèleeziyà wa bàà Bisàmbà byà bendè ùdi ànu mwanààbù wa bakàjì ne mukàjì awu, èkèleeziyà wa Izàlèèlà. Cyà bushùwà's! Pa nànkù byàkakèngela bwà Yèyè kupikula Izàlèèlà bwà kupeta *Ewu* nùnkù. Nènkù byàkakèngela bwà kupikulayè Naòmi bwà kupeta Luutà, mukàjì-musèla wèndè.

¹²³ Mpindyewu, cyàkenzàye ncinyi? Kumpàla kwà kumònayè mwà kumwàngata . . . Kaa, butùmbi's wè! Yoyòyò! Ncinyi cyàkenzàye? Wàkapatuka kuya mu budimi, ngèèla meeji ne wàkalaba mpenci ku bintu byònsò ne kwelulula tàpis mipyamipyà panshi pàà nzùbu apu. Kaa, yèyè—yèyè's ùvwa mufwànyine kwikala mwibàke nzùbu mupyamùpyà. (Mu bwalu bwètù twètù, n'Nzùbu mupyamùpyà.) Ne kulongololaye bintu byònsò, ne pashiishe kwalukilaye muvwale nkoletà bwà dibàkà. Amen!

¹²⁴ Ncinyi cìvwa Luutà wènza? Cintu nànsha cìmwè. Mwikìshe! Mwindile! Byà midimu mikolè kabìciyikù, byà dilubakana kabìciyikù!

¹²⁵ "Nebikèngele bwà ngiikale Méthodiste anyi? Nebikèngele bwà nkashààle wa mu ba-Baptistes anyi? Nebikèngele bwà ngiikale Presbytérien anyi?" To, mukalenge, peta wèwè ànu Nyumà Mwimpè wìkishè. [Katùpà kàà mukàbà wà mèyì munda mutupù—Muf.]

Tudi bindile dilwa dyà ditùkù dyà disànkà dyà Bukalenge bwà bidimu cinunu adi, (Butùmbi's wè!)

Pààlwà Mukalenge wetù mubènèshìibwe bwà kuya ne Mukàj'Endè-musèla udi mwindile; Kaa! Buloba bùtwatwa mikèmu, bwela mbilà bwà ditùkù dyà dilekelediibwa mu kalolo adi.

Cyònsò aci, bufùki bùdi munkaci mwà kutwà mikèmu, mabèji à mfigì, bintu byònsò mbindile ditùkù dyà dilekelediibwa dibènèshìibwe adi, dyàlukila Cilongo Cipikudi cyà mu disù bwà kwangata Mukàj'Endè-musèla.

126 Mpindyewu Yèyè ùdi munkaci mwà kwikisha. Mu dijidiibwa anyi? To. Mu dibingishiibwa anyi? To. Kàdi mmu byònsò *dibingishiibwa, dijidiibwa*, ne kubwela mu *diikisha*.

127 Mpindyewu, Yeshààyi, nshapìtà wa 28 ku mvensà wa 18, Ùdi wàmba ne:

... kanungu kàdi ne cyà kwikala pa kanugnu, ... mulongo pa mulongo, ... ndambù apa, ne ndambù pàpa: shààlaayi bakwàte ndendende ku cidì cìmpè.

Bwalu ku mishiku yìdi yikukuminà ne mu myakulu mikwàbò mmùngààkulà mémè ne bantu aba.

... Nènku ke dikisha edi, ke Nsabatu ewu, ke dîbà dîdi Èkèleeziyà ùdìtwa mu dindila edi.

128 Tàngilàayi mutùdi bapicile ànu mu dibingishiibwa, dijidiibwa, mpindyewu badìtwe mu dibàtiiza dyà Nyumà Mwìmpè: munkaci mwà kwikisha, munkaci mwà kwindila. Ncinyi aci? Nènku mpindyewu, mpindyewu, patwàfikà ku mabuulula aa nenùmonè ne ncinyi mpindyewu. Nwamònu anyi? Mùshindù mwinè wùvwàbi ànu. . . Bintu ebi kabìvwakù mwà kulongeshiibwa too ne ku ditùkù edi nànsha. To, kabìvwa mwà kulongeshiibwa to. Kabìvwa bikàngwila bânà bàà bantu to. Bible ngudi mwambè nànkù. Ndi mwà kunuleeja mwab'ewu mu Mifùndu mùdìbi byamba ne kabìvwa mwà kukangudiibwa to too ne (bânà bàà bantu), too ne ku ditùkù edi. Nènku mpindyewu tukàadi tujikija bintu binène bibènèshiibwè ebi. Mpindyewu. . . Eyo.

129 Mvensà mwi6. . . Anyi citùpà cyà ku mvensà mwi5, mukùlù mu mvensà mwi5 ùvwa mubingè pàakambàye ne: “Mònaayi, Mwànà wa mùkòòkò!” Kàdi, pàakakenzakanàye, wàkamòna Ntambwe. Ùvwa Ntambwe pamutù pàà kwikalayè Mwànà wa mùkòòkò. Kàdi dîbà adi cìvwa ncinyi? Mudimu wèndè wa butwàngaji mujikè, wà butwàngaji. Ùvwa. . . kulekela kwikala Mutwàngaji ku ndekeelu kwà cikondo cyà Èkèleeziyà, bwà kulwa Ntambwe wa cisàmbà cyà Yudà, mudimu Wèndè wà butwàngaji mujikè. Ne Yèyè ùvwa ne cyà kulwa Ntambwe uvwa Mulumbulwishi, mpindyewu, ne Yèyè wàkangata, pàakangatàYe Mukàndà mu cyanza apu.

130 Mpindyewu, vùlukàayi ne, pàvwà muntu ùya bwà kupikula, kanùcìpu mwoyi mpindyewu to, pàvwa muntu ùya bwà kupikula, ùvwa ùya ne bantu ne baya ku biibi byà cimenga, bàà bwalu abu bakùlù, ne kwòkò aku ùvwa—ùvwa—ùvwa ùmanyisha kendèlà kèndè kuntwaku. Kì cyàkenzaye, wàkaya ku ciibi, kwamba ne: “Ndi mwab'ewu bwà kuditèèja bu cilongo cipikudi cyà mu dîsù bwà bumpyànyi ebu, nènku ndi kaaba aka munkaci mwà kudìmanyisha kumpalà kwà bakùlù bàà cimenga aba.” Nwamònu anyi?

131 Nènku pàvwà. . . Yone wàkadila mwadi. Mpindyewu, muntu kampànda, mùngàmbi lumingu lushààle elu, kwambaye ne:

“Yone wàkadila mwadi bwalu kàvwa mwà kupeta muntu mukùmbànyine to.” Kabivwa nàнку to. Muntu mwinshi mwà bwenzeji bwà Nyumà Mwimpè kàvwa mufwànyine kudila mwadi bwà aci nàнку to. Kwela meeji ne: “Bwalu kàvwa mukùmbànyine to,” pàmwàpa yèyè mene Yone kàvwa mukùmbànyine to. Kakwèna muntu nànsha umwe mukùmbànyine to. Kàdi kààkadila bwà aci nànsha.

¹³² Ngèèla meeji ne ùvwa ùdila bwà disànkà bwalu ùvwa mumòne ndongamu mujimà wa bupikudi uvwa mufùnda mu Mukàndà ewu awu. Kabivwa ne mbwalu kakùvwa muntu nànsha umwe mukùmbànyine to, bwalu, Mwànà wa mùkòòkò uvwa mukùmbànyine ùvwa mwimane ànu kaaba aku. Pa nàнку ùvwa ùdila mwadi, ki yèyè ne: “Kaa, butùmbi kùdì Nzambi’s wè!” Mutèelejaayi dyàkàmwè pààkaditwàye mu dyela dyà mbilà apu. Mpindyewu, kàdi tudi tumusangana ùdila kaaba aka bwalu ùvwa ne disànkà be bwalu Mwànà wà mùkòòkò ùvwa mwangate Mukàndà bwà . . . ku cyanza cyà Ewu uvwa musòmbe pa Nkwasa wa butùmbi awu.

¹³³ Nènku mmwenze ànu wenza . . . Pàvwa Mwanjèlò ewu, Mwanjèlò wa dikàndà ewu, pààkeelàye lubilà ne “Nganyì udi mukùmbànyine?” yèyè ùvwa munkacì mwà kumanyisha dîbà adi mene, ùvwa munkacì mwà kumanyisha bwà kupeta Cilongo Cipikudi. Ki dyàkàmwè paanyimà, kwambayè ne: “Nganyì udi mukùmbànyine bwà kwangata Mukàndà?” Pashìishe cintu kampànda . . . Ki Yone kukùtula mwadi. Pashìishe cyàkenzekà ncinyi? Wàkamòna, mwaba awu Mukàndà mwimane. Ki Wòwù awu, kàdi ùvwa mukùmbànyine nganyì?

¹³⁴ Èè, ki Ngabùdyèlè awu mwimane, mu bushùwà bwà bwalu, ùvwa mukùmbànyine; kàdi, nwamònu’s, kàvwa muntu to, nènku yèyè ùvwa Mwanjèlò. Ki Mikàèlè awu mwimane, ùvwa mukùmbànyine; kàdi kàvwa muntu to, ùvwa Mwanjèlò. Pa nàнку bivwa bikèngela kwikale kampànda wàkalwa muntu wa pa buloba ànu mutùvwà amu. Nènku pashìishe pààkamònaye Mwànà wà mùkòòkò ewu wàkadi mushipa kacya ku cibangidilu dyà dyulu ne buloba, ùjuuka, ke kumònayè ne Yèyè wàkashipiibwa kubangila ànu ku difùkà dyà dyulu ne buloba, dîbà adi ke Yone kukùtula mwadi. Amen! Bwalu ke mwanda awu, kumònaye cintu cyònsò nkòong. Nwamònu anyi?

¹³⁵ Nènku mmwenze ànu ùmanyisha ne: “Nganyì udi mukùmbànyine?” ùvwa ùmanyisha dilwa dyà Cilongo Cipikudi. Kàdi’s ki Yèyè ewu mwimane, Mwànà wa mùkòòkò. Kàdi cyàkenzàYe ncinyi? Kuya tamàkàtàmàka ne ku Nkwasa wa butùmbi kùvwa Nyumà wa Nzambi ùsanganyibwa aku, e kwangata Mukàndà mu cyanza cyà dyàbalùme cyà Ewu udi musòmbe pa Nkwasa wa butùmbi awu. Ki bakùlù bwònsò kupòna panshi e kwamba ne: “Wèwè udi mukùmbànyine bwalu Wèwè nguvwa mushipiibwe.” Nwamònu anyi? Ne pashìishe Yèyè wàkalwa dîbà adi . . . Mukàndà Wèndè, anyi mene Mukàndà wà

bupikudi, anyi—anyì Mukàndà wà dyakwilangana mu cikondo cyà Èkèleeziyà bwalu bwàwù kujika, mpindyewu Yèyè mmulwe Mupikudi.

¹³⁶ Mpindyewu, dibuuludiibwa dyà mwàkacyènzaYe nedùikale mu Bítampì Mwandamutekète ebi. Mpindyewu, tudi tumòna mu . . . bu pàdi Mukàndà wà mudimu wà butwàngaji Wèndè awu mujike, mudimu ùvwa mujikè, mpindyewu mu nshapìtá yisàtù yà Èkèleeziyà, bwàyì mbutùukè. Kàdi mpindyewu bupikudi, bupikudi bùdi ne cyà kubuuludiibwa. Ncinyì aci? Mpindyewu, pààkangatáYe Mukàndà ewu . . . Mpindyewu, teetàayi kwangata ngeelèlù wènu wà meeji wa ndòndò, bwalu, twètù ànu badidìnge bafike ku malòlò mwandamutekète aa, nenùfike ku—nenùfike ku dicyùm vwa mpindyewu.

¹³⁷ Wèwè kùyì mucyumvwe to, elà ànu cyanza muulu cyanààna, wàmbe ne: “Ncyèna—ncyèna mucyùm vwe to,” nwamònu’s, tàngilàayi, bwalu ndi muswè bwà nwikalè batwìshìibwe mpindyewu.

¹³⁸ Mpindyewu, mònaayi “Bupikudi.” Paanyimà, dyàkàmwè ànu paanyimà pàà dyakwilangana Dyèndè dimane kujika bwà Èkèleeziyà, dìbà adi Ùdi ùDibuulula bu Cilongo Cipikudi cyà mu dísù. Nudi nulonda aci mpindyewu anyi? Nènku mpindyewu Yèyè neàbuulwilè Èkèleeziyà mwàkacyènzaYe. Nènku dìbà adi pìkala dibuulula edi dikaadi dimane kutwàdija, dìbà adi aci cìdi cijaadika ne tudi ku ndekeelu kwà njila. Amen! Mpindyewu, nudi numòna ànu Eci ní . . . anyi Ncilelèlè anyì ncyà mafi, patùdi tubwela mu Mifundu apa.

¹³⁹ Tudi tujandula ne: Ncinyi cìvwa munkaci mwà kubuuludiibwa? Dibuulula dyà bupikudi dìvwa cinyì mmunyi mutwàkapikudiibwa? Anji tàngilàayi ànu mwab’ewu mu ndambù wa bidimu bishàale ebi cyàkenzekà: dibuulula dyà Dìna dyà Yesù dibàtiiza dyà mu màyi, dibuulula dyà ne kakwèna ifernò wa Cyendèlèlè nànsha, cìvwa kacya kaciyiku cimanya kumpàla (nudyàmbidila ne bananga bèènu bàvwa mwà kwikalàmù bwà Cyendèlèlè). Nwamònu anyi?

¹⁴⁰ Ne kwèna mwà kwikala ne Mwoyi wà Cyendèlèlè paùdi kùyì musungidiibwe to. Udi ne Mwoyi wà Cyendèlèlè, dìbà adi kwèna mwà kwoshiibwa mu ifernò bwà Cyendèlèlè to. Neùnyoookiibwè bwà mpèkaatù yèbè ne mwoyi wèbè wa mubidi, kàdi kwèna mwà kwikala ne Mwoyi wà Cyendèlèlè mu ifernò to. Wèwè ne Mwoyi wà Cyendèlèlè, dìbà adi kwèna mwà kwoshiibwa bwà kashidi to bwalu kùdi mùshindù ànu wùm wèpelè wa Mwoyi wà Cyendèlèlè. Nènku ndi mutwìshìibwe ne Èkèleeziyà ùdi ùmvwa aci.

¹⁴¹ Mpindyewu, ncinyi aci? Bikwàbò mbinganyi? Ndongamu wa bupikudi. Tàngilàayi ànu bìdi bitùpèebwa matùkù mashàale aa kùdi Nyumà Mwìmpè, nwamònu’s: Dimiinu dyà Abraham, cìvwa dibuulula dyumvwija.

¹⁴² Dimiinu dyà nyòka. Nwámònu Mukàndà wà Bwàkabuulwibwà ewu anyi? Tàngilàayi patwàfikaku, mùdici cicyùvula. Kàdi mvwa mucilèèjile patòoke ànu mwab'ewu ku Mifundu, aci's m'Bulelèlà menemene. Ndi ngàalukila buludi mu Bwàkabuulw-...anyi, ngàalukila buludi mu Genèsè ne ncyàngata ne ndeeja dībà dyàkacikàngulà citampì aci ànu kale mu Bible amu, kuumukila ku Gensèsè too ne ku Bwàkabuulwibwà.

¹⁴³ Ānjì elààyibi meeji, kuumukila ku Genèsè too ne ku Bwàkabuulwibwà kwaka kakùvwa muntu nànsha umwe mubàtijiibwe mu dīnà dyà "Taatu, Mwàna, Nyumà Mwìmpè to". Ndi batiiza dyà mashimi! Mvwa mwimàne kumpàla kwà bayiishi nkàmà yisàtù ne byà mu njila bàà mu nsangilu munène wa bambi bàà Chicago ditùkù adi, ne kuleeja aci patòoke mu mùshindù wà ne bwònsò bàakasa myadi buupùkilàngane ewu ne ewu. Makumi mwandamutekète à kùdibo bàdi bàlwa bwà kubàtijiibwa mu Dīnà dyà Mukalenge Yesù.

¹⁴⁴ Ne dimiinu dyà nyòka dīdi kuumukila ku Genèsè! Pìkala nyòka yèyè kàyi...bu ne kàvwa ne dimiinu to, nànu Kilistò kàvwa mulediibwe to; bwalu Yèyè wàkamba ne: "Nènteeke lukunà pankaci pàà Dimiinu dyèbè ne dimiinu dyà nyòka." Nènu pìikalabi ne dimiinu dyà nyòka divwa bwalu bufwikàkaja nànu Kilistò pèndè ùvwa bwalu bufwikàkaja, nànu Èkèleeziyà mbwalu bufwikàkaja, nwamònu ne mbyònsò, kwena mwà kubitapulula to. Nyòka ùvwa ne dimiinu, nènu ke dyòdi adi dīdi bulelèlà dibayumbakaja. Bwà cinyi kabèna mwà kucyùmvwaku? Bwalu kabèna ne dibuulula dyàci to.

¹⁴⁵ Bwà cinyi kabèna bàlwa bwà kukokangana naanyi pa cyòci? Cyambilu cidi bwàshì dībà dyònsò, ní nganyi yònsò wàlwa awu nentwilangane nendè. Ncyàkukokangana naabò to, kàdi ndi bushùwà mwà kuyikilangana naabò pa cyòci, bóbò baswè...mvwa mubàkonke ànu mwaba awu kumpàla kwà nsangilu awu. Ndi muswè bàmwè bàà munkaci mwènù bàngambile mwaba ùdici cyà mafi! Kushàadi mwimànyine mu ditumba kampànda bwà kwakula bwànyì, anyì bwà bwalu abu to, lwàkù wimanè naanyi mpàla ne mpàla. Twànji—twànji kwambilangana bulelèlà, tutwilanganàayi kaaba aka bwà tumòne ne nganyi udi mubinge ne udi mupile pa bwalu abu. Kàdi kabàkucibundula to. Bwà kwamba menemene, mbamanyè citàmbe bwìmpè. Nwamònu anyì?

¹⁴⁶ Bwalu, kī mmémè to, kàdi n'Nyumà Mwìmpè, Mwanjèlò mwine wa Nzambì unùtù numòna awu. Nudi nwamba cinyi bwà matùkù aa mwab'ewu pàdi bintu byònsò ebi byenzeka, ne Mwanjèlò wa Mukalenge ewu mwimane pabwìpi? Ncivwa mufwànyine kumanya maaluu aa to, kàdi's ke dībà ndyèdì, dīdi mwab'ewu. Patùdi tukabwela mu Nyumà mwandamutekète eyi, nsèngu mwandamutekète, ne bikwàbò, leelù ewu, bu Mukalenge mwà kwanyisha, nenùmòne pàdi bwalu. Ke—

ke díbà ditùdimu ne didi mabuulula aa ne cyà kulwa. M’Mukàndà wa mabuulula, dibuuludiibwa dyà Yesù Kilistò. Nènku twakajandula ne, nshapìtà mene wa kumpàla awu, Yéyè wàkabuulula ne Ùvwa nganyi. Nènku mpindyewu Yéyè ùdi wàngata Bitampì Mwandamutekète, ùbuulula mwàkapikulàYe buloba.

147 Ne ùmwè wà ku yòyi ùvwa nku Dìnà dyà Yesù Kilistò. Mukwàbò ùvwa ngwà kuumusha bwòwà mu bantu, bu mùdi ne: Cyendèlèlè, bupikudi bwà Cyendèlèlè, dibingishiibwa ku diitabuuja, dijidiibwa, dibàtiiza dyà Nyumà Mwímpè. Ne cinyi? Bwà ne tudi bakùbiibwe Cyendèlèlè, uumusha mpatà yònsò mu bantu. Pawikala ne cyeyà cyà lupàndù lwèbè, Nzambì ukaadi mumanè kukutwa cìtampì too ne ku ditùkù dyà bupikudi bwèbè. Efèsò 4:30 ùdi wàmba ne:

... kanùbungamiji Nyumà Mwímpè wa Nzambì, unùdi batwìbwe nendè cìtampì too ne ku ditùkù dyà bupikudi bwènù.

148 Mpindyewu, mmunyi muwìkalà—mmunyi muwìkalà mwà kutwà cìmpìngà? Udi mufwànyine kutwà cìmpìngà, kàdi kwèna mwà kujìmina to. Kàdi wèwè mushààle mu ngiikàdilù awu, bìdi bìleeja ne kùvwa Nendè to ànu kacya kwònsò aku. Kàdi wèwè mwikale mwànà wà Nzambì: “Mukuukwidi pàdiye ànu ukezudiibwa kènà kàbìdi ne civùlukidi cyà mpèkaatù nànsha,” mùdi Ebèlù wàmba. Aci’s ncilelèlè. Pa nàнку kwèna mwà—kwèna mwà kwìkala mwena Kilistò, kwèna mwà kwìkala ne Nyumà Mwímpè kàdi kupàtuka ne kwìkala ne nsòmbelu wa bàà pa buloba to. “Wèwè munangè maalu à pa buloba, bintu byà pa buloba, dinanga dyà Nzambì kadyèna munda mwèbè to.” Nàнку awu udi ànu munkaci mwà kutèeleja mwadi mubi wà mpungi mwaba kampànda, dyabùlù mmukufikishe ku didyùja cyaànà. Kàdi wèwè ukenketa nsòmbelu webè ku Dìyi dyà Nzambì ne ùleeja ne udi ne nsòmbelu mujaalàme bilondèshile mabèji à Bible, díbà adi udi ne dikùbiibwa dyà Cyendèlèlè.

149 Nènku kakwèna cyà diciina nànsha cìmwè. Cìvwa Nzambì mulaye, Nzambì neàcyenzè. Ndi ngèèla ní nganyi ní nganyi kadyòmbò bwà kwangata aci. Wèwè angàtá ànu aci ne wendè ne Dìyi adi, kàdi ùtàngilè cyàkwenzekela. Mwanèètù, neCìfikishe byònsò ku dikùmbana, Nzambì ngudi mwambe nàнку. Byònsò bìvwà Nzambì mulaye, nebyènzeke.

150 Mèmè... Bu mùmvwà munwàmbile ne mudimu wànyi wùvwa wùbanga, nkwekù kukaadi bidimu bitwè ku dikumi ne bitaanu eku ne eku kwà buloba bujimà, kàdi musangu nànsha ùmwè kaCìtukù cipangile to. Bwà cinyi? Bwalu, mu bushùwà bwà bwalu, mvwa mwimàne pa mulayi wà Nzambì. Mvwa mumanyè ne Cìvwa m’Bulelèlè. Kanulekedi bwà mèmè kuteeta kunwàmbila ne ncimwè cyà ku lungenyi lwànyi lunène to, kàdi Ewu Utu usokolola maalu masokome

à mu mwoyi ki Yèyè wàkandeeja mu Mifundu. Bwalu ncìvwa nànsha ne. . . pangàakatwadija kuyiisha, kukaadi bidimu bitwè ku makumi àsàtù, bìvwa bikèngela bwà ngiikale ne mulunda wanyi wa bakàji musòmbe mwaba awu bwà kumbadila Bible. Ncìvwa nànsha mwà kuMubala to, kàlaasà kàansongo nciologi. Mwanèètù wa bakàji Wilson, udi ne cyà kuvùluka aci pàvwà Hope ne ciibidilu cyà kumbadila Bible kuntu kwàka, ùsòmba ne ùMubala, nènku mwva mwà kwamba ne: “Umwvàyì cidiWù wamba, enzàayi ànu cidiWù wamba aci. Ki cyònsò cindi pàanyi mumanye mwà kunwàmbila aci.” Nènku bwònsò bàakacyènza abu, mòna’s, bàakakana. Kùvwa kujike. Mvwa mwà—mvwa mwà. . .

¹⁵¹ Ûvwa mufwànyine kwamba ne: “Nzambi wàkatàmba kunanga bàà pa buloba Wàkafila Mwan’Èndè umwèpelè mulela.”

Mvwa mufwànyine kwamba ne: “Mbanganyi bàdi baCìitabuuja?” “Balàaku bidì bilonda abi, munanga wanyi.”

“Wàkafila Mwan’Èndè umwèpelè mulela, ewu yònsò udi uMwitabuuja ùdi ne Mwoyi wà Cyendèlèlè.”

Mémè kwamba ne: “Mbanganyi bàdi baCìitabuuja? Nudi buumvwe cidiCi cyàmbe.” Ncìvwa mwà kudìbadilaCi to.

¹⁵² Pa nànkù, nwamònu’s, ncìvwa ne mùshindù wà kuyiidila mu cilongelu kampànda nànsha. Kàdi, kaa, ndi munange cilongelu mungàakayà àmu’s! Kaa, lwà pambèlù pàpa mu kaanyòngòlò kakesè mwaba kampànda, byanza byànyi byela muulu kùdi Nzambi, ku ditùkù ne ku ditùkù mùshindù awu, pàakapwekà Nyumà Mwîmpè mu kalolo Kèndè ne kubanga kuDibuulula, ne kwamba ne: “Eci ki cikampànda, ne cyàcyà ki cikansanga.” Nènku kakùtukù musangu nànsha ùmwè ùdiku muntu ní ngwa bishi, cifùkiìbwà nànsha cyà mùshindù kaayi, mukumbaneku mwà kulenga cyanza cyèndè pa ní ncinyi ní ncinyi cyà ku Cyòci to. Kàdi nànsha mùdìku dikolesha dyònsò dyà maalu ne bikwàbò byònsò bidì bitwè mpòkòmbà mu ditùnga abi, Nzambi mmuCilame ànu kuulu ne cikezùke, ne mwende naaCì eku ne eku kwà buloba bujimà. Àlèluuyàh! Tudi mu cikondo cyà ku nshìikidilu, bânà bèètù. Tudi kaaba aka ku cikondo cyà ku nshìikidilu. Kwàjiki. “Nekwìkalè Bukènkè mu dîbà dyà dilòlò.” Ki cyàkambàYe menemene ncyòci aci.

¹⁵³ Mpindyewu, m’Mukàndà wà Bwàkabuulwibwà, Nzambi ùDibuulula. Nènku mpindyewu ku maalu masokoka manène aa, Yèyè ùdi ùbuulula Dìnà dyà Mukalenge Yesù Kilistò mu dibatiiza, Ùdi ùbuulula ne kakwèna cintu pààci ne ny’Ifèrnò wa Cyendèlèlè to (kabyèna mwà kwenzeka to, kakwèna Mufundu nànsha ùmwè mu Bible ùdi wamba ne kùdi cintu bu nànkù to).

¹⁵⁴ Mpindyewu, kùdi ifèrnò, ne kùdi dijiba dyà kapyà, ne mwaba wìkala beena lwonji mwà kunyookiibwa, kàdi ndekeelu wa byònsò bàdi bàbùtuka butubutu. Pàmwàpa bidimu miliyò

cinunu, kàdi ndekeelu wa byónsò bàdi bàbùtuka butubutu. Bwalu kwéna mwà kwikala ne Mwoyi wà Cyendèlèlè paùdi kùyi musùngìdiibwe to. Nènkù wéwè woshika Cyendèlèlè, bikèngela wikalè ne Mwoyi wà Cyendèlèlè. Mòna's, cyumvwilu cyà bantu bwónsò eci ncifwànyine kukuleeja cyòci aci. Nwamònu anyi? Mmunyi mùdi mwà kwikala ne wa Cyendèl- . . . ? Mbanganyi bàdi bamanyè ne paùdi ne Mwoyi wà Cyendèlèlè udi musùngìdiibwe? Èè, pawikala woshika bwà Cyendèlèlè, kwàkwikala ne Mwoyi wà Cyendèlèlè bwà kucijingulula anyi? Pa nànkù, nwamònu's, kabyèna ànu byumvwika to. Nwamònu anyi?

¹⁵⁵ Mpindyewu, “dikùbiibwa.” Aba bàakadyànjilàYe kumanya, Wàkabàbìkila; aba bàakabìkilàYe, Wàkabàbingisha; aba bàdiYe mubingishe, Ùkaadi mumanè kubàtùmbisha. Pòlò mmutwàmbile, mu nshapìtà wa 1 wa Efèsò, ne “Nzambì, kumpàla kwà difùkà dyà dyulu ne buloba, mmudyànjile kutùlongolola ku ditèèkiibwa dyà bânà ku Kilistò Yesù.”

¹⁵⁶ Yone ùdi ùtwàmbila kaaba aka mu Bwàkabuulwibwà, ne: “Mwena lukunà mu matùkù à ndekeelu, mwena lukunà wa butèndeledi awu, neàbwele munkaci mwà bantu ne kwenza malongolodi ne bikwàbò, ne tusùmbù twà ntèndeleelu ne bikwàbò,” mùdibo naabi leelù ewu emu, “ne mufwànyine kuseeswisha Basungula mene bu ne bivwa mwà kwenzeka, ne mufwànyine kuseeswisha *bwónsò* beena mènà àdi kaayi mafùnda mu Mukàndà wà Mwoyi wà Mwànà wà mùkòòkò kacya ànu ku difùkiibwa dyà dyulu ne buloba.”

¹⁵⁷ Dìna dyèbè dyàkafùndiibwa mu Mukàndà wà Mwoyi wà Mwànà wa mùkòòkò dìbà kaayi? Kumpàla kwà difùkiibwa dyà dyulu ne buloba. Ndìbà kaayi dyàkashipiibwa Kilistò, nkùkaadi bidimu cinunu ne nkàmà citèemà anyi? To, mukalenge. Kumpàla kwà difùkiibwa dyà dyulu ne buloba. “Mwànà wa mùkòòkò mmushipa kumpàla kwà difùkiibwa dyà dyulu ne buloba.”

¹⁵⁸ Nwamònu cìdici cyènza anyi? Mbitampì ebi munkaci mwà dikàngudiibwa, bìbanga ànu kubuulula ndongamu wa bupikudi wa Nzambì, mùshindù kaayi wàkacyenzàYe. Bwalu mbujike bwónsò mpindyewu, ànu bu—ànu bu bìdi byàmba kujika nkong. Pa nànkù tudi ku cikondo cyà nshùkidilu. Nànkù ki bwà cinyi—bintu bìdi munkaci mwà kubuuludiibwa. Èyo.

¹⁵⁹ Mpindyewu, cyètù Cilongo cyà mu dísù mmukwàte Mukàndà wà bupikudi mu cyanza mwangacila kùdi Mwenawù wa ku cibangidilu. Mwenawù wa ku cibangidilu. . . Patwàkawùjimija ku budimi bwà Edènà, kupicila ku Adàmà, wàkalukila buludi kùdi Mwenawù wa ku cibangidilu. Kàdi kùvwa mwena cindyàfu pa buloba, mwena cimbàmbila, ne mwine awu n'Sàtaanà; kulwayè mwaba awu, yèyè's ki mwena cindyàfu. Buloba ebu kí mbwèndè to; mbwà Nzambì. Kàdi yèyè mmwena cindyàfu, mwena cimbàmbila. Balumyànà, mùshindù mene ùndi mwà

kwamba cintu kampànda mpindyewu mene, kàdi mbîmpè mpuwè mene. Mukàndà mutwà bitampì mwandamutekète ewu's, ke Mukàndà wà bwena-cintu wà bupikudi bwètù. Ke mukàndà wà bwena-cintu. Indilaaayi too ne patwàbwelà mu Bitampì abi!

¹⁶⁰ Ùdi ùcibula bitampì, ùbuulula, ùtùpèèsha bumpyànyì Bwèndè kùdi cisàmbà Cyèndè. Ùdi ufila bumpyànyì bwàkapyànaYe, kuvwijiibwa Cilongo Cipikudi cyà mu dísù, nènku ùtùpèèshawù ne budiswile bwònsò. Ùvwa wònsò Wèndè. Yèyè ke Ewu Wàkapikula. Kàdi pamutù pàà kuDilaminyinawù, Ùdi ùwùpingajila bantu. Ki dinanga Dyèndè bwètù ndyòdi adi. Kaa!

¹⁶¹ Sàtaanà, udi muwangate mpindyewu, mwena cimbàmbila, udi ndekeelu wa byònsò. . . Yèyè kí mmuswè kuwùfila lùkàsà to, tudi tujandula mwaba ndambù pashùshe ne mu Mifùndu, mùndì ngèèla meeji mwab'ewu mu nshapità mukwàbò. Nènku kàvwa muswè kuwùfila buludi to, kàdi byàkakèngela bwà yèyè kuwùlwangeena. Kàdi, ndekeelu wa byònsò, pàakatwàdiibwàye ku diteetangana dyà makàndà, wàkeediibwa mu dijiba dyà kapyà. Ncyà bushùwà.

¹⁶² Yesù, Dìna dyà Yesù mu ma-Èvànjeeliyò didi ne myànzu yinaayi ya “Mwànà.” Nuvwakù bamanyè aci anyi? Yesù ùdi ne myànzu yinaayi bu *Mwànà* mu Èvànjeeliyò. Ùmwè wà ku yòyi ùdi “Mwànà wa Davidi”; ùmwè wa ku yòyi ùdi “Mwànà wa Abraham”; mukwàbò, “Mwànà wa muntu”; mukwàbò ne: “Mwànà wa Nzambi.”

¹⁶³ Mpindyewu, tàngilàayi. Pàdi Cilongo cyètù Cipikudi cyà mu dísù ùlwà Yesù Kilstò, Ùdi ùlwà Mwànà wa Davidi, udi Mupyànyì wa nkwasa wa butùmbi awu. Butùmbi's wè! Yèyè wàkapyàna nkwasa wa butùmbi ku diikala Mwànà wa Davidi. Nzambi wàkamba kale wàwa ne Kàvwa mwà kulekela Davidi nànsha, “kashidi kàakulekela Davidi kàyi ne dimiinu to.” Ne Kilstò m'Mwànà wa Davidi. Ki kulwaYe cyètù Cilongo Cipikudi cyà mu dísù, ne kwindila, ulongolola mwaba kùdiYe mwà kukòokesha neetù. Bu Mwànà wa Davidi Yèyè m'Mupyànyì wa nkwasa wa butùmbi.

¹⁶⁴ Bu Mwànà wa Abraham, Yèyè ùdi Mupyànyì wa cipaapu cyà bukalenge. Amen. Ncyà bushùwà anyi? Yèyè ùdi Mupyànyì wa cipaapu cyà bukalenge (Amen!), Pàlèstinà ne byònsò bìdi munda mwèndè abi: “Dimiinu dyà Abraham.” Yèyè ùvwa Mwànà wa Abraham.

¹⁶⁵ Bu Mwànà wa muntu, cidì Mwànà wa muntu wènza. . . Ncinyì cyàkajimija muntu? Wàkajimija buloba. Pa nànkù bu Mwànà wa muntu Yèyè kí Mupyànyì wa byònsò pa buloba. Byònsò bìdiYe naabi nènku Ùdi ne cyà kutùpèèshabi, dībà adi Ùdi wàlukila ku civwàYe. Ùdi. . .

¹⁶⁶ Mpindyewu, dībà adi, bu Mwànà wa Nzambi Ùdi ùpyàna bintu byònsò. Bu Mwànà wa Davidi Yèyè ke Mupyànyì wa

nkwasa wa butũmbi, bu MwĀnà wa Abraham Yēyè m’Mupyànyi wa cipaapu cyà bukalenge, bu MwĀnà wa muntu Yēyè ki Mupyànyi wa buloba, bu MwĀnà wa Nzambi Yēyè ki Mupyànyi wa bintu byònsò mu Dyulu ne pa buloba. Kaa, ekèlekèle! Ki Mupikudi wetù nyēyè awu, Cilongo cyètù Cipikudi cyà mu dísù.

¹⁶⁷ Mpindyewu, mònaayi! Kaa, ebi’s bìdi bingenza bĩmpè be. Ke mwaba ùndi—ùndi bulelèlè ndiishibwa ewu. Mpindyewu, myoyi yènù yidilekelèlè kùdi Nzambi ànu bwà tusunsa tukesè cyanaànà. Tèelejàayi eci.

¹⁶⁸ Sàtaanà mmwena cimbàmbila, kī mmwangàte cintu bu mùdi mikenji yilòmba nànsha, nènku ùvwa ne bidimu binunu bibìdi byà dikòkangana ne anyi yēyè ke mwenaci anyi muntu mukwàbò ke mwenaci. Kàdi Kilstò wàkalwa bu Cilongo Cipikudi cyà mu dísù ne kutùpikwilaci. Kàdi Sàtaanà ngudi naaci. Kàdi, nudi bamanyè’s, paanyimà pàà katanci (mvità minène eyi neyijikè) neèdiibwè mu dijiba dyà kapyà. Nwamònu anyi? Neàbütudiibwe pàmwè ne bwònsò bàdi bàkuukwila nendè abu. Kàdi bapyànyi bàà lupàndu nebàlwe ne Kilstò. Mpindyewu, yēyè mmwena cimbàmbila.

¹⁶⁹ Mpindyewu, vùlukàayi ne, mu Dipungila Dikùlukulu, mu—muntu yēyè mujimije bumpyànyi bwèndè ne mwena cimbàmbila mulwè kwangata citùpà cyèndè cyà buloba, kàvwa mwà kushààla mucilame ntàntà mule bwà kucijimijabo kashidi kùdi mwenaci to ànu too ne ku bidimu makumi àtaanu. Paanyimà pàà bidimu makumi àtaanu, cidimu—cidimu cyà Cyanga cívwa cilwa. Nènku cidimu cyà Cyanga, pàvwa cidimu cyà Cyanga cikùmbana, díbà adi bintu byònsò bìvwa byàlukila cyàkàbidì ku mbangilu wabi wà kwònsò eku. Bapika bwònsò, bàvwa bààlukila ku mbangilu wa kwònsò eku. Bu muntu mwà kwikala ùdima ne lukàsu mu budimi kàdi mpungì kudilayè ne yēyè kumuumvwa, ùvwa mwà kwimansha lukàsu alu ne kwamba ne: “Ncyèna kàbidì mupika to, ndi ngààlukila buludi mu dikù dyànyi.” Bàvwa bààluja bintu byònsò. Mwena cimbàmbila yēyè mu budimi, ùvwa ne cyà kushiya budimi. Kwàjikì. Ùvwa ùpàtuka mu budimi bwà bwalu kaayi? Mwenabù bilondèshile mikenji ukaavwa wàlukila. Bivwa bikèngela bwà kuumukayè.

¹⁷⁰ Àlèluuyàh! Dìmwè dyà ku matùkù àdi panshì aa makalenge à buloba ebu neàponè, ne beena bintu bilondèshile mikenji nebàbwele dìmwè dyà ku matùkù aa. Amen.

¹⁷¹ Mpindyewu, kuvwa cikondo cívwàku dikòkangana. Kubangila ku ditùkù dyà makùmi ànaayi, kuumukila ku ntwàdijilu wa ditùkù dyà kumpàla dyà dikezudiibwa dyà mwaba wa cijila, anyi Kilstò wàkaya ku Kàlvaryò, kùvwa matùkù makùmi ànaayi too ne ku dibàndà. Cívwa mu muyiiki wà kafumba, anyi musùmbà wà Sàtaanà ùvwa mwà kucyàngata kwamba ne Kàvwa mubiike ku bafwè to. Kubangabò dikobola kuntwaku ne bamba, bamba ne: “Bayiidi mbàdi balwè kuMwiba

bufùkù.” Nudi babalè Bible ne: “Ke kwambaye ne ‘Bantu Bèndè—Bèndè mbalwè kuMwiba bufùkù.’ Ne kufutabo basàlaayi mfranga bwà kwambabo nàнку.” Kàdi cyàkeediibwa mpatà dîbà adi, bantu bwònsò bàvwà bèèla mpatà.

172 “Èè, cyà bushùwà, pàmwápa ncyà mu bulongolodi, dîbà adi, cintu cyònsò mu kaabujimà ncyàbù.”

173 Kàdi mu ditùkù dyà makumi àtaanu òvwà Ditùkù dyà Mpenta, ke Mwenaci mumanyike kupweka munkaci mwàbò (Àlèluuyàh!) ne kuleeja ne kacìvwa bulongolodi nànsha. Ne cìvwa ndyùjiibwa dyà ne Nyumà Mwîmpè. Aci cìvwa mfranga yà cyeya yà Nzambi kùdi Èkèleeziyà Wendè bwà kacìkadi cyàlwa kukòntononyiibwa kùdi malongolodi ne bikwàbò to, ncifwànyine kwikala cyeya cyà dibàtiiza dyà Nyumà Mwîmpè ne bukòlè ne dinanga dyà Nzambi. Amen! Kaa, aci kaciyènakù ànu cinwènzela cintu kampànda anyi? Mwena cintu mumanyike! Cìvwa kwèpi? Mu byanza byà Nzambi. Ne mu . . .

174 Nwamònu’s, kàvwà mwà kushààla mucilame paanyimà pàà matùkù makumi ataanu nànsha. Nubalàayi aci lwà mu—mu Lewitiki—mu Lewitiki, mu—mu mikenji mwàmwa. Mbámbe ne kabàvwà mwà . . . mwenaci wa ku cibangidilu. Byàkakèngela bwà kwalukilaci mu byanza byà mwenaci wa ku cibangidilu paanyimà pàà bidimu makumi ataanu. Twètù bwònsò tudi bamanyè aci. Nudi bacìbale misangu yàbùngi, kàdi . . . nwamònu’s: “Bìvwa bìkèngela bwà kwalukilaci kùdi mwenaci wa ku cibangidilu paanyimà bidimu makumi ataanu.”

175 Èè, pashìshe, paanyima pàà bidimu makumi ataanu byà matùkù ebi, cidimu cimwè . . . ditùkù òvwè dyumvwija bu cidimu cijimà. Nènku kuumukila ku ditùkù dyà dipoopediibwa pa nkùruse pàakangatàbo . . . Cilongo Cipikudi cyà mu dísù eci ne kuMushebeyabò mu—mu ditùkù dyà Paasàkà, dîbà adi dikòkangana kwenzakadi. Èkèleeziyà kwitabuujà too ne ku cikondo aci ne Yèyè òvwà Cilongo Cipikudi ne: “Yèyè òvwà Mupikudi.” Pashìshe cyàkenza cinyi? CyàkaMushebeya, mulwishì ke wàkenza nàнку, ne kwambayè ne mbambule mubidi Wèndè bawùsokòke kule mwaba kampànda. Nènku aci cyònsò cyàkeediibwa mpatà kùdi bantu ne: “Ncinyi cidi ciMwenzèkèle? Ncinyi cidi cyenzèke?”

176 Mpindyewu, ku ndekeelu kwà ditùkù dyà makumi ataanu, dîbà adi, nudi numòna’s, kacìvwa kàbidì mwà kukokanganyibwa ntànta to. Pashìshe, Nzambi . . . Pamutù pàà bwòbò kutùngunuka—kutùngunuka ne èkèleeziyà wa ngitàbìjilù wa kale, mukàyàpàle, wa mashika awu; Nzambi wàkaalujà Nyumà Mwîmpè, kwela beena cimbàmbila bwònsò pambèlù, ne pashìshe kumukòòkesha. Bukòlè bwà Nyumà Mwîmpè bwàkapwekà ne Èkèleeziyà kupeta cyeya cyà lupàndù lwèndè.

177 Mpindyewu, bânà bèètù, kí mbwà kunutàpa ku mwoyi anyi cintu kampànda pa bwalu abu to, piikalabi ne bulongolodi mbwìmpè ne wêwè udi ànu mwena Kàtòlikè ku bulongolodi, udi Baptiste ku bulongolodi, udi mujimine. Nwamònu's, cyeyà cyà lupàndù lwètù kacìvwa dikashààla wa mu èkèleeziyà kampànda nànsha, cyeyà cyà lupàndù lwètù kí nkukashààla wa mu bulongolodi kampànda nànsha. Cyeyà cyà lupàndù lwètù ndibàtiiza dyà Nyumà Mwìmpè kakùyi bulongolodi nànsha bùmwè to! Amen.

178 Kabàvwa mwà kucilaminayina bwà aci to, ditùkù dyà makumi àtaanu adi dimanè kupìta, bwalu aci's civwa ditùkù dyà Cyanga pàvwà bintu byònsò byàlukila ku mbangilu wabi wa ku cibangidilu. Nènku—bukolè bwà Nzambi bwàkaalujiibwa ku cibangidilu cyàbù, ditùkù dyà makumi àtaanu, cidimu cyà Cyanga pàvwà bintu byònsò byàlukila.

179 Mpindyewu, nekùlwe cikwàbò cidimu cyà Cyanga ne, aci, tukaadi ànu naaci bu mu cikondo eci. Bu nwènù bamòne bìmpè, Mpenta mmutwadije kupona mu Àmèrikè emu kukaadi bidimu bitwè ku makumi àtaanu, mwaba kampànda mu cikondo aci. Kukaadi bidimu bu makumi àtaanu kwàkabanga Mpenta kupòna. Mpindyewu cidì munkaci mwà kwenzeka ncyà ne, èkèleeziyà ùdi munkaci mwà kwakidila Mukàndà mukànga ne bitampì mwandamutekète wà dibuulula dyà Yesù Kilistò (wà Bitampì Mwandamutekète) kàdi cyàdikumi cìmwè cyàbò kacyàkuWàkidila to.

180 Kàdi panùdi nutwàdija kumòna cidimu cyà Cyanga mutùdi katùyi mwà kukòkangana ne kulubakana ne kupulumunangana mùshindù ewu to, kàdi tukàadi bamanè kukùbiibwa mu Kilistò! Tukàadi ne Dìna dyà Mukalenge Yesù Kilistò mu dibàtiiza. Tudi ne maalu masokoka manène wònsò aa atwikala ne cyà kutwàla mu Bitampì Mwandamutekète ebi, ne kunujaadikila ne abi bìvwa bitampì bìvwà bikanga ku mèsù à bantu. Ne dikwàcisha dyà Nzambi, nènùjaadikile ne kabàvwa mwà kumwenena Aci ku Bible nànsha (Dìbà adi, bushùwà, piikalabi ne Bible mmwambè nànkù nenùcìtàbùjè.), bwà ne kabàvwa mwà kumòna cintu nànsha cìmwè to ànu “Taatù, Mwànà, ne Nyumà Mwìmpè” too ne dìbà edi. Kabàvwa mwà kumòna ne kakùvwakù ifernò wa Cyendèlèlè to, too ne ku cikondo eci. Kabàvwa mwà kumòna ne kùvwa dikùbiibwa dyà Cyendèlèlè dyà kadi-...Ndi njinga kwamba bwà mwena kwitabuuja mulelèlè to. Mu bushùwà bwà bwalu, kùdi ditentula dyàcì kacya ànu kwònsò eku, mwadi mulubidile ùvwàbo buumvwija. Kì bwà cinyi bantu...Bàdi bàmba ne: “Mòna's, tàngilàayi ba-Presbytériens ne bikwàbò, bânwa mfwankà, banwa maalà, ne bikwàbò byònsò, kàdi bàmba mùdìbo ne dikùbiibwa dyà Cyendèlèlè.” Èyowà, kàdi, nudi numòna's, aci's mbwà—aci's mbwà kupangisha Mpungi mulelèlè.

181 Tùjandulàayi Kaaba aka ne tujandule ne Mpungi ní

mmudile, ne kanwena mwà kubangila ku Genèsè too ne ku Bwàkabuulwibwà, mpàla ne nyimà, pàdì citampì eci cikangudiibwa; nwamònu's, piikala bintu ebi mwà kubuuludiibwa.

¹⁸² Mpindyewu, kaa, mwanèètù! Mwya ndyàmbidila ne mwya ànu. . .Nebikèngele bwà ncilekèlè ciya too ne ku cikondo cyàlonda cingààlwà mwab'ewu. Ncicìdì ne mabèji matwè ku àsambòmbò kaaba aka; anyì—anyì, bîmpè, to, tudi ne mudimu wa dibàtiiza ùdì ne cyà kwenjiibwa. Ngánji mbale eci, ndambù wa tuntu tukesè etu ànu kaaba aka, cidimu cyà Cyanga. Èyo.

¹⁸³ Mpindyewu, nudi—nudi bwònsò munkaci mwà kufùnda Mifùndu anyì? Mu Yelèmiyà 32, ne kubangila ku mvensà mwi6 panwikalà. . .nèku panwàfikilà kumbèlu, nwènù baswè kucibala. Mpindyewu, Yelèmiyà, bwà nwènù kumòna cidì mukàndà movùnga ewu umvwija, nengánji kulopola eci. Twangatààyibi mukàndà movùnga ewu tung, nànsha nànkù. Aci's necìmpèeshe tusunsa tukwàbò tutwè ku dikumi, bwà mukàndà movùnga awu. Mpindyewu, nudi bavùluke ne, Mukàndà ewu uvwà mutwà bitampì. Mpindyewu, mukàndà mu cikondo cyà Bible kawùvwa mukàndà wà matumba ànaayi bu mùdì ewu to. Úvwa mukàndà wà mùshindù ewu, úvwàbò bàbiikila ne mmukàndà, “movùngu.” Mbanganyì bàdì bamanyè nànkù? Uh-huh. Bushùwà's, cìvwa mmukàndà movùnga. Èyo.

¹⁸⁴ Mpindyewu, Mukàndà ewu—ewu úvwa mukànga ne bitampì mwandamutekète. Mpindyewu, Cìvwa m'Bible ne Úvwa mukànga ne bitampì mwandamutekète. Nèku tàngilàayi mpindyewu mùvwà eci cyenza.

¹⁸⁵ Yelèmiyà, pàvwàye—pàvwàye ne cyà kwikala. . .wàkamba cipròfetà bwà neùmushiibwe. Mu Yelèmiyà mpindyewu, nshapità wa 32. Bàvwa ne cyà kuya nendè mu bupika mu Baabùlòonà, bàvwa ne cyà kushààlamù bidimu makumi mwandamutekète. Úkaavwa mucyambe mu cipròfetà. Ne nwènù babadi bàà Bible nukààtu bacibalèbàle misangu yàbùngì. Nèku bàvwa ne cyà kuya nendè muntwamu munda mwà bidimu makumi mwandamutekète. Nèku yèyè—yèyè úvwa bushùwà cilongo cyà mu dísù bwà mwànà wa tatwèndè mukwàbò uvwa mufwè. Mwànà wa tatwèndè mukwàbò (H-a-n-a-m, e yìbidì, I) Hanameel, Hanameel, Hanameel, yèyè úvwa. . .cilongo cyèndè cyà pabwìpì. Nànkù yèyè úvwa mumanyè ne—ne mwena lukuna úvwa mwà kulaminyina—kulaminyina—mabèji ne bikwàbò byà mwaba wèndè, kàdì pàvwà. . .Úvwa mumanyè ne Nzambì kàvwa mwà kulekela cisàmbà Cyèndè nànsha, nànkù awu pààlukilabo, bwà wàmòna mwà kupeta ne kwikala mwena-cintu mumanyike bwà bumpyànyì, ki cyàkenzàye: úvwa naaci cyònsò cilaminyina mu mifùndu.

¹⁸⁶ Mbanganyì bàkaadikù bacibalè? Èyo, nukààdi bacibale, nukààdi bacibalebàle. Èyo. Mpindyewu, wàkangata ne kuwùtwa

citampì ànu menemene mùshindù ùvwà mivùngu eyi mikànga amu. Ncintu citambe bulenga, ne cyà dikèma cinùkààdiku bamòne.

¹⁸⁷ Mpindyewu, néntètè bwà kucileeja ne cipese cyà dibèji, ncyèna mumanyè ní ngàakòdkesha anyi to. Mpindyewu, ki mùshindù ùvwaci cìfùndìibwe ewu, mùshindù ewu. Mpindyewu, ùvwà ùcyènza nàнку ne ùcikanga mùshindù ewu, ku dibèji ne dibèji dyònsò. Mpindyewu, cìvwà cyenzeka, pa dìnà citampì cyònsò mùvwà mufùnda bumpyànyì bwèndè ne cìvwà cyenzèke, ne bwònsò bààkafwà kumpàla kwèndè ne mùshindù wàkafikaye ku dicìpyàna. Bìvwà byònsò bikànga ne citampì mùshindù awu.

¹⁸⁸ Mpindyewu, ki mùshindù awu ùdì Nzambì naawu ne Mukàndà Wèndè mukànga ne bitampì awu. Mpindyewu, ànu mùdìYe ùtaatula eci amu, dibuulula adi didi dyàlukila mwònsò amu ne dinyunguluka eku ne eku too ne paanyimà pàà Mukàndà. Kì bwà cinyì udi mwà kwangata Dìnà dyà Yesù Kilistò ne kwenda Naadi kuumukila ku Genèsè too ne ku Bwàkabuulwibwà ne kuleeja ne cintu pààci ne “Taatu, Mwàna, ne Nyumà Mwìmpè to.” Nwamònu anyi? Nwamònu’s, cìdi cìpìcìla mu Bible mujimà, Cìdi cìcìbuulula.

¹⁸⁹ Pashìishe wàngatè bu ne: “Kùdi ifernò wa Cyendèlèlèlè.” Udi ucìpulumuna ne utwà naaci eku ne eku kwònsò; kacya kakuvwakù ifernò wa Cyendèlèlèlè nànsha bwalu ku cibangidilu Nzambì wàkamba ne ifernò wàkafùkiibwa bwà dyabùlù ne banjèlò bèndè, bwà dinyookiibwa dyàbò dicìwalwà. Dìbà adi pìkala ifernò wa Cyendèlèlèlè, mmunyi muvwaye mwà kwikala mufùkiibwe? Mwàkù bufùki kawùvwà. . . Mwàkù Cyendèlèlèlè mbwena kwamba ne: “utukù kàyì ne mbangilu anyì kàyì ne ndekeelu to.” Dìbà adi kuvwa misangu yònsò ifernò pìkalabi ne ng’ifernò wa Cyendèlèlèlè: “kùvwà ifernò dibà dyònsò dìmwèdìmwè edi, dìbà dìmwèdìmwè dìvwaku Nzambì adi kùvwà ifernò, bangabanga ne kwikalakù dìnà mpèkaatù ifernò ùvwà ànukù.” Huh! Kaa, ekèlekèlè! Nwamònu’s, kabyèna mwà kwenzekakù to.

¹⁹⁰ Nàнку nudi numòna pàdì bintu ebi byènda bìdikangula nkààyabi, bìdi byàlukila paanyimà ne bikàngula Mukàndà awu. Nàнку mpindyewu eci cìdi cìfila cimfwànyì cyà Bible mujimà, ne bitampì bìdi Bible musokoke ku mèsù à beena meeji ne badìmuke. Nzambì, ku Nyumà Mwìmpè, ùdi ubikàngula mùshindù ewu ne ùbibuulula buludi eku ne eku kwà Bible. Butùmì kùdi Nzambì!

¹⁹¹ Mwanèètù, ndi nkwambila ne, aci cìdi ànu cicyònkomoja kafwàbudyàdyà kàànyì—kàànyì kàà nyumà. Nwamònu anyi? Nwamònu anyi? Mpindyewu, tàngilààyì kuneeku! Nwamònu’s, cìdi—cìdi cìmwè-. . . bu. . . Nudi bumvwè cìndì njinga kwamba aci anyi? Nwamònu’s, ki cyòci eci, citampì. Mpindyewu, nwènù batàngile ne babale mwab’ewu, elààyi mèsu ku Yelèmiyà nènku

nenùmòne mùshindù ùdiye—ùdiye—ùdiye—ùdiye mucitwe citampì.

¹⁹² Mpindyewu, ki Mukàndà ngwǎwù, mmbifùndamù. Mpindyewu, ànu mu cikondo cyà dibuulula dyà kumpàla adi, dībà adi ndidìYe ùkàngula citampì eci. Mpindyewu, nudi nutàngila ne numòna civwà citampì cyà kumpàla patwáfika ku Bitampì abi. Pashùishe dībà dyà citampì ciibìdì, Ùdi ùpulumuna citampì cidì cilondà. Kàdi nudi bamanyè kutùkàadi anyi? Tukàadi twamba kufika ku citampì cyà mwandamutekète mpindyewu mene. Nènku pàdi cyà mwandamutekète. . .

¹⁹³ Pàakakàngudiibwa citampì cyà kumpàla, mpungi wa kumpàla kudilayè ne cipùpù cyà kumpàla kukùlukaci. Pàakakànguka citampì ciisambòmbò, mwisambòmbò kudilayè ne cipùpù ciisambòmbò kukùlukaci. Cìtàngilaayi ànu, ncintu citàmbe bulenga cinutùku kacya bamòne. Nènku pàngènza nàнку, nènkakèbe mboodi munène, munène wa menemene, kulwa nendè mwab'ewu kàdi kucilongeshila ànu lwà mwab'ewu, bwà twàmòna mwà kwangata dībà dyàbùngì pa citampì ne citampì cyònsò ne kwalukila ne kwangata maalu-malonda ne bikwàbò, ne kuleeja ànu patòòke dībà dyàkenzekaci, ne kuleejila ànu mu Bible emu pàdiYe mwàmbè ne ncifwànyine kwenzeka, ne ànu menemene dībà dyàkenzekaci, ànu ditùkù dyà ngondo ne bikwàbò byònsò. Ndi naaci, amen, mucipetèle kùdiYe. Ncyà bushùwà. Ki bitampì abi's.

¹⁹⁴ Mpindyewu, pàakafùndà Yelèmiyà mukàndà ewu, wàkatwà citampì. . . Eci ke cintu cimpè cindì muswè bwà nwènù kumòna, nwènù bwònsò bàdi bacibala, cyà ne mukàndà mukànga ne bitampì awu. . . Mpindyewu, vùlukàayi ne, yèyè ùvwa ne cyà kuya. Ùvwa mwambè cipròfetà. Mpindyewu, yèyè kàvwa mucimanyè to, ànu ku cipròfetà cyanàanà. Nudi nundonda anyi? Ku cipròfetà ùvwa mumanyè, ku dibuulula dyà Nzambì, ne bàvwa ne cyà kuumushiibwa mu ditùnga adi munda mwà bidimu makumi mwandamutekète. Nudi bavùluke mwàkambàye cipròfetà aci anyi? Neikalemù mu bidimu makumi mwandamutekète, bàvwa ne cyà kwikala mu bupika. Pa nàнку ùvwa muswè kwikala mutwishiibwe ne citampì eci (mbwena kwamba ne bumpyànyi bwèndè) civwa mwà kwikala cilamiibwe, bwalu wàkadi ne. . . ùvwa mupyàne bumpyànyi bwà mwànà wa tatwèndè mukwàbò. Pa nàнку ùvwa mwàncifunde cyònsò, bilondèshile mikenji. Kàdi wàkenza naaci cinyi? Bwà kacilù kubola anyi kukwàta dimòmènà, wàkacitèeka mu dibùngù dyà buloba; ne kucisokoka bwà kacilù kubola anyi kukwàta dimòmènà, too ne pùkàla bidimu makumi mwandamutekète abi mwà kupita.

¹⁹⁵ Butùmbi kùdi Nzambì's wè! Mvwa ntèkemena ne nudi bafwànyine kucibàkula's! Nudi numòna cyàkenza Nzambì anyi? KàakaCìbuulwila beena meeji ne badimùke nànsha (bifwànyine byà bààlwà kukòkanganyinaPù munda mwà cikondo cyònsò

eci), kàdi Yèyè wàkaCitéèka mu Dibùngù dyà buloba ne WàkaDifùkila Mwan'Èndè Sungasunga, Kilistò Yesù. Nènku mu ditùkù dyà ndekeelu edi mpindyewu Yèyè ùdi ùkàngula bitampì ne ùcileeja kùdi Èkèleeziyà Wendè. Cilaminyina mu Dibùngù dyà buloba bwà kaCilù kubola anyi kukwàta dimòmèna to! Àlèluuyàh! Kaa! Ndi mumanyè ne nudi nwela meeji ne ndi munsantu mubunguluki wa mu malaba. Pàmwāpa ke cīndi. Nudi numōna anyi? Kādi's ki Cyôci aci! Cīvwa cilaminyina civungila mu Dibùngù dyà buloba ðivwà ðipikula ku buloba, kubīika mu ðindà dyà Paasàkà mùvwà cītampì cyà lufù kaciyi mwà kuMulama ntàntà mule to; kàdi Yèyè wākacibula bitampì ne kubīika, ne kujaadika patòoke Yèyè mwinè mu matùkù à ndekeelu aa ne Udi ne mwoyi! Yèyè ùdi mu Èkèleeziyà Wendè! Yèyè ùdi umwèumwè awu makèlèlèlè, leelù, too ne kashidi. Kādi aci's ncisokoka seminère, mbisokoka malongolodi.

¹⁹⁶ Ne mu matùkù à ndekeelu aa Yèyè ùdi ùDìbuulula ku Bwikadi Bwèndè Yèyè mwine munkaci mwà bantu Bèndè. Ùpeta muntu kampànda udiYe mwà kupàtula bukwapànù mu yèyè ne bintu munda mwèndè, bwena èkèleeziyà munda mwèndè, bwà Wàmōna mwà kwakwila ku yèyè ne kubuulula ne kukangula bitampì ebi mùshindù ewu Yèyè mwinè. Nwamōnu anyi? Àlèluuyàh! Kaa, kanwènaayikù baMunangè anyi? Èkèlekèle, èkèlekèle, èkèlekèle!

¹⁹⁷ Ndongamu wetù wa lupàndu, umwèumwè awu mpindyewu munkaci mwà kubuuludiibwa mu Yesù Kilistò. Mmuniyì mùvwāYe ubuulula mu matùkù à ndekeelu aa? Kupicila ku dikàngula Dyèndè dyà citampì. Mōna's, muntu nànsha umwe . . . Kacya kùtukù mwanji kucyùmvwā cifundiibwe mu nsòmbelu webè pa bìdi bitàngilà Dimiinu dyà Abraham, mùshindù wākāpicilabo mu dibingishiibwa, dijidiibwa, dibātiiza dyà Nyumà Mwimpè; mùvwà mwanjèlò awu mwà kulwa mu matùkù à ndekeelu awu, mwikale ne nyimà wèndè mukoma disangisha ne kwamba ànu menemene cīvwa Sarah munkaci mwà kwela meeji mu mwoyi wèndè munda mwà nzùbu, aci kacivwaku too ne ku ditùkù edi nànsha, ncyà bushùwà, ki ditùkù ndyòdi edi; ne ðiitabuuja dyà Abraham; ne Dīnà dyà Mukalenge Yesù.

¹⁹⁸ Mpindyewu, cintu cìmwèpelè mwab'ewu, ndi ne bintu bitaanu mwab'ewu bìndi muswè kwakula, ànu bwà katanci cyanààna, ànu ne lùkàsà ne mwànyì mwònsò. Tàngilàayi. Mwandamutekète. . . Kùdi bitampì mwandamutekète, ne kùdi mwandamutekète yītaanu mu ndongamu wa bupikudi wa Nzambi. *Itaanu* n'nombà wa "ngàsà." Mbanganyi bàdi bamanye nànkù? Y-e-s-ù [J-e-s-u-s, mu Anglais—Muf.], d-i-i-t-a-b-u-u-j-a [f-a-i-t-h, mu Anglais], itanu n'nombà wa ngàsà. *Isambòmbò* n'ditùkù dyà muntu, ne *mwandamutekète* ke ditùkù dyèndè—dyèndè dyà bupikudi.

¹⁹⁹ Mpindyewu, tàngilàayi. Mpindyewu, kùdi bitampì mwandamutekète mu cyôci eci, anyi—anyi bitùpà

mwandamutekète mu ndongamu munène wa bupikudi ewu. Kùdi binganyi mwandamutekète? Bitampì mwandamutekète byà bupikudi, Nyumà mwandamutekète yà Nzambì. . .Tudi tusangana ne, wèwè muswè kumòna ní bìdi byàmba *Nyumà Mwandamutekète*, lekèlaayi mmònebi kaaba aka ànu katanci kakesè cyanààna, nshapità mwi5, kubangila ku mvensà mwi6 ngèèla meeji, tudi tumòna kaaba aka, mvensà mwi6:

Nènku. . .mònaayi, ne, mònaayi, munkaci mwà nkwaswa wa butùmbi ne bifukùbwà binaayi, ne munkaci mwà bakùlù, mùvwa mwimanè Mwànà wa mùkòdòkò mwenze bu mukòsa muminu, mwikale ne mitù mwandamutekète ne mèsù mwandamutekète, bìdi biikale Nyumà mwandamutekète yà Nzambì mitùma mu buloba bujimà.

²⁰⁰ Nyumà mwandamutekète ayi ncinyi? Baamisànjeela mwandamutekète abu. Kùdi Colomba Munsantu, ne Irénée, ne—ne John Wesley, ne Martin Luther, ne bakwàbò. Nwamònu's: "Nyumà mwandamutekète," yìdi bantu mwandamutekète (banjèlò mwandamutekète), yìdi mikenji mwandamutekète.

²⁰¹ Bitampì mwandamutekète, Nyumà mwandamutekète, banjèlò mwandamutekète, nsèngu mwandamutekète, ne èkèleeziyà mwandamutekète. Nwamònu's, mwandamutekète misangu mwandamutekète, kùdi mwandamutekète yìtaanu, bìdi ne, *mwandamutekète* "mbupwangane," *itaanu* "ngàsà," Ngàsà wa Nzambì kùdi Bikondo Byèndè Mwandamutekète byà Èkèleeziyà. Mìsànjeela Yèndè bantu mwandamutekète, Nyumà Yèndè mwandamutekète yà Nzambì, bitampì bilongolola mwandamutekète byà bupikudi (tudimù ne kasukì mpindiyewu's), *nsèngu* mwandamutekète yìdi yùmvwija ne "bikondo mwandamutekète."

²⁰² Bwalu, *lusèngu* mbwena kwamba ne "bukalenge." Nudi bavùluke cifulu cyà butùmbi cyàkalwà pa nyama wa lwonji (lusèngu) mu Danyèlè, ne bikwàbò anyi? Nwamònu's, mbwena kwamba ne bukalenge, anyi "bikondo mwandamutekète." Nènku, vùlukàayi ne, Yesù wàkamba ne: "Bàmwè bààkaditwa mu tulù mu cilù cyà kumpàla, cikondo cimwè; bakwàbò mu cilù cyàkalonda, cikondo cyàkalonda; cyàkalonda; ne cyàkalonda; ànu nàнку too ne ku cilù cyà mwandamutekète. Kàdi mu cilù cyà mwandamutekète Mubàki kulwa, nènku dībà adi bwònsò bwàbò kutàbulukabo." Nudi bavùluke aci anyi?

²⁰³ Pa nàнку "mbikondo" mwandamutekète bìvwà *nsèngu* mwandamutekète, ne *maèkèleeziyà* mwandamutekète, anyi "mwandamutekète bi- . . .bipungu byà mubidi wà beena kwitabuuja." Kaa, Bìdi ànu bipwàngàne ne mwàbì mwònsò. Yelèmiyà . . .Èkèlekèlè, "Mukàndà," "bikondo," mùshindù wàkapikudiibwabi's! Mmunyi . . . [Katùpà kàà mukàbà wa mèyi munda mutupù—Muf.] . . .ànu apa mene.

204 Bitampì mwandamutekète ne cyà ndekeelu aci, pàdibi bikàngudiibwa, cidi cisanganyiibwa mu Bwàkabuulwibwà nshapìtà wa 10, kwàkadi Mwanjèlò wa bukòlè (ùvwa n’Kilistò) wàkatùùluka ne kutèeka dikàsà òmòwè pa buloba ne òmòwè pa mbù, ne kwela cyanza Cyèndè muulu ne kwamba ne: “Ditùkù dyàjiki. Cikondo ncijike. Kwàcì nkujike. Kakwàkwikala kàbìdì cikondo to.”

205 Ki kwambaYè ne: “Ku dyela dyà mpungi wa...ku cikondo eci, bwalu busokoka bwà Nzambì nebùwikale bujikè.” Nzambì nganyi ne mwàkamwèneshiibwàYè; mùshindù mene pàakakàngudiibwa citampì aci, mùshindù utùdì babange kuumvwa mpindyewu mùvwàYè Mwànà wa Nzambì, Yèyè ùvwa Nzambì Mwiinè muDìvwije mubidi; ne dibuulula dyà ne Yèyè ùdi Nganyi; aci’s cìvwa ne cyà kujika kumpàla kwà Mwanjèlò ewu kutèeka makàsà Èndè pa buloba ne pa mbù ne kucipa ne “kakwàkwikala kàbìdì cikondo to” pààfika cikondo eci. Tudi mene bakùngàmàngànàngàne naaci patùdì twakulangana apa. Nwamònu anyi?

206 Cyà ndekeelu cyà ku byònsò m’Bwàkabuulwibwà 10: “Dikàsà pa buloba ne pa mbù,” cikondo cimanè kujika, bupikudi mbujikè, nènku mpindyewu Yèyè ùdi ùbwela bu Ntambwe. Yèyè ùvwa Mwànà wa mùkòòkò díbà adi, mpindyewu Ùdi ùbwela bu Ntambwe wa cisàmbà cyà Yudà.

207 Mpindyewu, lekelàayi mbale ànu cidi cishàale eci bwà ngàmòna mwà kucifikisha kunùdì ne lùkàsà lwònsò mpindyewu, ne mvensà wa 8:

Nènku pàakangatàye mukàndà, bifùkùibwà binaayi ne makùmi àbìdì ne...ne bakùlù makùmi àbìdì ne binaayi byàkapòna pànshì kumpàla kwà Mwànà wa mùkòòkò, yònsò wa kùdìbo mwikale ne nzènzè, ne mpànzà yà ngòlò myùle ne mapembu, . . .ne masambila à bansantu.

208 Mpindyewu, eci ke cikondo cidi bintu byònsò ne cyà kwikala mu dikuukwila. Mpindyewu, vùlukàayi, mùshindù ùdibi bikumbànyine. Mpindyewu, eci kacitùpiciku mpindyewu nànsha. Tèelejàayi ne ntèmà. Pàvwà maalu masokoka wònsò à cikondo cyà èkèleeziyà majikè, pàvwà maalu masokoka wònsò à ndongamu wa bupikudi, bitampì mwandamutekète abi byàkakàngudiibwa. . .dyàkàmwè paanyimà pà cyòci eci mpindyewu, tàngilàayi, díbà dyàkànyì bwà—bwà byònsò, bintu byònsò mu Dyulu ne byònsò pa buloba bwà kukuukwila Nzambì. Mpindyewu, tàngilàayi cidi cyènzekà. Tèelejàayi ku. . .cidi, tèelejàayi ànu eci katanci kakese cyanàànà:

Ki kwimbabò musambu mupyamùpyà, bàmba ne: Wèwè udi mukumbànyine. . .

209 Tèelejàayi ne cìvwa ndikuukwila dyà mùshindù kaayi adi’s wè! Bakùlù, bifùkùibwà, byònsò byàkapòna ànu kumpàla

Kwèndè, nwamònu's, mùshindù awu, pààkenzàYe ndongamu Wendè mu kaabujimà. Ncikondo cyà dikuukwila mpindyewu, nwamònu's:

Nenku bààkimba musambu mupyamùpyà, bàmba ne: Wèwè udi mukùmbànyine bwà kwangata mukàndà, ne bwà kukàngula bitampì byàwù: bwalu wàkashipiibwa, ne wakatùpikula bwà Nzambi ku mashi èbè mu cifuku cyònsò, . . .mwakulu, ne cisàmbà, ne ditunga;

Ne Wèwè ngudi mutùwujè bamfùmù ne baakwidi bwà Nzambi: ne netùkòòkeshè pa buloba. (Tèèlejàayi, misùukà mipikula ayi mùdiyi yèla mbila kuntwaku. Hmm!)

Nenku mèmè kutàngila, ne kuumvwa dîyi dyà banjèlò bàabùngì lwà mu nyungulukilu wa nkwasà wa butùmbi amu ne bifùkùibwà ne bakùlù: ne bùngì bwàbò bùvwa binunu dikumi kuvudija ku binunu dikumi, ne binunu byà binunu; (Byònsò mu Dyulu bidi bikuukwila Mwànà wa mùkòòkò ewu, nwamònu's.)

Byàmba ne dîyi dikolè ne: Mwànà wà mùkòòkò mmukumbànyine (Àlèluuyàh! Àlèluuyàh!) wàkashipiibwa bwà kupeta bukolè, ne mabanji, ne lungenyi, ne dikàndà, ne luumù, ne butùmbi, ne dibènesha.

²¹⁰ Tèèlejàayi: “Ne cifùkùibwà cyònsò!” Tèèlejàayi cyàkenza Yone aci:

Ne cifùkùibwà cyònsò cidi mu dyulu ne pa . . .buloba, ne mwinshì mwà buloba, ne bu mùdi bìdì mu mbù, ne byònsò bìdimu, kunguumvwabi mèmè (Yone) ngàmba ne: Mabènesha, . . .luumù, . . .butùmbi, . . .bukolè, bikalè kùdì ewu udi musòmbe pa nkwasà wa butùmbi, ne kùdì Mwànà wa mùkòòkò bwà kashidi ne kashidi.

²¹¹ Yone ùvwa ne cyà kwikala mupete wendè Mpenta wa nkàayendè. Kwambayè ne: “Cifùkùibwà cyònsò mu Dyulu, cifùkùibwà cyònsò pa buloba, cifùkùibwà cyònsò mwinshì mwà buloba, cifùkùibwà cyònsò cìvwa mu mbù, kunguumvwaci ngàmba ne: ‘Amen, butùmbi, luumù, bukolè, ne mabènesha, bikalè kùdì Yèyè udi musòmbe pa Nkwasa wa butùmbi awu, Mwànà wa mùkòòkò awu.’”

²¹² Cikondo cyà dikuukwila! Amen! “Mbacyènzè bìshi?” Dîyi Dyèndè ndyòdi edi, nwènu . . .bwònsò bààkadyumvwa.

Ne bifùkùibwà binaayi kwambabi ne: Amen. Udi wambilamu, Yone, ela mbila ne uMutùmbishe ne dîyi dikolè ne mwèbè mwònsò. Cidi . . .

. . .kunguumvwa mèmè ngàmba ne: Mabènesha, Amen, butùmbi, lungenyi, bukolè, ne dikàndà . . .

...Ne bakùlù makumi àbìdì ne banaayi kuponabò panshi ne kukuukwila ewu uvwa mushikàme...udi ne mwoyi bwà kashidi ne kashidi awu.

213 Bwalu bulonda bulenga kaayi's wè! Mpindyewu, ncyèna ne díbà to. Ndi mucifunde, dyumvwija kampànda bwàci kaaba aka, kàdi disangisha dyètù dìdì d'ilondà kumpàlà kwà twètù kubwela mu eci...Pàmwāpa pàngìkàla mwalukile ku diikisha dyànyì anyi cikondo kampànda cikwàbò, ndi muswe kwangata mbingu makumi mwandamutekète yà Danyèlè eyi ne kuyiswikakajilamù, ne kucìleeja kuyaayàci kafikisha ku Cyanga cyà Mpenta, ne kucyàluja pàmwè ne ndon...mwandamutekète ayi ne bitampì mwandamutekète abi bwà kubikangwila ànu mwab'ewu kumpàla kwà twètù kuya, ne kuleeja ne cikaadi ku ndekeelu, ebi...

214 Mwànà wa mùkòòkò, Maasiyà, Mfùmù awu, ùvwa ne cyà kulwa ne bivwa ne cyà kwikala munda mwà mbingu makumi mwandamutekète (aci's mbidimu mwandamutekète) byàkambiibwa mu cipròfetà bwà cisàmbà Cyèndè. Nènku Mfùmù ewu ùvwa ne cyà kuumushiibwa munkaci amu, aci's mbisàtù ne citùpà, cyàbìbìdì cyà mwandamutekète's nyisàtù ne citùpà, biikalaye mwà kuumushiibwa. Ne mulàmbù wà ku ditùkù ku ditùkù newùmushiibwe; ne cinyangu cidì citwala dibungama (cidì Mosquée d'Omar mwashila mu mwaba wà ntempelu ditùkù dyàkooshabo ntempèlu adi), nènku díbà adi kùdì bidimu bisàtù ne citùpà bìcidì bishààle bwà Izàlèèlà.

215 Nènku Kilistò wakalwa kuyiisha ne kwamba cipròfetà ànu bidimu bisàtù ne citùpà menemene, ki mulàmbù wà ku ditùkù ne ku ditùkù kuumushiibwawù, bintu byònsò ànu menemene mùvwabi ne cyà kwikala. Ne Mosquée d'Omar ùvwa ànu...wàkibakiibwa pa mwaba ùmwèùmwè awu ne ùdipù too ne leelù ewu. Nènku nebùùpule bimanu byà Yèlusàlèlà too ne pààjika cipungu cyà bàà Bisàmbà byà bendè, Èkéleeziyà mmwambwibwe (Musungula awu, Mukàji-musèla) muumùshìibwemù.

216 Nènku bapròfetà bàbìdì, Eliyà ne Mòsà, bàkudimuka kùdì Izàlèèlà bwà bikwàbò bidimu bibidì ne—bibidì ne citùpà...bidimu bisàtù ne citùpà. Ncintu cilenga citàmbe panùdì numòna citwàdiibwa.

217 Nudi baMunangè anyi? Ne mwoyi wènù wònsò? Nudi bumvwè mpindyewu civwà Mukàndà ùvwa mutwà bitampì Mwandamutekète awu umvwija anyi? CidiWu ng'eci: tudi naaWù, “mu muvungu,” mpindyewu. Nènku vùlukàayi ànu ne, ànu mu matùkù à ndekeelu aa...Civwa cilama mu Dibùngù dyà buloba. Nudi bumvwe aci mpindyewu anyi? Kàdi Nganyì uvwa Dibùngù dyà buloba adi awu? Yesù Kilistò. Kakuvwa muntu uvwa naaWu to, muntu nànsha umwe kàvwa naaWu to, ùdì ànu mu Yèyè. Kabivwa nànsha bifunda mu Díyi to. Bu Byòbi bifunda

mu Dìyì, bìvwa bisokoka mu mùshindù wà kanùyì mene mwà kuCijandula to. Ncyà bushùwà. Nànkù Cìdì cibүүлùdìibwe mu Yèyè, ne mu Dibùngù dyà buloba adi bwà kaCilù kubola anyì kukwàta dimòmèna nànsha.

218 Ne pashìishe Ùlwalwa ne ùpulumuna cìmwè bwà Èkèleeziyà Wendè, ne wàmba ne: “Nwamònu’s, Ndi umwèumwè awu makèlèlè, leelù, too ne kashidi. Nwamònu anyi? Nwamònu anyi? Mpindyewu, nutu misangu yònsò nudikonka anyi—anyi ngènzàmpèkààtù mukwàte ne luse mmufwànyine kwoshika bwà Cyendèlèlèlè anyi mmufwànyine ànu kushààla mubùtùdiibwe paanyimà pàà mùliyò mujimà wà bidimu. S’ki bwalu abu. Mùshindù awu ki wùvwàbi. Kakwènàkù cintu pààci ne ifèrnò wa Cyendèlèlèlè to. Kèna mwà kwikala wa Cyendèlèlèlè to, bwalu ndi . . . ifèrnò kàvwa Naanyi paNgàakatwadija kale wàwa to. Ngàkamufùka bwà kunyookelamù beena lwonji. Nwamònu anyi? Cyùdì ukwàcikila bwòwà ncinyì, nwamònu’s, bwà Dimiinù dyà Abraham ne bikwàbò byònsò ebi? Ànu. . .” Aci’s cidi ànu—ànu mutù wàci wà bwalu, nwamònu’s, kàdi panwàbwela mu mùshindù ùdì Nzambì ukangula bitampì abi, ne ùbileeja, bìpweka ànu nànkù; nudi numòna’s, panwàbimòna, dîbà adi kwèna mwà kuumuka ku Mukàndà ewu to. Bitampì abi . . .

219 Wèwè udi wamba ne: “Kaa, cìtampì cìvwa cyùmvwija cintu kampànda cikwàbò, Mwanèètù Branham.”

220 Ànjì indilà kakesè! Cìdì ne cyà kunwangana ne *Cikampànda*, bwalu cìvwa cìtwa cìtampì lwà paanyimà pàà *Cikampànda* bwà kubuulula *Cikansanga*. Cidi . . . Ncinyì aci? Cìvwa ncinyì? Apa, bu mùdì apa, Yelèmiyà. Udi wamba ne cintu *kampànda* cyàkenzeka; wèwè kupulumwina *eci* pambèlù ne, ki mwaba ùdidci ewu. Èyo. Upaasula *cyàcya* ne wela mèsù paanyimà apa, ki mwaba utùdì tubala cyàkenzeka aci. Èyo. Upaasula *eci* nùnkù kaaba aka, tângila kùnu, nènku ke cyàkenzeka aci. Nwamònu’s, ki cintu cìmwècìmwè aci cìdì Mukàndà ewu, nwamònu’s, paanyimà pàà cyòci aci.

221 Bàdì bàmba ne: “Èè, ncyèna mwà kuumvwa to. Bàmwè bààkamba ne: ‘Taatù, Mwànà,’ ne bàmwè ne: ‘Nyumà Mwìmpè,’ ne bàmwè bààkamba ne: ‘Dìná dyà Yesù,’ byònsò byà mùshindù awu.”

222 Mbisokoka bidimu byònsò ebi. Kàdi mpindyewu ki yèyè ewu, ùdì wàlukila buludì, ùdì wàlukila buludì bwà kuleeja ne kùdì Nzambì ànu umwèpelè. Kacya kùtu ànu Nzambì umwèpelè. Aci’s ncilelèlè. Ne Dìná Dyèndè . . .

223 Mbyenze ànu bu Mukàndà wà Maatàayi, 28:19, “Ndàayaaku, nùkalongèshè matùnga ònsò, nùbàbàtiiza mu Dìná dyà Taatù, Mwànà, Nyumà Mwìmpè,” ne Taatù kî ndìná to, ne Mwànà kî ndìná to, ne Nyumà Mwìmpè kî ndìná to. Mpindyewu, neùbàbàtiize bishi? Neùbàbàtiize mu dìnà kaayi, pàdìbì ne wòwò awu kî mmènà nànsha? Dìbà adi ncinyì? Kwàkubàbàtiiza mu

dínà nànsha òm̀wè to, díbà adi. Aci's nCilongelu cyà Bapròfeta cyàkàbìdì's, nwamònu's.

224 Pashìshe udi walukila lwà pa kaaba aka, ne wangacila lwà apa ne ucyàluja paanyimà walukila ku Maatàayi 1, cidìYe mwenze ncinyi? Kucipulumuna ànu ne kucyàlujila kaaba aka ne:

Mpindyewu dilediibwa dyà Yesù Kilistò òm̀wà mu mùshindù ewu: (Kì Nzambi yìsàtù to, mpindyewu, nwamònu's.) Pàvwà... mamwèndè... ùwà mubangila kùdì Yòzefù, kumpàlà kwà kushàalabò pàmwè, kusanganyiiibwayè ne difù dyà Nyumà Mwimpè. (Kì n'Nzambi Taatù to; "Nyumà Mwimpè." Huh?)

... byònsò ebi byàkenzeka, bwà...

Nènku Yòzefù bayendè, ... muntu mwakàne, ... kàyi muswè kumufwisha bundù to, ùwà ùpàngadika bwà kumulekela mu musokoko.

... pa maalu aa, ... pàvwàye wèlapù meeji... mònanyi, mwanjèlò wa Mukalenge wàkamumwènekela mu cilòòtà, wàm̀ba ne: Yòzefù, wèwè mwànà wa Davidì, kùcìnyì to... kwangata mukàjèèbè Màriyà: bwalu udi mwimicìibwe munda mwèndè awu ngwa... (Nzambi Taatù anyi?)... Nyumà Mwimpè.

225 Pàanyi s'mvwa ndyàm̀bidila ne: "Nzambi Taatù ki uvwa taatù Wendè." Ndi ngamba eci bwà dibàtiiza didì ne cyàkwenzeka. Nwamònu anyi? Mèmè s'mvwa ndyàm̀bidila ne: "Nzambi Taatù ki ùwà Tatwèndè." Mpindyewu, anyi Nyumà Mwimpè ne Nzambi Taatù udi Muntu ùmwèumwè awu, anyi Úwà ne baataatù bàbìdì; díbà adi Yéyè mmwànà wa mu matalà, ne díbà adi n'Nzambi wa mùshindù kaayi utùdì nendè awu? Hmm? Nwamònu anyi?

Ne eci cìwà... cyònsò... cyenzeke, bwà byàm̀dona mwà kwikala byujìibwe... cyàkaakwila Mukalenge ku mumpròfeta, ...

... virgò neimite difù, ne àlèlè mwànà wa balùme, ... nebàmwinyikè dínà dyèndè ne Yesù, ... (Ncyà bushùwà anyi?)... Nènku Neàbìkidiibwe ne Emanùwèlè, cidì cùm̀vwija... ne, Nzambi neetù.

226 Mpindyewu, nwamònu's, pàakapululàYe cìtampì, ncinyi cidì cintu cyònsò aci mu kaabujimà kuumukila mu Maatàayi nshapìtà wa 1, patùdì twalukila? Mòna's, Yesù Kilistò. Ki cyàkambà Peetèlò mu Ditùkù dyà Mpenta. Ki cìwà bakwàbò bwònsò abu bàmba ncyòci aci.

227 Mu bushùwà bwà bwalu, byàkakèngela bwà musumbà wà beena Loomò ewu kulwawù kwamba ne: "Kaa, to! Tudi ne cyà kwikala ne Nzambi yìsàtù. Tudi ne..." Bàdi naayi binunu dikumi mpindyewu: kùdì ba-Màriyà ne Cècìliyà Munsantu, Marcus Munsantu, ne Munsantu Kampànda. Nènku ndi ngèèla

meeji ne kùdi nkàmà yìtaanu ne byà mu njila mu Cimenga cyà Mexique. Mukàji kampànda wàkashipiibwa cikondo kampànda kùdi umwe wa ku mananga èndè, nènku bààkalwa mvità bwèndè ne kumushipabo, ki kumuvwijabo munsantu, ne bantu bàdi bakamutondela, ne byònsò byà mùshindù awu abi. Nditèdelela dyà bakishi's wè!

228 Nènku ki èkèleeziyà wa Mishòònyì ulwàlwa ewu ne cidìbo bàbiikila ne Twitabàayi wa Bàpostòlò ne: “Ndi ngiitabuujà Nzambì Taatù wa Bukolè bwònsò, mukùbi wa mauulu ne buloba, ne—ne èkèleeziyà wa Cijila wa Kàtòlikè wa cyena Loomò. Ne ndi ngiitabuujà mu dyakwilangana dyà bansantu, bwobùmwe bwà bansantu.” Beena Mishòònyì bàmbila mwinshi mwà mucipù wà Nzambì, ne bàdi biitabuujà mu bwobùmwe bwà bansantu. Aci's nditèdelela dyà bakishi's! Nwamònu anyi? Pashiishe bàdi bàya kumpàla ne bacyènza, bushùwà, bwalu èkèleeziyà mmwàmbe nànkù. (Èyi Nzambì, mùndì ne disànkà dyà kumanya cìndì mumanyè eci's! Mùndì mene ne disànkà dyà kumanya cìndì mumanyè eci's!) Kabàyi bamanyè ne bàdi munkaci mwà kutwà citampì bwòbò biine ànu kule ne Nzambì, babwela buludi mu midímà yà pambèlù. Nènku kwena mwà kubàmbila bwalu to, bwalu kabèèna mwà kucimòna mu bushùwà bwà bwalu to.

229 Ndi muswè kukonka . . . muntu nànsha umwe kèna ne cyà kwamba eci to. Kùdi bantu bwòbò bakesè ndikumi ne bàtaanu anyi makumi àbìdi, bàdi basòmbe kaaba aka mene, bàvwa bapùile bwà kwela meeji ne mèmè mvwa Yesù Kilistò. Mmuniyì mùdìbo mwà kwenza nànkù? Mvwa ànu mubàtàngile too ne mungaalu kujandula ne Nzambì kungambila ne “cìvwa nyumà kampànda.” Nènku bantu abu, mèmè kwamba . . . Wabwalu bantu abu bàvwa bangiitabùùje, mwaku ne mwaku wònsò. Mèmè ne: “*Mmuniyì* munùdi nungiitabuujà dìbà adi, piikalabi ne mèmè ke udi unwàmbila?” Pashiishe tukafika ku Dìyì, dìbà adi kubangabò kumòna, kwamba ne: “Èè, bushùwà, katùvwa bakwitabùùje to cyanàànà tuvwa kwikala batèèleje cyùvwa mmwàmbe.” Nwamònu mwaba awu anyi?

230 Kàdi bàvwa bèèla meeji menemene ne mbabingè, ne meeji matòoke wònsò. Nwamònu anyi? Nènku umwe wa ku nyumà ayi yèyè mukutwè byanza, wàkupeci's, nwamònu's, kakùyì mpatà to s'neuciitabùùje. Nànsha wèwè, wèwè . . . muntu nànsha umwe kèna mwà kukwambila bùngà bwalu to. Nwamònu anyi? Cyònsò cidi Dìyì mwà kwamba aci, èè, kwèna ànu uDìitabuujà to nànsha byà muniyì; udi uya mutùngùnuka. “Wèwè muswè kwikala mùshindù awu, udi utùngùnuka, kàdi mèmè ndi ne wanyì njila.” Nwamònu's, aci cidi cileeja ne wèwè udi mulaaba kùdi nyumà mubì.

231 Nyumà wa Nzambì neikale mis- . . . Èè, wèwè udi wamba ne: “Kàdi bishi wèwè mwinè, Mwanèètù Branham?”

232 Ndi nkonka ní nganyì ní nganyì . . . Ntu misangu yònsò

pabwìpì bwà ní nganyi yònsò kundeeja cìdì címpè ne cibì, kàdì bikèngela ciikale Dìyì. Kabèèna mwà kwamba... Bikèngela cìfùminè mu Dìyì! Nànku ki mwaba ùdì bitampì ebi bikàngukila. Nènku kanùdìtácishikù to, cyôci citampì necidileeje nkàâyaci kuumukila ku Genèsè too ne ku Bwàkabuulwibwà. Pa nànku ki bitampì mbyôbì abi. Kanwènaayikù baMunangè anyi?

Ndi muMunange, ndi muMunange
Bwalu Yèyè wakannanga kumpàla
Ne wàkampetela lupàndu
Ku mucì wà Kàlvariyò.

²³³ Twinyikaayaaku mitù yètù. Mbanganyi mwab'ewu bàdì kabàyi baMumanyè bu Musungidi wabò, bàdì baswè kuMujinga mu mwoyi wènù? Nudi bamanyè's, ntu ngiitabuuja ku diya dyà ku cyoshelu, ntu bulelèlè nciitabuuja. Ncimpè. Kàdì mu Bible kabàtukù baye ku cyoshelu bwà kusungidiibwa to, bàvwa ànu bàCiitabuujiila mu mwoyi ne bàCiitaba. Mbanganyi bàà ku nwènù bàdì baswè kulwa mu mùshindù wà mu Bible ne: "Bungi bwònsò bwàkiitabuuja abu bàakabàtijiibwa"? Mbanganyi bàdì biitabuuja leelù ewu, bàtu kacya kabàyiku banjì kucyenza kwònsò eku kàdì baswè bwà kujikula patòoke ne uvwa "mupiile" mu njila yèbè, nènku muswè kwitaba Yesù bu Musungidi webè? Nudikù mwà kwela ànu byanza byènù muulu cyanààna ne mitù yènù miinyika, kwamba ne: "Ndi. . ."

²³⁴ Nzambi àkubènèshè. Nzambi àkubènèshè. Nzambi àkubènèshè. Nzambi àkubènèshè, wèwè. Nzambi àkubènèshè, lwà paanyimà. Nzambi àkubènèshè, wèwè. Nzambi àkubènèshè, paanyimà pààpa. "Ndi ngiitabuuja mpindyewu." Nzambi àkubènèshè. Nzambi àbènèshè muntu mulùme udi paanyimà pààpa. Mpindyewu, nudi bavùlùke ne, kî mpambèlù *apa* to kàdì mu mwoyi wèbè, kùdì Nzambi, udi munkaci mwà kujikwila patòoke ne: "Mukalenge, ndi mumanyè ne tukàadi ku cikondo cyà nshìkidilu. Kwànyì nkujikije."

²³⁵ Ditùkù adi mvwa nyiikilangana ne mulunda wanyi mukesè mu cimenga emu, Ngangabuka Sam Adair. Tuvwa basòmbè mu bìrò. Mémè ne: "Sam, ndi munkaci mwà kupeta ntutu yà gaz."

Yèyè ne: "Mmunyi muwàmanyi ne ntutu yà gaz? Lwà ku mwoyi wèbè aku?"

Ki mémè ne: "Èyowà."

²³⁶ Yèyè ne: "Aci's ncifwànyine kwikala ànu lupeepà lubwele mu mwoyi—mwoyi—mu mwoyi—disaamà dyà mwoyi—disaamà dyà mwoyi." Yèyè ne. . . (Mfwilaayikù luse.) Yèyè ne: "Ncifwànyine kwikala disaamà dyà mwoyi."

²³⁷ Yèyè ne: "Mpindyewu, mmunyi mùdì umanya ne ndwà mwaba awu?" Yèyè ne: "Lekèla ngánjibi kukutàngila."

Kungenzaye mateeta, kwamba ne: "To, kwena ne bwalu nànsha bùmwe to."

238 Mémè ne: “Sam, dyônsò dyàlwàci adi . . .” Ndi ne bidimu makumi àtaanu ne bìbìdì, kàdi Sam’s mmukulwànyì ndambù. Mémè ne: “Pààlwàci, Sam, bidimu byônsò makumi àsàtù ebi bìndì mutèèke ku dilwangana bwà kufikisha bantu ku diitabuuja Yesù Kilistò ebi, ne Yèyè ungààkananga ne mukwàcile mudimu cikondo cyônsò awu; kabyàkushintulula cintu nànsha cìmwè to pààlwàYe, nengààlukile Kumbèlu.”

239 Yèyè ne: “Billy, udi mumanyè, mwaba ùntù mpetela disànkà ditàmbe bunène anyi? Mpa kwenzela muntu mukwàbò cintu kampànda.”

Mémè ne: “Aci’s ki mwoyi wà cyà bushùwà.”

240 Pawíkala ne bumpyànyì panu pa buloba apa, mulunda wanyì, mbumpyànyì boonèke. Kàdi tudi twakidila bumpyànyì bùdì kabùyì bùjìmina to. Mwànà mutùùlàvì wàkaya ne kushiya bumpyànyì bwèndè, kàdi kuyayè ne citùpà cyàbò. Pààkalukilàye, bumpyànyì bwèndè—bumpyànyì bwèndè bùvwa bunyangakaja. Kàdi wèwè muyè kule ne bwèèbè, kabyèna nàнку ne Bukalenge bwà Nzambì nànsha, tudi twakidila bumpyànyì bùdì kabùyì mwà kukooyika to. Kwèna muswè kuBwàkidila anyi? Nyèwù kùdi bantu batwè ku dikùmi ne bàtaanu bàdi beele byanza byàbò muulu, bangènzàmpèkààtù bàvwa baswè kwakidila bumpyànyì bwàbò mu dindà emu abu. Nkufwànyineku kwikala mukwàbò anyi bangabanga ne twètù kusambila? Éyowà.

Bitùùlùbitùùlù menemene mpindyewu:

Ndi muMunange, ndi . . .

Angàta dipangadika dyèbè mpindyewu. Pawíkala umvwa ne udi ne cyà kwangata, ke cikondo mene ncyôci eci.

Bwalu Yèyè wakannanga kumpàla

Ne wàkampetela lupàndu

Pa . . . (Nzambì àkubènèshè. Nzambì

àkubènèshè . . . ? . . .)

241 Taatù wa mu Dyulu, mu cinyàànyà cya dîbà edi, tudi tuKutwàdila batèèleji aba, mwikalè mu ngiikàdilù wa butekète mu dindà emu, Mukalenge, nteeta bwà kutwàla Mukenji ewu kùdi bantu bwalu ndi mùbànange. Ndi muswè bwà bàWùmvwe, Mukalenge. Ndi muswè bwà kwelabo lwegò. Ndi muswè bwà bàmanyè ne bintu byônsò ebi bìdì byenjìibwe mu ndambù wa bidimu bishààle ebi kabìvwa ku mpùùkàpùùkà nànsha, uvwa ng’Wèwè, Mukalenge. Uvwa ng’Wèwè uvwa munkaci mwà kukàngula bintu ebi. Nènku, Éyì Nzambì, twètù bwônsò tudi tumvwa ne kumpàla kwètù mene eku kùdi Cyanga cinène.

242 Ndi ndòmba bwà aba bàdi beelè byanza byàbò muulu abu. Mbamanyè ne mbapiile, Mukalenge. Tuntu twàbùngì . . . Pàmwàpa mbapyànekù ndambù wa mfranga kùdi muntu musangu kampànda, kàdi yàkenza cinyi? Kabààkamanya

kwàkayayi to, mijimine ànu mu katanci kakesè, bwalu cìvwa mbumpyànyì bukooyike. Nènkù bu bwòbò mwà kubùshiila mukwàbò muntu, nebùkooyike kàbìdì.

243 Kàdi tudì ne bumpyànyì bùdì kabùyì bùbola to, mbwena kwamba ne, lupàndù, bupikudi, kwalukila ku budimu bwà Edènà cyàkàbìdì. Patùdì twela meeji ku bwalu abu, Mukalenge, nganyì udi kàyì mwà kuswà kwalukila bu Adàmà ne Evà ne kwikala ne mwoyi bu cikondo aci? Cyakudyà cyètù cilongolola ditùkù dyònsò; Taatù wa mu Dyulu mwikale misangu yònsò ànu wenda ùyiikila neetù mu kajila aku; kumòna Bukènkè bunène abu bwènda kumpàlà kwètù. Nyama wa ntambwe ne mbwa wa diitu bidìila pàmwè, ngombe ùdya mashinde, ntambwe ùdya nendè pàmwè; pàdiyi mpindyewu yidyangana, anyì ntambwe ùdya ngombe, ne mbwa wa diitu ùdya ngombe, cyònsò cidiye mwà kudya aci. Kàdi mu matùkù awu kabyàkwikala nànkù to. Nyuunyi minène mimpè kumòna munkaci mwà kubùuka. Kakwàkwikala kanyinganyinga nànsha. Kakwàkwikala cimanyinu cyà ne tukaadi basambùke mwaba wà ditèkemena dyètù to. Mu dipweka dyà ne kajila aku tudì tumòna bàna bèètù balela, bananga bèètù. Èyi Nzambì, ditùkù kaayi's wè! Ditùkù kaayi's wè! Citùdì mwà kupeta pa buloba ebu nànsha ciikale cinyi, neci—neci—necijimine cyònsò, kàdi Aci kacyakujimina to.

244 Nzambì, ndi mwà kwikala ncìyì mukùmbàne bwà kuyiikila ne bantu bàdì beele byanza byàbò muulu aba to, pànu pa buloba apa. Ncyèna mumanyè to. Ndi ntèkemena ne nenyikile naabù. Kàdi byòbì kabìyì nànkù to, dìbà adi, Mukalenge, anyishaku bwà ntuutakeene naabò lwà kwinshi kwà kajila kwàka. Mbafwànyine kwamba cintu bu eci ne: “Mwanèètù Branham, udi muvùlùke pa buloba kumpàlà kwà cintu cinène eci kwenzekaci, dindà kampànda uvwa wakula pa—dikàngudiibwa dyà bitampì bìvwà bilaminyina mu Lupànzà lwà buloba anyì? Cìvwa mmu cikondo aci mwàkabwelaYe mu lwànyì lupànzà lwà buloba, ndi ewu wàkeela cianza cyànyì muulu mu dindà adi. Kaa, ndi ne disànkà dyàbùngì dyà ne mvwapù.”

245 Nèngàmbè ne: “Mwanèètù wa balùme, mwanèètù wa bakàjì, ndi ne disànkà dyàbùngì dyà ne mvwapù, mèmè pàànyì. Mpindyewu netwikale mu bwobùmwè pàmwè munda mwà bikondo byònsò.”

246 Bàbènèshèku, Taatù, bàdì Bèèbè. Wèwè wàkamba ne: “Muntu nànsha umwe kèna mwà kulwa kùNdi pàdì Taatù kàyì mumukòke to. Ne bwònsò bàdì Taatù muMpèèshe nebàlwe, nànsha umwe wa kùdìbo kaakujìmina to.” Pà nànkù tudì—tudì ne kusàkidila, Taatù, bwà bwalu abu. Swàkù bàlweku mpindyewu bwà bàpetè cyèyà cyà lupàndù lwàbò, kì nkuya kashààla wa mu èkèleeziyà kampànda nànsha. Kàdi cyèyà kì ndiya kashààla wa mu èkèleeziyà kampànda nànsha kàdi nDilediibwa dipyadiyà, bwà kwakidila Nyumà Mwimpè.

Swákù bàKwakidilè, Taatù. Bwalu tudi tubàlàmbula mu byanza Byèbè, mu Dìná dyà Yesù Kilistò. Amen.

247 Bwà mishwàla eyi: Mukalenge Yesù, ndi nsambidila mishwàla eyi; ne ndòmba bwà Wèwè kubènesha bwònsò bàdi mu lutátu, bwònsò bàdi kaaba aka, Mukalenge, mukàji mwenze ne luse udi musòmbè kaaba aka mu kàkalù kàà balèma ewu.

248 Paanyimà pàà disangisha dinène dyà mu dindà emu edi, Taatù, biikale tumvwa Nyumà Mwimpè Webè munkaci mwà kutùwuja patapta bwònsò, munkaci mwà kumvwa Dìyì dipweka ne mu ndòndò ne dyèla miji mu myoyi yà bantu. Kabààdyakucipwaku mwoyi to, Mukalenge. Dìbà dyònsò didìbo bumvwa bintu ebi nebàvùluke bitampì bidì bikàngùdìbwe abi. Mpindyewu, tükwàcìshèku bwà kumanya cìvwà bitampì abi, Mukalenge, bwà muntu ne muntu kàlu kubazudiibwa mu meeji èndè to, kàdi yèyè neàmanyinè ku “EMU MMÙDÌ MUKALENGÈ WÀMBA” ne ki cìtampì cyà Nzambì aci, bitampì bidì Nzambì mutùkàngwile abi.

249 Tudi tulòmba bwà Wèwè kwondopa babèèdi bwònsò ne beena ntàtu. Enzaku nàнку, Mukalenge. Nyumà Webè udi kaaba aka. Pìikalabi ne Udi mwà kusùngila ngènzàmpèkààtù paanyimà pàpa lwà mu ndekeelu mwà nzùbu mwàmwa, Udi mwà kwondopa mubèèdi mwaba awu, kàbidi. Ndi ndòmba bwà Wèwè kucyènza, Mukalenge, ne kwondopa aba bàdi mishwàla eyi yìleeja mpàla bàvwà kabàyi mwà kufika kaaba aka leelù ewu abu. Tudi tuKulàmbulabò bwònsò mu Dìná dyà Mukalenge Yesù Kilistò. Amen.


250 Ndi ngèèla meeji ne bàdi ne mwànà mukèsè wa mu dibòko udibò bàswe bwà kulàmbula. Ke mukàji udi apa ewu ne mwànà mukèsè awu anyi? Udiku mwà kulwa nendè mpindyewu anyi? Netwikale ne disànkà bwà kulàmbula kakwàcìkwètù aka. To, kèna ne cyà kwikala mukèsè to, lwákù ànu. (Bàmwè bàà ku bakùlù lwàyi nwimanè naanyi mpindyewu.) Ùdi ne bidimu bìngà? Bidimu bìbidi ne citùpà. Dyèndè nganyì? Scott? Scott Ford, Scott Ford mwànà, bidimu binaayi ne citùpà, mmuswè kulàmbudiibwa mu dindà emu kùdi Mukalenge wendè ne Musùngidi, Yesù Kilistò. Mamwèndè mmulwe nendè. (Buludi, lwákù mutàngile kumpàla, mwanèètù.)

251 Mukalenge wa ngàsà, nyèwù tuKutwàdila mwànà mukèsè ewu mu dindà emu, mu dilàmbula. Ne byanza byètù bitenteka mwànà mukèsè ewu, mwànà mukèsè wa balùme ewu, ne tulòmba bwà ne bukolè bwàkabiìsha Yesù mu lukita abu bwàtabulujaku mwànà wa balùme mukèsè ewu. Nzambì, swákù bwà ikale ne nsòmbèlu wa bukolè bwà mubidi ne makàndà. Swákù bwà yèyè kwikala ne mwoyi, Mukalenge, bwà butùmbi Bwèbè. Mùshindù Ùkaadi muditwe mu kwambulwisha mwànà ewu, nènku tudi tuKusàkidila bwà bwalu abu. Nènku ndi ndòmba bwà Wèwè kutùngunuka ne kwikala ne mwànà mukèsè awu. Kwikala ne

baledi bèndè, ne bananga bèndè. Swâkù...tudi bamanyè ne balongèshìibwe ne maalu wònsò àdi àkwàta mudimu pàmwè bwà bwîmpè bwà aba bàdi banange Mukalenge. Mùshindù mene ùdi bintu misangu mikwàbò bitàmba kuseemeja bantu Kùdi. Ndi ndòmba bwà Wâtùkùmbajilakù mabènesha atùdi tulòmba aa. Nènku mpindyewu, Taatù, mu ditùmikila ku Diyì Dyèbè, tudi tuKulàmbula mwànà mukesè wa balùme ewu mu Dîná dyà Yesù Kilistò. Swâkù Wàkidileku nyumà wendè mukesè, musùùkà, ne mubidi, ne ukwatè nendè mudimu bwà butùmbi Bwèbè. Amen.

²⁵² Nzambi àkubènèshè, mwanèètù wa bakàji. Nzambi àkubènènshe, wêwè Scott wa kânà. Mùshindù mene utùdi tusàkidila Mukalenge bwà bwalu abu's!

²⁵³ Mpindyewu, nganyì wíkala mwà kubàtìijìibwa? Kùdi musùmbù wà bantu bwà kubàtìijìibwabò, ngèèla meeji. Patùcidì tudìlongolola bwà cyôci aci apa, twîmbààyi...Ndi nnwàmbila citùdi bafwànyine kwenza, twîmbààyi...Nènshiilè Mwanèètù Neville bwà kucyènza. Ndi mumanyè ne nebiikale bîmpè dîbà adi. Èyo, mukalenge, Mwanèètù Neville.

²⁵⁴ Nudi banangè Mukalenge, ambààyi ne "Amen." [Disangisha dîdi dyàmba ne: "Amen."—Muf.] Nennùnsambidile anyì? [Disangisha dîdi dyàmba ne: "Amen."] Amen. Amen. 

61-0618 Bwàkabuulwibwà Nshapità Mwitaanu Citùpà II
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org